

舊唐書

四



唐書本紀卷第十三

德宗下

劉
聞人詮校刊
光祿
同校

貞元四年春正月庚戌朔上御丹鳳樓制曰朕以菲薄託於王公之上恭承天地之序虔奉祖宗之訓遐想至理思臻大和而誠不感物化不柔遠聲教猶鬱征賦仍繁頃者務於安人不憚屈已與西蕃結好申以齊盟而戎心不戢背義虧信却脅士庶屢犯封疆元元何辜皆朕之失乃者輦轂之下兇狂結構上帝垂祐悉自伏誅刑以止殺諒非獲已今三陽布和萬物資始思與羣公兆庶惟新政理宜敷在有之澤以覃作解之恩可大赦天下大辟已下罪咸赦除之是日質明含元殿前階基欄檻壞損三十餘間壓死衛士十餘人京師地震辛亥又震壬子又震壬戌以左龍武大將軍王西曜為麟州刺史鄴坊丹延節度使丁卯京師地震戊辰又震庚午又震以宣武軍行營節度

使劉昌爲涇州刺史四鎮北庭行軍涇原等州節度使癸酉京師地震甲戌以華州潼關節度使李元諒兼隴右節度使臨洮軍使乙亥地震金房尤甚江溢山裂廬舍多壞居人露處陳畱雨木如大指長寸餘有孔通中下而植於地凡十里許辛巳李泌以京官俸薄請取中外給用除陌錢及闕官俸外一分職田額內官俸及刺史執刀司馬軍事等錢令戶部別庫貯之以給京官月俸令御史中丞竇叅專掌之歲得錢三百萬貫謂之戶部別處錢朝臣歲不過五十萬常有二百餘萬以資國用壬午地震甲申又震乙酉又震丙申又震甲辰太僕郊牛生犢六足又豕生兩首四足築延喜門北複道屬永春門涇原劉昌復築連雲堡戊辰鹿入京師市門甲寅地震宴群臣於麟德殿設九部樂內出舞馬上賦詩一章群臣屬和己未地震丁卯有司條奏省官其左右常侍太子賓客請依前置四員從之庚午地震詔涇原劉昌於平涼會盟所收被害將士骸骨葬於淺水原爲二冢丘石堠志之題曰懷忠冢辛未地震中書省梧樹有鵲以泥爲巢癸

已以太子左庶子暢悅爲桂管觀察使改左右射生爲左右神威軍
福建兵亂逐觀察使吳詵丁未隴右李元諒築良原城丁巳右龍武
統軍張伯儀卒辛酉以吉州刺史張庭爲安南都護本管經略使昇
鄆州爲大都督府壬戌加置諫議大夫八員分中書四員爲右門下四
員爲左檢校左庶子蕭復卒於饒州丙寅地震丁卯又震月犯歲星
辛未太子賓客吳湊爲福建觀察使乙亥災惑歲鎮三星聚營室凡
二十日是月吐蕃寇涇邠寧慶廊等州焚彭原縣邊將閉城自固賊
驅人畜三萬計凡二旬而退吐蕃入寇以秋冬今盛暑而來華人陷
蕃者道之也六月丁丑鄂岳觀察使李竦卒乙酉以尚書左丞杜祐
爲陝州長史陝虢觀察使徵夏縣處士先除著作郎陽城爲諫議大
夫城以褐衣詣闕上賜之章服而後召乙丑桂管都防禦觀察使暢
悅卒乙未以諫議大夫何士幹爲鄂岳沔蘄黃等州都團練觀察使
乙亥封皇子皇弟邕王諒等七人爲王兼卿監祭酒等官癸卯災惑
退行入羽林秋七月庚戌以左金吾將軍張獻甫爲邠寧節度使陳許

防禦兵馬使韓全義檢校工部尚書充長武城及諸軍行營節度使
癸丑邠寧軍因韓遊瓌受代憚張獻甫之嚴乘其無帥縱兵大掠仍
脅監軍楊明義奏請范希朝爲帥都虞候楊朝晟斬其亂首二百
餘人方定朝命仍以希朝副獻甫已未奚室韋寇振武軍壬戌詔以
太尉中書令西平郡王李晟長子愿爲銀青光祿大夫太子賓客賜
勲上柱國與晟門並列戟乙丑以前撫州刺史戴叔倫爲容州刺史
兼御史中丞本管經略使丁丑以兵部尚書崔漢衡爲晉州刺史晉
慈隰觀察使壬申詔嗣王郡王朝會班位在本官班之上左右庶子
准令在左右丞侍郎之下諸司四品之上今在少卿之下非也宜改
之乙亥以蘇州刺史孫晟爲桂州刺史桂管觀察使荆河自陝州至
河陰水色如墨流入汴口至汴州一宿而復又汴鄭管內烏皆入田
緒李納之境嚼柴爲城方十餘里高二三尺緒納惡而去之信宿復
如之烏口皆流血八月以權判吏部侍郎吉中孚爲中書舍人乙酉
檢校司徒兼太子太師汧國公李勣薨甲午京師地震其聲如雷九

月丙午詔比者卿士內外左右朕躬朝夕公門勤勞庶務今方隅無事丞庶小康其正月晦日三月三日九月九日三節日宜任文武百寮選勝地追賞爲樂每節宰相及常叅官共賜錢五百貫文翰林學士二百貫文左右神威神策等軍每廂共賜錢五百貫文金吾兵武威遠諸衛將軍共賜錢二百貫文客省奏事共賜錢一百貫文委度支每節前五日支付永爲常式戊申晉慈惠觀察使崔漢衡加都防禦使名祭丑賜百寮宴於曲江亭仍作重陽賜宴詩六韻賜之群臣畢和上品其優劣以劉太真李紆爲上等鮑防于召爲次等張濛殷亮等二十人又次之唯李晟馬燧李泌三宰相之詩不加優劣庚申吐蕃寇邠寧坊等州冬十月詔中書門下選常叅官曾爲牧宰有理行者以名聞宰臣奏于頔董晉等十二人前任有治迹詔頔等於左右丞聽各言政要左右丞條奏上乃御宣政殿親試其言而後用之丙戌以右神策將軍李長榮爲河陽三城懷州團練使仍賜名元戊子迴紇公主將妻媵六十餘人馬二千匹來迎咸安公主命刑部尚書關播送公

主歸蕃十二月辛巳少府監李觀卒

五年春正月壬辰朔乙卯詔四序嘉辰歷代增置漢崇上巳晉紀重陽或說禳除雖因舊俗與衆共樂咸合當時朕以春方發生候及仲月勾萌畢達天地和同俾其昭蘇宜助暢茂自今宜以二月一日爲中和節以代正月晦日備三令節數内外官司休假一日宰臣李泌請中和節日令百官進農書司農獻種稔之種王公戚里上春服土庶以刀尺相問遺村社作中和酒祭勾芒以祈年穀從之丁卯右散騎常侍宣城縣子柳渾卒二月己丑貶京兆尹鄭叔則爲永州長史戊戌以滄景畱後程懷直爲滄景觀察使庾子以大理卿董晉爲門下侍郎同中書門下平章事以御史中丞竇叅爲中書侍郎平章事兼轉運使以戶部侍郎班宏爲戶部尚書依前度支轉運副使三月甲辰中書侍郎同平章事李泌卒乙卯以兵部郎中姚南仲爲御史中丞司農卿薛珏爲京兆尹以大理卿李速爲黔州刺史黔州觀察使癸亥以資州刺史龐復爲安南都護本管經略使丙寅貶禮部

侍郎劉太真爲信州刺史以給事中杜黃裳爲河南尹戊辰詔以李懷光外孫燕八八爲左衛率府胄曹叅軍賜姓名曰李承緒仍賜錢千貫俾自營居業夏四月乙未以太子少師蕭昕爲工部尚書致仕給半祿料永爲常式初致仕官只給半祿無料上加以待老臣半料自昕始也五月戊辰宋州麥一莖九岐者百餘本六月乙未以光祿卿裴腆爲桂管觀察使秋七月以嗣滕王湛然爲太子賓客入迴紇使八月辛未以同州刺史竇穎爲戶部侍郎九月壬戌詔以褚遂良已下至李晟等二十七人圖形於凌煙閣以繼國初功臣之像冬十月丙午西川韋臯奏與東蠻合力大破吐蕃於故雋州擒其將臧遮遮自是吐蕃挫銳竟復雋州庚午百寮請復徽號不允己丑易定節度使檢校司空平章事張孝忠以擅出兵襲尉州降檢校司空爲左僕射桂管觀察御史中丞孫晟卒癸巳以戶部侍郎竇覲爲揚州長史兼御史大夫淮南節度使十二月庚午迴紇汨咄祿長壽天親毗伽可汗卒辛未以淮南節度使杜亞爲東都畱守畿汝州都防禦

使兵部侍郎裴諤爲河南尹司農卿李翼爲陝虢都防禦觀察使壬申以陝虢觀察使杜祐檢校禮部尚書兼揚州長史淮南節度使六年春正月戊辰朔戊申大雪二月戊辰朔百寮會宴於曲江亭上賦中和節羣臣賜宴七韻是日百寮進北人本業三卷司農獻黍粟各一斗岐州無憂王寺有佛指骨寸餘先是取來禁中供養乙亥詔送還本寺丙戌以中書舍人陸贄權兵部侍郎甲午以吏部侍郎劉滋爲吏部尚書丁酉王武俊守棣州將趙錡以郡歸李納武俊怒以兵攻之三月庚子百寮宴于曲江亭上賦上巳詩一篇賜之壬寅渾瑊自河中來朝戊午牂牁蠻來朝甲子以旱日色如血無光夏四月甲辰大風雷閏月庚申太白辰星聚東井戊午始雨五月丙寅朔上御紫宸受朝上以是月一陰生臣子道長父子必以是朔固焉故取朔日受朝壬午以寧州刺史范希朝爲單于大都護麟勝節度使是夏淮南浙東西福建等道旱井泉多涸人渴乏疫死者衆秋七月丙寅淮南節度使寶觀卒癸酉復曄親王母曰太妃公主母曰太儀八

月丁未工部尚書致仕鮑防卒九月乙丑收諸道進奏院官印悉毀之已卯詔十一月八日有事於南郊太廟行從官吏將士等一切並令自備食物其諸司先無公厨者以本司闕職物充其王府官度支量給廩物其儀仗禮物並仰御史搏節處分冬十月己亥文武百寮京城道俗抗表請徽號上曰朕以春夏亢旱粟麥不登朕精誠祈禱獲降甘雨旣致豐穰告謝郊廟朕倘因裡祀而受徽號是有爲爲之勿煩固請也辛亥迴紇弔祭使鴻臚卿郭降復命迴紇遣達北勒梅錄將軍來告九姓迴紇登里邏沒密施俱錄忠貞毗伽可汗之喪十一月庚午日南至上親祀昊天上帝於郊丘禮畢還宮御丹鳳樓宣赦見禁囚徒減罪一等立仗將士及諸軍兵賜十八萬段匹今後刺史縣令以四考爲限青州李納以棣州還王武俊并其兵士三千是歲吐蕃陷我北庭都護府節度使楊襲古奔西州迴紇大相頡干迦斯給襲古請合軍收復北庭乃殺襲古安西因是阻絕唯西州猶固守之迴紇亦爲吐蕃所逼取浮圖川乃遷部落羊馬於牙帳之南以

避之

七年春正月壬戌朔己巳襄王僭薨庚辰以湖南觀察使裴胄爲洪州刺史江西觀察使以常州刺史李衡爲潭州刺史湖南觀察使蔡州置汝南縣黑衣大食遣使朝貢以中書舍人韓臯爲御史中丞二月己巳涇原帥劉昌復築平涼城城去故原州一百五十里本原之屬縣地當禦戎之衝要昌復浹辰而功畢分兵戍之邊患稍弭庚子侍中渾瑊自河中來朝三月辛酉陳許節度使曲環奏請權停當道冗官待一二年後民力稍給則復之壬戌左龍武統軍戴休顏卒甲子涇原節度使劉昌築胡谷堡改名彰義堡堡在平涼西三十五里亦禦戎之要地壬申詔頃來賜衣文彩不常非制也朕今思之宜有定制節度使宜以鶻銜綬帶觀察使宜以鴈銜威儀威儀瑞草也關輔牛疫死十二五六上遣中使以諸道兩稅錢買牛散給畿民無牛者辛巳詔神威神策六軍將士自相訟軍司推劾與百姓相訟委府縣推劾小事移牒大事奏取處分軍司府縣不得相侵癸未義

武軍節度使檢校司空平章事張孝忠卒夏四月庚子太子少師致仕蕭昕卒汴州獻白鳥戊午詔仲夏之時萬物敷暢陽德方茂陰事始承昔者觀法象因天地交會之序為父子相見之儀公習成風古今不易王者制事在於因人酌其情而用中順其俗以為禮咸覲之義既行於父子之間資事之情豈隔於君臣之際申恩卿士自我為初起今年五月朔御正殿召見文武百官外官因朝奏咸聽就列仍編禮式以為常典己未安南首領杜英輪叛攻都護府都護高正平憂死五月庚申朔上御宣政殿見百官從新制也辛未置柔遠軍為安南都護府甲申端王遇薨許州獻白鳥戊子以衡州刺史齊映為桂管觀察使六月庚子朔乙巳太常卿崔縱卒秋七月庚午以信州刺史鄭叔則為福建觀察使癸酉上幸章敬寺賦詩九韻皇太子與群臣畢和題之寺壁戊寅以邕王諒為義武軍節度使易定觀察等大使以定州刺史張昇雲為畱後庚辰以虔州刺史趙昌為安南都護經略招討使八月己丑以翰林學士歸從敬為工部尚書甲午給事

中鄭瑜爲中書舍人丙申貶宗正卿李翰爲雅王傅翰林學士陸贄爲兵部侍郎罷學士庚戌夏州奏開延化渠引烏水入庫狄澤溉田二百頃九月庚申兵部尚書致仕馬炫卒冬十月癸丑每御延英令諸司官長二人奏本司事尋又勅常叅官每一日云引對訪以政事謂之巡對十一月乙丑令常叅官趨朝入閣不得奔走周親已下喪者禁慘服朝會須服本色綾袍金玉帶丁酉以前福建觀察使吳湊爲陝州長史陝號觀察使是冬無雪

八年春正月丙辰朔癸酉罷桂管經略招討使二月丁亥許州人李狗兒持杖入含元殿擊欄檻又格擒者誅之庚子京師雨土已酉吏部尚書李紆卒乙丑山南東道節度使檢校戶部尚書嗣曹王臯薨庚午宣武軍節度使司徒平章事劉玄佐卒癸酉劔南西川節度使韋臯奏請有當道閑員官吏增其俸祿從之己亥以湖南觀察使李衡爲洪州刺史江西觀察使襄州軍亂掠府庫民財殆盡都將徐誠斬其亂首楊清潭方止丙子以荆南節度使樊澤爲襄州刺史

山南東道節度使以江西觀察使裴胄爲江陵尹荆南節度使以戶部尚書班宏判度支戶部侍郎張滂爲諸道鹽鐵轉運使已卯以陝號觀察使吳湊爲汴州刺史宣武軍節度汴宋等州觀察使辛巳以同州刺史姚南仲爲陝號觀察使壬午以左庶子李允爲京兆尹以蘇州刺史齊抗爲潭州刺史湖南觀察使夏四月丁丑貶左金吾大將軍嗣號王則之爲昭州司馬左諫議大夫知制誥吳通玄爲泉州司馬給事中竇申道州司馬戊子以雅王傅李翰爲金吾衛大將軍翰前爲竇叅所惡貶官至是叅欺上遽召翰口授將軍便令金吾仗上事翌日除書方下庚寅以汴州長史劉士寧爲汴州刺史宣武軍節度使時吳湊行次汜水聞其有變而還乙未貶中書侍郎平章事竇叅爲郴州別駕竇申景州司戶尋杖殺申諸竇皆貶以尚書左丞趙憬兵部侍郎陸贄爲中書侍郎同中書門下平章事丁酉韋臯請十二而稅以給官吏從之丙午以東都河南淮南江南嶺南山南東道兩稅等物令戶部侍郎張滂主之以河內河東劔南山南西道等財

戶部尚書判度支班宏主之一遵大曆故事如劉晏韓滉分掌焉給事中常夏卿左遷常州刺史坐交諸竇也是月吐蕃寇雲州五月乙卯朔上御宣政殿受朝丙辰初增稅京兆青苗晦三錢以給掌閑驍騎戊午以光祿少卿崔穆爲黔州觀察使己未大風吹壞廬舍門闕丙寅以大理卿王胡爲福建觀察使戊辰初令授臺省官者各具舉主於授官詔先是郎官缺左右丞舉之御史缺大夫中丞舉之詔書不具所舉及趙憬陸贄爲相諫議郎官不宜專於左右丞宜令尚書丞郎各舉其可詔書具所舉官名御史亦如之異日考殿最以舉主能否從之癸酉平盧淄青節度使檢校司徒平章事李納卒癸未前太僕少卿劉士幹有罪賜死劉玄佐養子也六月吐蕃寇涇州秋七月甲寅朔戶部尚書判度支蕭國公班宏卒以管桂觀察使齊映爲洪州刺史江西觀察使以翰林學士歸崇敬爲兵部尚書致仕辛巳大雨八月乙丑以天下水災分命朝臣宣撫賑貸河南河北山南江淮凡四十餘州大水漂溺死者二萬餘人辛卯以青州刺史李師

古爲鄆州大都督府長史平盧淄青等州節度觀察海運陸運押新羅渤海兩蕃等使丁未詔以歲凶罷九月賜宴九月丁巳韋皇攻吐蕃之維州獲蕃將論莽熱以獻貶太子賓客于召江州別駕尋卒乙亥以太子賓客薛珣爲嶺南節度使冬十月己亥追封故皇弟遐爲均王庚戌復命金吾置門籍十一月壬子朔日有蝕之己巳貶右庶子姜公輔泉州別駕嚴震奏破吐蕃於芳州壬申詔自今死刑勿決先杖十二月庚寅詔賜遭水縣之絕戶米三十萬石丁未以給事中李巽爲潭州刺史湖南觀察使閏月癸酉門下省奏郵驛條式應給紙券除門下外諸使諸州不得給往還券至所詣州府納之別給俾還朝常叅官在外除授及分司假寧往來並給券從之甲戌牂牁室韋韎鞞皆遣使朝貢

九年春正月庚辰朔朝賀畢上賦退朝觀仗歸營詩乙酉劔南東川節度使王叔邕來朝癸卯初稅茶歲得錢四十萬貫從鹽鐵使張滂所奏茶之有稅自此始也甲辰禁賣劒銅器天下有銅山任人採取其

銅官買除鑄鏡外不得鑄造二月庚戌朔先是宰相以三節次宴府縣有供帳之弊請以宴錢分給各令諸司選勝宴會從之是日中和節宰相宴于曲江亭諸司隨便自是分燕焉易定畱守張昇雲為義武軍節度使辛酉詔復築鹽州城貞元三年城為吐蕃所毀自是塞外無堡障大戎入寇既成之後邊患息焉三月己亥以駕部郎中知制誥張式為虢州刺史夏四月辛酉地震有聲如雷河中關輔尤甚壞城壁廬舍地裂水涌五月庚申廢諸州府執刀甲辰以義成軍節度使檢校右僕射賈耽為左僕射同中書門下平章事以尚書左丞盧邁本官同平章事以鄭州刺史李融為滑州刺史義成軍節度使乙巳韋臯奏遣軍出西山破吐蕃峨和城定兼城通鶴軍凡平堡五十餘所是日以蕃俘器械來獻丙戌以門下侍郎平章事董晉為禮部尚書罷知政事甲寅加韋臯檢校右僕射以司農少卿裴延齡為戶部侍郎判度支庚申以給事中李衡為戶部侍郎諸道鹽鐵轉運使秋七月乙未勅縣令以四考為限無替者宜至五考庚子以信州刺史孫

公器爲邑管經略使故事宰相秉筆決事每人十日一易至是賈耽
趙憬陸贄盧邁同平章政事百寮有所關白更相讓而不言始詔令
旬日秉筆後詔每日更秉筆劍南西川羌女國王楊立志哥鄰王董卧
庭白狗王羅陀念弱水王董避和逋租王弟鄧告知南水王姪尚悉
曩等六國君王自來朝貢六國初附吐蕃韋臯出西山討吐蕃故六
蠻內附各授官勅遣之八月庚戌太廟中書令西平郡王李晟薨贈
太師廢朝五日己巳皇太子長男廣陵王淳納妃郭氏九月己卯罷
九日宴以太師晟喪也冬十月己酉侍中馬燧對于延英燧足疾詔
令不拜行仆於地命宦者扶持之上謂之曰前日卿與太尉晟俱來
今公獨至因歔欷泣下及燧退上送及階癸酉環王國獻犀牛上令
見于太廟十一月乙酉日南至上親郊圓丘是日還宮御丹鳳樓制
曰朕以寡德祇膺大寶勵精理道十有五年夙夜惟寅罔敢自逸小
大之務莫不祗勤皇靈懷顧宗社垂祐年穀豐阜荒服會同遠至邇
安中外咸若永惟多祐實荷玄休是用虔奉禮章躬薦郊廟克展因

心之敬獲申報本之誠慶感滋深悚惕惟勵大福所賜豈獨在予思與萬方均其惠澤可大赦天下辛卯華州潼關鎮國軍隴右節度使李元諒卒於良原以其部將阿史那叙統元諒之衆戍良原壬寅河南尹東都畱守裴諤卒甲辰冬制薦官宜令尚書丞郎於都堂訪以理術試時務狀考其通否及歷任考課事迹定爲三等并舉主姓名仍令御史一人爲監試如授官後政事能否委御史臺觀察使以聞而殿最舉主十二月丙午朔制今後使府判官副使行軍已下使罷後如是檢校試五品以上官不合集於吏部選任準罷使郎官御史例冬季聞奏丙辰宣武軍亂逐節度使劉士寧壬戌以通王諶爲宣武軍節度使以宣武軍節度使副使李萬榮爲汴州刺史宣武軍節度汴宋等州觀察畱後朔方靈鹽節度副大使太子少師檢校左僕射餘姚郡王杜希全卒

十年春正月乙亥朔乙酉以虔王諒爲朔方靈鹽豈節度大使以朔方等道行軍司馬李來爲亞後壬辰南詔異牟尋大破吐蕃於神川

使來獻捷已亥昭義節度使檢校司空平章事李抱真請降官乃授
檢校左僕射時抱真病巫祝言宜降爵故有是請二月丙午以瀛州
刺史劉滌爲秦州刺史隴右經略軍使理普閏縣仍以普閏軍爲名
乙卯以給事中齊抗爲河南尹乙丑義成軍節度使鄭滑觀察使李
融卒丁卯詔君臣之際義莫重焉每聞薨殂良深悼惻應文武朝臣
薨卒者其月俸料宜全給仍更准本官一月俸料以爲賻贈三月乙
亥黃霧四塞日無光以華州刺史李復爲滑州刺史義成軍節度使
滄州程懷直來朝賜安業坊宅妓一人復令還鎮庚辰南詔異牟尋
攻收吐蕃鐵橋已東城壘一十六擒其王五人降其民衆十萬口壬
申以同州刺史盧徵爲華州刺史潼關防禦鎮國軍等使辛丑以延
州刺史李如暹所部蕃落賜名曰安塞軍以如暹爲軍使夏四月戊
辰地震癸丑復震恒州奏見巨人迹以雲南告捷使高細龍爲左武
衛將軍是月太白晝見有大鳥飛集宮中食雜骨是春霖雨罕有晴
日六月壬寅朔昭義軍節度使檢校左僕射同中書門下平章事義

陽王李抱真卒詔以其將王延貴權知昭義軍事癸丑以祠部郎中
袁滋兼御史中丞爲冊南詔使甲寅以辰州刺史房孺復爲容管經
略使丙寅韋臯奏西山峨和城擊破吐蕃城柵斬首二千八百級庚
午度支使裴延齡兼靈鹽等州鹽池井權使辛未晦有水鳥集於左
藏庫是夜暴雨大風折木秋七月壬申朔以邕王諒爲昭義軍節度
使以昭義軍押衙王延貴爲路府左司馬充昭義節度畱後賜名虔
休抱真別將權知洛州事元誼不悅虔休爲畱後據洛州叛陰結田
緒庚辰賜南詔異牟尋金印銀窠其文曰貞元冊南詔印先是吐蕃
以金印授南詔韋臯因其舊而請之汴州軍亂攻節度畱後李萬榮
不勝而潰萬榮悉捕斬其孥已亥前汴州節度使劉士寧宜於郴州
安置欽州守鎮黃少卿叛攻邕管經略使孫公器又陷欽橫潯貴等
州吐蕃大將論乞髯陽沒藏悉諾碑以其家內附授歸義將軍因置
四品已下武官以授四夷歸附者仍定懷化大將軍已下俸錢九月
辛未朔以袁州刺史董鎮爲邕管經略使戊子賜百寮九日宴上賦

詩賜之辛卯南詔獻鐸梨浪人劍吐蕃印八紐戊戌定州張雲昇改
名茂昭冬十月癸卯御宣政殿試賢良方正能直言極諫等舉人壬
戌刑部尚書劉滋卒十一月乙酉諸道鹽鐵轉運使張昉爲衛尉卿
以浙西觀察使王緯爲諸道鹽鐵轉運使庚寅秘書監致仕穆寧卒
十二月庚子朔壬戌貶中書侍郎平章事陸贄爲太子賓客

十一年春正月庚午朔乙亥嶺南節度使薛珣卒乙未以秘書少監
王礎爲黔中經略觀察使衛尉少卿武少儀爲邕管經略使丙申以
邕管經略使王鐸爲廣州刺史嶺南節度使二月癸卯以衢州刺史
李若初爲福建觀察使乙巳冊渤海大欽茂之子嵩爲渤海郡王忽
汗州都督乙卯於涇州彰信堡置潘原縣甲子九姓迴紇骨咄祿毗
伽奉誠可汗卒三月庚午司徒兼侍中馬燧以疾請罷侍中不許辛
未賜宰臣兩省供奉官宴於曲江亭乙丑以吏部侍郎鄭瑜爲河南淮
南水陸轉運使丙申諸州準例薦隱居丘園不求聞達蔡廣成等九
人各受試官令給公乘到京日量才叙用夏四月旱壬戌貶太子賓

客陸贄爲忠州別駕京兆尹李元信嗣史衛尉卿張滂汀州長史癸亥以兵部侍郎韓臯爲京兆尹甲子賜南詔勅書始列中書三官奉宣行復舊制也丙寅幽州劉濟奏大破奚王覲刺等六萬餘衆五月丁卯朔庚午命有司慮囚旱故也丁丑以宣武畱後李萬榮爲汴州刺史宣武節度副使知節度事以昭義軍節度畱後王虔休爲潞州大都督府長史昭義軍節度副大使知節度事管内度支營田潞澤磁邢洛觀察使又以朔方畱後李栻爲靈州大都督府長史朔方靈鹽豐夏四州受降定遠城天德軍節度副大使知節度事管内度支營田觀察押蕃落等使甲申河東節度使檢校工部尚書太原尹李自良卒庚寅遣使冊九姓迴紇騰里羅羽錄沒密施合胡六骨咄祿毗伽懷信可汗癸巳以通王諶爲河東節度使以河東行軍司馬李悅爲河東節度營田觀察畱後北都副畱守甲午初鑄河東監軍印監軍有印自王定遠始也六月河陽獻白烏甲辰晉慈隰觀察使崔漢衡卒癸丑以絳州刺史姚齊梧爲晉慈隰都防禦觀察使秋七月

丙寅朔右諫議大夫陽城爲國子司業河東監軍王定遠配流崖州坐
專殺也辛卯江西觀察使洪州刺史齊映卒八月辛亥司徒兼侍中
北平郡王馬燧薨贈太傅丙辰以楚州刺史路寢爲洪州刺史江西
觀察使閏月己丑國子司業裴澄表上乘輿月令十二卷理興十二
卷九月己卯賜宰臣兩省供奉官宴於曲江賦詩六韻賜之丁巳加
韋臯統押近界諸蠻及山西八國雲南安撫等使滄州大將程懷信
逐其帥程懷直冬十月丁丑以虔王諒爲橫海軍節度大使以兵馬
使程懷信爲畱後十一月丙申日南至不受朝賀以司徒馬燧葬也
辛丑太常定馬燧謚曰景武上曰景太祖謚改莊武可也己酉潭州
獻赤烏十二月戊辰上獵苑中戒多殺止行三驅之禮勞士而還
十二年春正月甲午朔庚子元誼李文通率洛州兵五千民五萬家
東奔田緒壬子以前滄州節度使程懷直爲左龍武統軍乙丑成德
軍節度使檢校司徒兼侍中渾瑊兼中書令興元節度使嚴震魏博
田緒西川韋臯並加檢校左右僕射同中書門下平章事於是方鎮

皆叙進兼官上制貞元廣利藥方五百八十六首頒降天下三月癸巳朔甲午韋臯奏收降蠻七千戶得吐蕃所賜金字告身五十五片乙巳以戶部侍郎裴延齡爲戶部尚書戊申以兵部尚書董晉充東都留守判東都尚書省東畿汝州都防禦使四月壬戌朔戊辰左右十軍使奏去年冬車駕幸諸營欲於銀臺亭子門外立碑以紀聖迹從之庚午魏博節度使度支營田觀察使檢校左僕射平章事魏州長史駙馬都尉鴈門郡王田緒卒庚辰上降誕日命沙門道士加文儒官討論三教上大悅五月辛卯朔丙申邠寧節度使張獻甫卒甲辰以邠寧都虞候楊朝晟爲邠州刺史邠寧慶節度使銀夏節度使韓潭讓所授禮部尚書乞雪崔寧許其家收葬丁巳駙馬郭曖王士平曖弟煦暄坐代宗忌辰飲宴貶官歸第六月壬戌故驩州司戶竇叅許其家收葬乙丑初置左右護軍中尉監中護軍監以授竇官以左右神策軍使竇文場霍僊鳴爲左右神策護軍中尉監以左右神威軍使張尚進焦希望爲左右神威中護軍監辛酉宣歙觀察使宣州刺

史劉贊卒七月乙未以東都畱守兵部尚書董晉檢校左僕射同中書門下平章事汴州刺史宣武軍節度使宋毫穎觀察使時李萬榮病萬榮子迺自署爲兵馬使軍人又逐迺汴州亂故命董晉帥之以太子賓客王綽爲東都畱守判東都尚書省事東畿汝都防禦使是日汴州節度使李萬榮卒八月辛未朔日有蝕之己巳以前魏博節度副使田季安爲魏州長史魏博節度觀察等使庚午增修望仙門廣夾城十王宅六王宅癸酉以號州刺史崔衍爲宣歙池觀察使以乞髯子湯忠義爲歸德軍丙子以汝州刺史陸長源爲宣武行軍司馬丙戌門下侍郎平章事趙憬薨九月甲午以河東行軍司馬李景略爲豐州刺史天德軍豐州西受降城都防禦使丙午戶部尚書判度支裴延齡卒庚戌幸魚藻宮即日還內壬子吐蕃寇慶州冬十月壬戌詔以京畿旱放租稅甲戌諫議大夫崔損給事中趙宗儒並同中書門下平章事俱賜金紫以少府監崔穆爲晉州刺史晉慈隰觀察使十一月辛卯昭義王虔休造誕聖樂曲以獻十二月己未大雪

平地二尺竹栢多死環王國所獻犀牛甚珍愛之是冬亦死上著刑
政箴一首癸未迴紇南詔劔南西山國女國王並來朝賀

十三年春正月戊子朔庚寅太子少師致仕關播卒壬寅吐蕃贊普
遣使修好塞上以聞上以犬戎負約不受其使東都尚書省火二月
丁巳賜宰臣兩省供奉官宴於曲江亭乙亥度支郎中蘇弁爲戶部侍郎
判度支兵部郎中王召判戶部三月戊子造會慶亭於麟德殿前乙巳
以福建都團練使李若初爲明州刺史浙東觀察使以婺州刺史柳
冕爲福建觀察使夏四月壬戌上幸興慶宮龍堂祈雨乙丑大雪庚
午義成軍節度使鄭滑觀察營田檢校左僕射滑州刺史李復卒巳
卯以大理卿于頔爲陝州長史陝虢觀察使庚辰以陝虢都防禦觀
察轉運等使姚南仲爲滑州刺史義成軍節度鄭滑觀察使五月丙
戌朔韋臯收復雋州畫圖來上壬子以庫部郎中翰林學士鄭餘慶
爲工部侍郎知吏部選事六月巳卯朔以衡州刺史陳雲爲邕管經
略使辛巳引龍首渠水自通化門入至太清宮前壬午韋臯奏於雋

州破吐蕃生擒大籠官士人馬畜器械不可勝紀秋七月丙戌宰相
盧邁請告累月四表避相位是日命宰臣問疾於盧邁私第己丑右
神策中尉霍僊鳴病賜馬十匹令於諸寺齋僧壬辰浚湖渠魚藻池
深五尺乙未地震甲辰以兵部郎中判戶部

王召爲戶部侍郎

乙丑詔今後嗣王薨葬所司並供鹵簿永爲常式八月丁巳詔京
兆尹韓臯修昆明池石炭賀蘭兩堰兼湖渠壬午容管經畧使房孺
復卒九月己丑盧邁懇讓相位乃授太子賓客辛卯九日宴宰臣百
官於曲江上賦詩以賜之己未江西觀察使路瓌卒甲辰陞定州爲
大都督府以湖南觀察使李巽爲江州刺史江西觀察使以禮部侍郎
呂渭爲潭州刺史湖南觀察使冬十月癸丑朔以前滁州刺史房濟
爲容管經畧使丙辰黔中觀察使奏溪州人戶訴被前刺史魏從琚
於兩稅外每年加進朱砂一千觔水銀二百駄戶民疾苦請停從之
淮南吳少誠擅開淘刁河汝河詔使不能禁癸酉宰相賈耽以疾避
相位不允丁丑徐泗節度使張建封來朝上嘉之次日於延英召對

癸巳贈太傅馬燧祔廟命所司供少牢祭仍給鹵簿從宅至廟十二月庚辰右龍武統軍韓遊瓌卒

十四年春正月壬午朔庚寅詔諸道府應貞元八年至十一年兩稅及權酒錢在百姓復內者總五百六十萬七千貫並除放甲午勅比來朝官或相過從金吾皆上聞其間如是親故或嘗同寮伏臘歲時須有還往亦人倫常禮今後不須奏聞因張建封奏議也二月壬子朔戊午上御麟德殿宴文武百寮初奏破陣樂徧奏九部樂及宮中歌舞妓十數人列於庭先是上制中和樂武曲是日奏之日宴方罷比詔二月一日中和節宴以雨雪改用此日上又賦中春麟德殿宴群臣詩八韻羣臣頒賜有老乙亥賜光蔡節度曰彰義軍三月丙申右神策行營節度鳳翔隴右觀察使檢校尚書右僕射鳳翔尹邢君牙卒以右神策將軍張昌爲鳳翔尹右神策行營節度鳳翔隴右節度使仍改名敬則夏四月乙丑以左諫議大夫平章事崔損爲修奉八陵使先是昭陵寢殿爲火所焚至是獻昭乾定泰五陵各造屋三

百八十間橋元建三陵據闕補造五月庚辰朔甲午前東都留守東
畿汝都防禦使檢校吏部尚書杜亞卒丙午戶部侍郎判度支蘇弁
爲太子詹事上特召度支郎中于頔于延英兼御史中丞賜金紫令
判度支閏月庚申以左神策行營節度韓全義爲夏州刺史兼鹽夏
綏銀節度使以代韓潭甲子貶太子詹事蘇弁爲汀州司戶兄贊善
大夫袞爲永州司戶前京兆府士曹冕爲信州司戶六月癸卯太子
賓客盧邁卒乙巳以旱儉出太倉粟賑貸秋七月以吉州刺史杜春
爲邕管經略使乙卯貶京兆尹韓臯爲撫州司馬召右金吾將軍吳
湊于延英面授京兆尹即令入府視事是夏熱甚壬申以給事中同
中書門下平章事趙宗儒爲太子左庶子以左諫議大夫平章事崔
損爲門下侍郎平章事以工部侍郎鄭餘慶爲中書侍郎同平章事
左神策護軍中尉霍僊鳴卒丁丑以宦者第五守亮代僊鳴爲中尉
己卯左右神策置統軍品秩奉給視六軍統軍例甲午崔損修奉八
陵寢宮畢群臣於宣政殿行稱賀江西觀察使潤州刺史王緯卒九

月丁未朔己酉山南東道節度使檢校尚書右僕射襄州刺史樊澤卒乙卯以同州刺史崔宗爲陝州大都督府長史陝虢觀察水陸轉運使以浙東觀察李若初爲潤州刺史浙西觀察使及諸道鹽鐵轉運使又以常州刺史裴肅爲越州刺史浙東觀察使丙辰以陝虢觀察使于頔爲襄州刺史山南東道節度使丁卯杞王僬薨以太常卿杜確爲同州刺史本州防禦長春宮使癸酉諫議大夫田登奏言兵部武舉人持弓挾矢數千百人入皇城恐非所宜上聞之瞿然乃命停武舉冬十月癸酉以歲凶穀貴出太倉粟三十萬石開場糶以惠民庚子夏州韓全義奏破吐蕃鹽州十一月己未韋臯進開西南蠻事狀十卷叙開復南詔之由十二月戊子太子少師致仕郢國公韋倫卒癸酉出東都令嘉倉粟七萬石開場糶以惠河南饑民己亥南詔異牟尋遣使賀正旦明州鎮將栗鎰殺刺史盧雲

十五年春正月丙午朔甲寅雅王逸薨甲戌浙西觀察使李若初卒二月罷中和節宴會年凶故也丁丑宣武軍節度使檢校左僕射平

章事汴州刺史董晉卒乙酉以行軍司馬陸長源檢校禮部尚書汴州刺史御史大夫宣武軍節度度支營田汴宋亳穎節察等使以常州刺史李錡爲濶州刺史浙西觀察使及諸道鹽鐵轉運使是日汴州軍亂殺陸長源及節度判官孟叔度丘穎軍人鬻而食之監軍俱文珍以宋州刺史劉逸準父爲汴之大將以書招之俾靜亂乙丑以宋州刺史劉逸準檢校工部尚書兼汴州刺史宣武軍節度使仍賜名全諒乙未裴肅奏於台州擒栗鎰以獻斬於獨柳樹癸卯罷三月羣臣宴賞歲饑也出太倉粟十八萬碩糶於京畿諸縣三月甲寅吳少誠寇唐州殺監軍召國朝掠居民千餘而去丁巳以度支郎中兼中丞于頔爲戶部侍郎依前判度支戊午昭義軍節度使檢校工部尚書王虔休卒戊辰以河陽三城節度使李元爲潞州長史昭義軍節度澤潞磁邢洛觀察使以河陽節度押衙衡濟爲懷州刺史河陽三城懷州節度使辛未太子少師致仕于頔卒壬申於易州滿城縣置永清軍癸酉令江淮歲運米二百萬石雖有是命然歲運不過四十

萬石四月丁丑以久旱令陰陽人法術祈雨壬午內侍省加置內給事二員癸未以安州刺史伊慎爲安黃節度營田觀察使庚寅應京城內外諸軍縣鎮職官見共五萬八千二百七十一人宜令每人賜粟一石乙未特進兵部尚書歸崇敬卒五月甲辰朔戊辰宗正卿嗣吳王嶽薨六月己卯黔中觀察使御史中丞王礎卒癸巳山南西道節度使檢校尚書左僕射平章事嚴震卒秋七月乙巳以興州刺史興元都虞候嚴礪爲興元尹兼御史大夫山南西道節度度支營田觀察等使丙午故唐安公主賜諡曰莊穆公主賜諡自唐安始也丁未以王礎廢朝一日觀察使卒廢朝自礎始也戊午貶諫議大夫苗拯萬州刺史左拾遺李繁播州叅軍以私議除拜嚴礪不當而無章疏而僞言累上疏故也鄭滑大水八月壬申朔丙申陳許節度使檢校尚書右僕射許州刺史曲環卒丁酉以洋州刺史韋士及爲黔中觀察使丙午以陳許兵馬使前陳州刺史上官浼爲許州刺史陳許節度使吳少誠謀逆斬甚陷臨穎進圍許州庚戌宣武軍節度使

檢校工部尚書汴州刺史劉全諒卒丙辰制吳少誠非次擢用授以
節旄秩居端揆之榮任總列城之重期申報效奉我典章而秉心匪
彝自底不類兇狡成性扇構多端擅動甲兵暴越封壤壽州茶園輒
縱凌奪唐州詔使僭構殺傷干犯國章罪在無赦朕以王者之德在
乎好生人君之體務於含垢寧屈已以宥罪不殘人以興師以上稽
宗社之威外抑忠賢之請庶有悛革尚議優容幸隣境之喪逞貪亂
之志焚略縣邑殘暴吾民朕尤冀知非爲之忍耻亟頒恩命未許出師
至乃攻逼許州肆其蠱毒恣行殺戮流害黎蒸惡稔禍盈人神同
棄興言致討實悼于懷宜令諸道各出師徒犄角齊進吳少誠在身
官爵並宜削奪已巳自今中和重陽二節每節只禁屠一日辛酉以
大理評事宣武軍都知兵馬使韓弘檢校工部尚書兼汴州刺史御
史大夫宣武軍節度使冬十月己丑邕王諒薨吏部侍郎奚陟卒十
一月乙巳冬至罷朝會兵興也壬子襄州于頔奏于朗山破淮南賊
三千人十二月庚午朔方等道副元帥河中絳州節度使檢校司徒

兼奉朔中書令渾瑊薨乙未戰淮西賊於小澱河王師不利諸軍自潰丁酉以同州刺史杜確為河中尹河中絳州觀察使

十六年春正月庚子朔乙巳恒冀定州許河陽四鎮之師與賊戰皆不利而退南詔獻奉聖樂舞曲上閱於麟德殿前二月己酉以左神策行營銀夏節度等使韓全義為蔡州行營招討使陳許節度使上官沈副之己丑左龍武統軍程懷直卒己酉華州刺史潼關防禦鎮國軍使盧徵卒壬子以尚書右丞袁滋為華州刺史潼關防禦鎮國軍使夏四月丁亥黔中知宴設吏傳近逐觀察使韋士宗己丑昭義軍節度使姚南仲為右僕射以權知新羅國事金俊邕襲祖開府檢校太尉雞林州都督新羅國王辛卯以義成軍行軍司馬盧羣為滑州刺史兼御史中丞義成軍節度使壬申檢校兵部尚書京兆尹吳湊卒五月戊戌朔以雨罷朝庚戌韓全義與蔡賊將吳少誠戰於澱水南王師敗績徐泗濠節度使檢校尚書右僕射徐州刺史張建封卒壬子徐州軍亂不納行軍司馬韋夏卿迫建封子愔為畱後丙寅韋

士宗却入黔州丁卯以吏部侍郎顧少連爲京兆尹六月丙午鄆州李師古淮南杜祐並加同平章事以祐兼領徐泗濠節度以前號州叅軍張愔起復驍衛將軍兼徐州刺史御史中丞本州團練使知徐州畱後秋七月湖南觀察使呂渭卒八月癸酉以河中尹王 爲潭州刺史湖南觀察使九月有吳少誠駙馬都尉郭曖卒義成軍節度使盧群卒丙午前太常卿裴郁卒戊辰以左承季光素爲滑州刺史兼御史大夫義成軍節度使庚戌敗中書侍郎同中書門下平章事鄭餘慶爲郴州司馬戶部侍郎判度支于頔爲泉州司戶以戶部侍郎王召判度支以戶部郎中崔從質爲戶部侍郎癸酉吳少誠賊迫官軍激水砦下營韓全義退保陳州諸軍散還本道官軍不振以河南少尹張式爲河南尹水陸轉運使庚申以太常卿齊抗爲中書侍郎同平章事癸亥以虔王諒爲徐州節度使張愔爲畱後冬十月辛未興元嚴礪希監軍言誣奏流人通州別駕崔河圖長流崖州賜死人士傷之吳少誠引兵歸蔡州上表待罪戊子詔雪吳少誠復其官

爵乙丑河東節度使檢校禮部尚書太原尹兼御史大夫北都留守
李悅卒甲午以河東行軍司馬鄭儋檢校工部尚書太原尹河東節
度使十一月癸卯泗州濠州宜隸淮南觀察使戊申以太府卿韋渠
牟爲太常寺卿十二月戊寅罷吏部復考判官及禮部別項貢舉
十七年春正月甲午朔甲寅韓全義自蔡州行營還詔歸鎮華州二
月癸巳朔賜群臣宴於曲江亭上賦中和節賜宴曲江詩六韻賜之
丁酉雨雹巳亥雨霜戊申夜雷震雨雪庚戌大雨雪兼雹三月乙丑
賜群臣宴於曲江亭巳巳黔中觀察使韋士宗復爲三軍所逐癸酉
衢州刺史鄭式瞻進絹五千匹銀二千兩上曰式瞻犯贓巳詔御史
按問所進宜付左藏庫丁丑省天下州府別駕司馬田曹叅軍京兆
河南太原三府外諸府判司雙曹者省一夏四月丁未始命駙馬及
郡縣王壻無子者養舅不用母蔭辛亥以諫議大夫裴佖爲黔中觀
察使五月壬戌朔日有蝕之乙酉邠寧節度使檢校工部尚書邠州刺
史楊朝晟卒丙戌以工部侍郎趙植爲廣州刺史兼御史大夫嶺南

節度使六月戊戌以定平鎮兵馬使李朝案檢校工部尚書兼邠州刺史朔方邠寧慶節度使以中官楊志廉爲右神策護軍中尉浙西人崔善真詣闕上書論浙西觀察使李錡罪狀上覽奏不悅令械善真送於李錡爲鑿坑待善真既至和械推而埋之由是錡恣橫叛已酉以邠寧兵馬使高固爲邠州刺史兼御史大夫邠寧慶節度使丁巳成德軍節度使恒冀深趙德棣觀察等使恒州大都督府長史檢校太尉中書令瑯琊郡王王武俊薨贈太師諡曰忠烈秋七月戊寅吐蕃寇鹽州辛巳以前成德軍節度副使檢校工部尚書知恒府事清河郡王王士真起復授恒州長史充成德軍節度使乙酉太常卿韋渠牟卒巳丑吐蕃陷麟州殺刺史郭鋒毀城壘而去八月戊午以河東行軍司馬嚴綬檢校工部尚書兼太原尹御史大夫河東節度使九月壬戌韋臯奏大破吐蕃於雅州戊辰群臣宴曲江上賦九日賜宴曲江亭詩六韻賜之丁丑禮部尚書李齊運卒冬十月加韋臯檢校司徒中書令封南康郡王賞破吐蕃功也戊午鹽州刺史杜彥

先委城奔慶州辛未宰相賈耽上海內華夷圖及古今郡國縣道四夷述四十卷甲戌翰林待詔戴少平死十六日復生庚戌以京兆尹顧少連爲吏部尚書以吏部侍郎韋夏卿爲京兆尹淮南節度使杜祐進通典凡九門共二百卷

十八年春正月戊午朔大雨雪罷朝賀乙丑驃國王遣使悉利移來朝貢并獻其國樂十二曲與樂工三十五人乙亥韋臯以所擒蕃相論莽熱來獻庚辰以常州刺史賈全爲越州刺史浙東觀察使二月戊子朔賜群臣宴於馬璘之山池三月癸未以劍南東川行軍司馬李康爲梓州刺史兼御史大夫劍南東川節度使乙丑賜宴群臣於馬璘之山池己巳以蘄州刺史鄭紳爲鄂州刺史鄂岳蘄沔觀察使癸酉以浙東團練副使齊總爲衢州刺史總以橫賊進奉希恩給事中許孟容封還制書丙戌以河中行軍司馬鄭元爲河中尹兼御史大夫河中絳節度使五月癸亥以竇群爲左拾遺庚辰以祠部員外郎裴泰爲檢校兵部郎中充安南都護本管經略使六月癸巳以吏

部尚書顧少連爲兵部尚書東都留守東都畿汝防禦使前東都留守檢校禮部尚書王翺卒秋七月庚辰祭申光三州春水夏旱賜帛五萬段米十萬碩鹽三千碩八月壬寅邕管經略使徐中爲廣州刺史嶺南節度使甲辰以嶺南節度掌書記試大理評事張正元爲邕州刺史御史中丞邕管經略使給事中許孟容以非先賜授封還詔書丁未以戶部侍郎判度支王召爲戶部尚書判度支九月乙卯朔以太常少卿楊憑爲潭州刺史湖南觀察使癸亥賜羣臣宴於馬羣山池上賦九日賜宴詩六韻賜之冬十月丁亥以刑部尚書王鐸爲淮南節度副使兼行軍司馬己酉鄜坊丹延節度使檢校禮部尚書王栖耀卒十一月丙辰以同州刺史劉公濟爲鄜州刺史鄜坊丹延節度使十二月乙巳貶大理卿李正臣爲衛尉少卿正臣爲御史彈劾下獄不堪其辱而死戊申黎州蠻牂牁使入朝

十九年春正月癸丑朔二月壬午朔賜宴馬羣山池丁亥修含元殿賜簪節度曰奉義軍丙申以桂管留後韋武爲桂州刺史桂管觀察

使已亥安南經略使裴泰爲州將王季元所逐甲辰淮南節度使杜祐來朝三月壬子朔以杜祐檢校司空同中書門下平章事太清宮使以淮南行軍司馬王錡檢校尚書右僕射兼揚州大都督府長史淮南節度使丁卯以今年孟夏禘饗前議太祖懿獻之位未決至此禘祭方正太祖東向之位已下列序昭穆其獻祖懿祖祔于德明興聖之廟每禘祫年就本室饗之乙亥以司農卿李實爲京兆尹夏四月乙未涇原節度使劉昌奏請移行原州爲平涼城從之戊戌百官以祔廟畢蹈舞稱賀五月辛亥湖南節度使檢校工部尚書江陵尹裴胄卒乙未以荆南行軍司馬裴筠爲江陵尹兼御史大夫荆南節度使甲子四鎮北庭行軍涇原節度使檢校右僕射涇州刺史劉昌卒甲戌以涇原節度畱後段佑爲涇州刺史兼御史大夫四鎮北庭行軍涇原節度使乙亥吐蕃遣使論頻熱入朝甲辰以陳許行軍司馬劉昌商檢校工部尚書兼許州刺史陳許節度使自正月至是未雨分命祈禱山川秋七月戊午以關輔饑罷吏部選禮部貢舉已未

中書侍郎平章事齊抗爲太子賓客病免也甲戌始雨乙亥尚書右僕射姚南仲薨食京畿民麥種八月乙未大雨霖冬十月乙未以太子賓客韋夏卿爲東都留守東都畿汝都防禦使閏月丁巳門下侍郎同平章事崔損卒十一月戊寅朔以鹽州兵馬使李興幹爲鹽州刺史許專達于上不隸夏州丙午振武麟勝節度使范希朝薨戊午以振武行軍司馬閻巨源檢校工部尚書兼單于大都護振武麟勝節度使庚申以太常卿高郢爲中書侍郎同中書門下平章事壬申監察御史崔遠入臺近不練故事違式入右神策軍上怒笞四十配流崖州

二十年春正月丁丑朔丙申天德軍防禦團練使豐州刺史李景略卒以其判官任簡迪代領其任己亥以鄜坊丹延節度使劉公濟爲工部尚書以其行軍司馬裴玢代領其任二月丙午朔罷中和節宴歲儉也庚戌大雷震雨雹三月甲申以吐蕃贊普卒廢朝己亥以國子祭酒趙昌爲安南都護御史大夫本管經略使夏四月辛酉太子賓

客齊抗卒丙寅吐蕃使臧河南觀察使論乞毋等五十四人來朝
貢陳許節度賜號忠武軍五月甲戌朔御宣政殿乙亥以史館修撰
秘書監張薦爲工部侍郎兼御史大夫充入吐蕃吊祭使七月癸酉
朔大雨雹辛卯福建觀察使柳冕奏置萬安監牧於泉州界置群牧
五悉索部內馬牛羊近萬頭匹監吏主之八月戊申以房州刺史鄒
士美爲黔中觀察使己未以昭義兵馬使盧從史爲檢校工部尚書
兼潞州長史昭義軍節度澤潞磁邢洛觀察使九月庚辰賜群臣宴
於馬璘山池冬十月甲辰於景州南皮縣置唐昌軍辛亥易定節度
使張茂昭來朝十一月丁酉以監察御史李程秘書正字張聿藍田
縣尉王涯並爲翰林學士十二月吐蕃南詔日本國並遣使朝貢庚
午以桂管防禦使顏証爲桂州刺史桂管觀察使

二十一年春正月辛未朔御含元殿受朝貢是日上不康丙子以浙東
觀察判官凌準爲翰林學士癸巳會群臣於宣政殿宣遺詔皇太子
宜於柩前即位是日上崩於會寧殿享壽六十四甲午遷神主太極

殿丙申發喪群臣縞素皇太子即位永貞元年九月丁卯群臣上謚曰神武孝文廟號德宗十月己酉葬于崇陵昭德皇后王氏祔焉

史臣曰德宗皇帝初總萬機勵精治道思政若渴視民如傷凝旒延納於讜言側席思求於多士其始也去無名之費罷不急之官出永巷之嬪嬙放文單之馴象減太官之膳誠服玩之奢解鷹犬而放伶倫止摧酤而絕貢奉百神咸秩五典克從御正殿而策賢良輟廷臣而治畿甸此皆前王之能事有國之大猷率是而行夫何敢議加以天才秀茂文思雕華麗翰金鑒無愧淮南之作屬辭鈇槩何慙隴坻之書文雅中興夔高前代二南三祖豈盛於茲然而王霸迹殊淳醅代變揆時而理斟酌斯難苟於交喪之秋輕取鄙夫之論歷觀近世靡不敗亡德宗在藩齒胄之年曾爲統帥及出震承乾之日頗負經綸故從初罷郭令戎權非次聽楊炎謬計遂欲混同華裔束縛奸豪南行襄漢之誅北舉恒陽之伐出車雲擾命將星繁罄國用不足以餽軍竭民力未聞于破賊一旦德音掃地愁歎連薨果致五盜僭擬於

天王二朱憑凌於宗社奉天之窘可爲涕零罪已之言補之何益所
賴忠臣戮力否運再昌雖知非竟逐於楊炎而受佞不忘於盧杞用
延賞之私怨牽李晟之兵符取延齡之奸謀罷陸贄之相位知人則
哲其若是乎貞元之辰吾道窮矣

贊曰聰明文思惟睿作聖保姦傷善聽斷不令御曆三九適逢天幸
賜宴之辰徒矜篇咏

唐書本紀卷第十三

唐書本紀卷十四

劉

昉

大等修

聞人詮校刻沈桐

順宗

憲宗上

順宗至德大聖大安孝皇帝諱誦德宗長子母昭德皇后王氏上元二年正月生於長安之東內大曆十四年六月封宣王建中元年正月丁卯立爲皇太子貞元二十一年正月癸巳德宗崩丙申卽位於太極殿上自二十年九月風病不能言暨德宗不豫諸王親戚皆侍醫藥獨上卧病不能侍德宗彌留思見太子涕咽久之大行發喪人情震懼上力疾衰服見百寮於九仙門旣卽位知社稷有奉中外始安庚子群臣上書請聽政二月辛丑朔甲申以河陽三城行軍司馬元韶爲懷州刺史河陽懷州節度使丙午罷翰林醫工相工占星射覆冗食者四十二人已酉以易定張茂昭兼同平章事以來朝故寵之是夜太白犯昴辛卯以吏部郎中韋執誼爲尚書右丞相同中書

門下平章事辛酉貶京兆尹李實通州長史尋卒壬子淄青李師古以兵寇滑之東鄙聞國喪也甲寅釋仗內囚嚴懷志呂溫等一十六人平涼之盟陷蕃久之得還以習蕃中事不欲令出外故囚之伏內至是方釋之日本國王并妻還蕃賜物遣之壬寅以太子侍書翰林待詔王伾爲左散騎常侍充翰林學士以前司功叅軍翰林待詔王叔文爲起居舍人充翰林學士以鴻臚卿王權爲京兆尹甲子御丹鳳樓大赦天下諸道除正勅率稅外諸色摧稅並宜禁斷除上供外不得別有進奉百姓九十已上賜米二石絹兩疋版授上佐縣君仍令本部長吏就家存問百歲已上賜米五石絹二疋綿一屯羊酒版授下州刺史郡君戊辰以開府儀同三司檢校太尉使持節大都督鷄林州諸軍事鷄林州刺史上柱國新羅王金重熙兼寧海軍使以重熙母和氏爲太妃妻朴氏爲妃三月庚午出宮女三百人于安國寺又出掖庭教坊女樂六百人于九仙門召其親族歸之戊寅以韋臯兼檢校太尉李師古劉濟兼檢校司空張茂昭司徒丙戌檢校司

空同平章事杜佑爲度支鹽鐵使戊

子徐州節度賜名武寧軍蔡州

吳少誠兼同平章事以翰林學士王

叔文爲度支鹽鐵轉運使副杜

佑雖領使名其實叔文專摠宰相賈

耽兼檢校司空鄭瑜吏部尚

書高郢刑部尚書常執誼中書侍郎

鎮翼王士真淮南王鐔魏博田

季安皆檢校司空癸巳詔冊廣陵郡

王淳爲皇太子改名純夏四月

壬寅制第十弟諤封欽王第十一弟

誠封珍王男建康郡王渙封邺

王改名經洋川郡王沔封均王改名

緯臨淮郡王洵封淑王改名

縱弘農王浚封莒王改名紆漢東都

王沭封密王改名綱晉陵郡王

湜封郇王改名約雲安郡王滋封宋

王改名結宣城郡王淮封集王

改名緄德陽郡王滑封翼王改名綵

河東郡王浥封和王改名綺十

七男絢封衡王十九男纁封會王二

十男綰封福王二十一男紘封

撫王二十三男緄封岳王二十四男

紳封袁王二十五男綸封桂王

二十七男縉封翼王彌臣國嗣王道

勿禮封彌臣國王西平郡王晟

男左羽林大將軍愿襲封岐公食邑三千戶戊申詔以冊太子禮畢

赦京城繫囚大辟降從流以下減一等以給事中陸質中書舍人
崔樞並爲太子侍讀庚戌封太子男寧寬有察寰寮等六人爲郡王
並食邑三千戶癸丑贈入吐蕃使工部侍郎兼御史大夫張薦禮部
尚書丙寅罷萬安監牧戊辰以杭州刺史韓臯爲尚書右丞五月己
巳以右金吾衛大將軍范希朝爲右神策統軍充左右神策京西諸
城鎮行營兵馬節度使丁丑以邕管經畧使韋丹爲河南少尹以萬
年縣令房啓爲容管經畧招討使癸未以郴州司馬鄭餘慶爲尚書
左丞甲辰以檢校司空忽汗州都督渤海國王大嵩璘檢校司徒丞
徽王氏趙氏可昭儀崔氏楊氏可充儀王氏可昭媛王氏可昭容牛
氏可修儀張氏可美人以右丞韓臯爲鄂岳沔蘄都團練觀察使丁
亥昇襄州爲大都督府臨漢縣仍徙于鄧城辛卯以鹽鐵轉運使副
王叔文爲戶部侍郎六月丙申詔二十一年十月己前百姓所欠諸
色課利租賦錢帛共五十二萬六千八百四十一貫石匹束並宜除
免七月戊辰朔吐蕃使論悉諾來朝貢丙子鄆州李師古加檢校侍

中贈故忠州別駕陸贄兵部尚書謚曰宣贈故道州刺史陽城爲左散騎常侍戊寅以戶部侍郎潘孟陽爲度支鹽鐵轉運使副丙戌關東蝗食田稼癸巳橫海軍節度使滄州刺史程懷信卒以其子副使執恭起復滄州刺史橫海軍節度使甲子度支使杜佑奏太倉見米八十萬石貯來十五年東渭橋米四十五萬石支諸軍皆不悅今歲豐阜請權停北河轉運於濱河州府和糴二百萬石以救農傷之弊乃下百寮議議者同異不決而止乙未詔朕承九聖之列荷萬邦之重顧以寡德涉道未明虔恭寅畏懼不克荷恐上墜祖宗之訓下貽卿士之憂夙夜祗勤如臨淵谷而積疾未復至于經時怡神保和常所不暇求惟四方之大萬務之殷不躬不親慮有曠廢加以山陵有日霖潦踰旬是用儆于朕心以荅天戒其軍國政事宜令皇太子勾當時上又疾不復延納宰臣共論大政事無巨細皆決于李忠言王伾王叔文物論喧雜以爲不可藩鎮屢上牋於皇太子指三豎之撓政故有是詔以太常卿杜黃裳爲門下侍郎左金吾衛大將軍袁滋爲

中書侍郎並同中書門下平章事鄭珣瑜爲吏部尚書高郢刑部尚書並罷知政事皇太子見百寮於朝堂丙申皇太子於麟德殿西亭見奏事官八月丁酉朔庚子詔惟皇天佑命烈祖誕受方國九聖諸祉萬邦咸休肆予一人獲纘丕業嚴恭守位不遑暇逸而天佑不降疾恙無瘳將何以奉宗廟之靈展郊禋之禮疇咨庶尹對越上玄內媿于朕心上畏于天命夙夜祇慄深惟永圖一日萬機不可以久曠天工人代不可以久遠皇太子純睿哲溫文寬和仁惠孝友之德愛敬之誠通乎神明格于上下是用皇王至公之道遵父子傳歸之制付之重器以撫兆人必能宣祖宗之重光荷天地之休命奉若成憲永綏四方宜令皇太子即皇帝位朕稱太上皇居興慶宮制稱誥辛丑誥有天下傳歸於子前王之制也欽若大典斯爲至公式揚耿光用體文德朕獲奉宗廟臨御萬方降疾不瘳庶政多闕乃命元子代予守邦爰以令辰光膺冊禮宜以今月九日冊皇帝於宣政殿國有大命恩俾惟新宜因紀元之慶用覃在宥之澤宜改貞元二十一年

爲永貞元年自貞元二十一年八月五日已前天下死罪降從流以下遞減一等誥立良娣王氏爲太上皇后良媛董氏爲太上皇德妃王寅貶右散騎常侍王伾爲開州司馬前戶部侍郎度支監鐵轉運使王叔文爲渝州司戶元和元年正月丙寅朔皇帝率百寮上太上皇尊號曰應乾聖壽甲申太上皇崩於興慶宮之咸寧殿享年四十六歲六月乙卯皇帝率群臣上太行太上皇謚曰至德大聖大安孝皇帝廟號順宗秋七月壬申葬于豐陵

史臣韓愈曰順宗之爲太子也留心藝術善隸書德宗工爲詩每賜大臣方鎮詩制必命書之性寬仁有斷禮重師傅必先致拜從幸奉天賊泚逼迫常身先禁旅乘城拒戰督勵將士無不奮激德宗在位歲久稍不假權宰相左右倖臣如裴延齡李齊運常渠等因間用事刻下取功而排陷陸贄張滂輩人不敢言太子從容論爭故卒不任延齡渠等爲相嘗侍宴魚藻宮張水嬉綵艦雕靡宮人引舟爲擢歌絲竹間發德宗歡甚太子引詩人好樂無荒爲對每於敷奏未嘗

以顏色假借宦官居儲位二十年天下陰受其賜惜乎寢疾踐祚近習弄權而能傳政元良克昌運祚賢哉

憲宗上

憲宗聖神章武孝皇帝諱純順宗長子也母曰莊憲王太后大曆十三年二月生于長安之東內六七歲時德宗抱置膝上問曰汝誰子在吾懷對曰是第三天子德宗異而憐之貞元四年六月封廣陵王順宗即位之年四月冊爲皇太子七月乙未權勾當軍國政事八月丁酉朔授內禪乙巳即皇帝位於宣政殿先是連月霖雨上即位之日晴霽人情忻悅丙午昇平公主進女口十五人上曰太上皇不受獻朕何敢違其還郭氏丁未始御紫宸對百寮已酉以道州刺史路恕爲豈管經畧使庚戌荆南獻龜二詔曰朕以寡昧纂承丕業永思理本所宜惟賢至如嘉禾神芝奇禽異獸蓋王化之虛美也所以光武形於詔令春秋不書祥瑞朕誠薄德思及前人自今已後所有祥瑞但令准式申報有司不得上聞其奇禽異獸亦宜停進癸丑劔南西

川節度使檢校太尉中書令南康郡王韋臯薨甲寅以常州刺史
穆贇爲宣歙池觀察使以前宣歙觀察使崔衍爲工部尚書已未
以中書侍郎平章事袁滋爲劍南東西兩川山南西道安撫大使
時韋臯卒劉闢據蜀邀節鉞故也辛酉太上皇誥冊良娣王氏爲
太上皇后癸亥以朝請大夫守尚書左丞輕車都尉賜紫金魚袋
鄭餘慶同中書門下平章事丙寅以饒州刺史李吉甫爲考功郎
中夔州刺史唐次爲吏部郎中並知制誥九月丁卯朔己巳罷教
坊樂人授正員官之制辛未河陽三城節度使元韶卒癸酉以陳
州刺史孟元陽爲懷州刺史河陽三城孟懷節度使丙子勅申光
蔡陳許兩道比遭亢旱宜加賑恤申光蔡賑米十萬石陳許五萬
石丁丑前戶部侍郎蔡弁卒襄州于頔進鷹詔還之己卯京西神
策行營節度行軍司馬韓泰貶撫州刺史司封郎中韓曄貶池州
刺史禮部員外郎柳宗元貶召州刺史史屯田員外郎劉禹錫貶連
州刺史坐交王叔文也辛巳給事中陸贄卒冬十月丙申朔丁酉

集百寮發曾太皇太后沈氏哀於肅章門外檢校司空兼左僕射
同中書門下平章事魏國公賈耽卒戊戌以宰臣劔南安撫使袁
滋檢校吏部尚書同中書門下平章事成都尹劔南西川節度觀
察等使以西川行軍司馬劉闢爲給事中舒王誼薨庚子南詔使
趙迎寬來赴山陵浙東觀察使賈全卒辛丑吐蕃使論乞縷貢助
山陵金銀衣服太常上大行曾太皇太后沈氏謚曰睿真皇后丙
午以華州刺史楊於陵爲越州刺史浙東觀察使丁未改桂州純
化縣爲募化縣蒙州純義縣爲正義縣己酉葬德宗皇帝于崇陵
甲寅以刑部尚書高郢爲華州刺史潼關防禦鎮國軍使御史中
丞李鄲爲京兆尹貶京兆尹王權爲雅王傅父兩京師鹽賈出庫
鹽二萬石糴以惠民乙巳祔睿真皇后神主德宗皇帝神主于太
廟壬申貶正議大夫中書侍郎平章事韋執誼爲崖州司馬以交
王叔文也潤池揚楚湖杭睦江等州旱貶劔南西川節度使袁滋
爲吉州刺史以其慰撫三川逗留不進故也以左驍衛將軍李演

爲夏州刺史夏綏銀等州節度使以右庶子武元衡爲御史中丞己卯再貶撫州刺史韓泰爲虔州司馬河中少尹陳諫台州司馬召州刺史柳宗元爲永州司馬連州刺史劉禹錫朗州司馬池州刺史韓曄饒州司馬和州刺史凌準連州司馬岳州刺史程异柳州司馬皆坐交王叔文初貶刺史物議罪之故再加貶竄辛巳宣撫和林郢索繼七州旱壬午吏部尚書鄭珣瑜卒甲申以湖南觀察使楊憑爲洪州刺史江西觀察使以虢州刺史薛苹爲潭州刺史湖南觀察使鄂岳觀察等州旱癸巳宣歙觀察使穆贇卒十二月丙申朔庚子以東都留守韋夏卿爲太子少保以兵部尚書王召爲東都留守壬寅改淳州爲蠻州還淳縣爲青溪縣淳風縣爲從化縣姓淳于者改姓于甲辰襄陽于頔加平章事丙申月犯畢巳酉以新除給事中西川行軍司馬劉闢爲成都尹劔南西川節度使歲星犯太微西垣庚戌金州復析漢陰縣置石泉縣壬子以右諫議大夫韋丹爲梓州刺史克劔南東川節度使以常州刺史路應爲宣州刺史宣歙池觀察使壬

成以朝請大夫守中書舍人翰林學士上柱國鄭綱爲中書侍郎同平章事集賢殿學士以考功郎中知制誥李吉甫爲中書舍人以考功員外郎裴垍爲考功郎中知制誥並充翰林學士

元和元年春正月丙寅朔皇帝率群臣於興慶宮奉上太上皇尊號曰應乾聖壽太上皇丁卯御含光殿受朝賀禮畢御丹鳳樓大赦天下改元曰元和自正月二日昧爽已前大辟罪已下常赦不原者咸赦除之辛未以鄂岳沔觀察使韓臯爲鄂岳蘄安黃等州節度使丁丑太子少保常夏卿卒辛未以興元元從功臣右神策護軍使副薛盈軫爲右神策護軍中尉壬午成德軍節度使檢校司空王士真同中書門下平章事癸未詔以太上皇舊恙愆和親侍藥膳起今月十六日已後權不聽政以左神策長武城防秋都知兵馬使高崇文檢校工部尚書充神策行營節度使甲申太上皇崩于興慶宮遷殯于太極殿發喪乙酉宰相杜佑攝冢宰杜黃裳爲禮儀使右僕射伊慎大明宮留守視事於尚書省壬辰復置斜谷路館驛戊子制劍南西川

疆界素定藩鎮守備各有區分頃因元臣薨謝隣藩不睦劉闢乃因
虛構隙以忿結讎遂勞王軍蕪害百姓朕志存含垢務歆女人遣使
諭宣委之旄鉞如聞道路擁塞未息干戈輕肆攻圍擬圖吞併為君
之體義在勝殘命將興師蓋非獲已宜令興元嚴礪東川李康掎角
應接神策行營節度使高崇文神策兵馬使李元奕率步騎之師與
東川興元之師類會進討其糧料供餉委度支使差官以聞甲午高
崇文之師由斜谷路李元奕之師由駱谷路俱會于梓潼辛卯群臣
請聽政二月乙未朔以度支郎中寬敬為山劔行營糧料使嚴礪奏
收劔州乙丑入朝奚王梅落可銀青光祿大夫檢校司空封饒樂郡
王放還蕃癸卯贈宣武軍節度使陸長源為右僕射贈故吉州刺史
姜公輔禮部尚書甲辰以錢少禁用銅器癸丑以魏博田季安同平章
事戊戌謂宰臣曰前代帝王或怠于聽政或躬決繁務其道如何杜
黃裳對曰帝王之務在於脩己簡易擇賢委任宵旰以求民瘼捨已
從人以厚下固不宜怠肆安逸然事有綱領小大常務知其遠者大者

至如簿書訟獄百吏能否本非人主所自任也昔秦始皇自程決事見嗤前代諸葛亮王霸之佐二十罰以上皆自省之亦為敵國所誚知不久堪魏明帝欲省尚書擬事陳矯言其不可隋文帝日昃聽政令衛士傳餐文皇帝亦笑其煩察為人主之體固不可代下司職但擇人委任責其成効賞罰必信誰不盡心傳稱帝舜之德曰夫何為哉恭已南面而已誠以能舉十六相去四兇也豈與勞神疲體自任耳目之主同年而語哉但人主常勢患在不能推誠人臣之弊患在不能自竭由是上疑下詐礼貌或虧欲求致理自然難致苟無此弊何患不至於理上稱善久之以京兆尹李鄴為尚書右丞以金吾大將軍鄭雲逵為京兆尹三月乙丑朔戊辰詔常叅官寒食拜墓在畿內聽假日往還他州府奏取進止辛未御史中丞武元衡奏中書門下御史臺五品已上官尚書省四品已上諸司正三品已上從二品職事官東都晉守轉運鹽鐵節度觀察使團練防禦招討經畧等使河南尹同華州刺史諸衛諸軍三品已上官除授皆入閣謝其餘官許於宣

政南班拜訖便退詔曰如此例中有加使及職掌並准此又兵部吏部禮部貢院官員每舉選限內有十月至二月不奉朝參若稱事繁則中書門下御史臺度支京兆府公事至重朝謁如常況旬節已賜歸休又許分日一月之內總奉十日朝參甚暑甚寒又蒙矜放臣求故實以為王顏任中丞日嘗論其事舉對甚詳伏請准貞元十二年四月二十七日勅永為常式從之丙子嚴礪收梓州丁丑制削奪劉闢在身官爵先是韓全義入朝令其甥楊惠琳知晉後俄有詔除李演為節度代全義演赴任惠琳據城叛詔發河東天德兵誅之辛巳夏州兵馬使張承金斬惠琳傳首以獻壬辰大行太上皇德妃董氏卒以右神策行營節度高崇文檢校兵部尚書梓州刺史劔南東川節度戊戌以安南經畧副使張舟為安南都護本管經畧使己亥以前劔南東川節度使韋丹為晉絳觀察使壬寅以前安南經畧使趙昌為廣州刺史嶺南節度使癸卯前嶺南節度使徐申卒丙午命宰臣監試制舉人於尚書省以制舉人先朝所徵不欲親試也丁未以

檢校司空平章事杜佑為司徒所司備礼冊拜平章事如故罷領度支鹽鐵轉運等使從其讓也仍以兵部侍郎李巽代領其任戊申以隴右經畧使秦州刺史劉灘為保義軍節度使賑浙東米十萬石已未武元衡奏常叅官兼御史大夫中丞者准檢校省官例立在本品同類之上壬戌郇王約薨武元衡奏正衙待制官本置此官以備問比來正衙多不奏事自今後請以尚書省六品以上職事官東宮師傅賓詹王傳等每坐日令兩人待退朝詔於延英候對從之五月甲子朔丁卯京兆尹鄭雲逵卒辛未以兵部侍郎常武為京兆尹兼御史大夫壬申貶劔南東川節度使李康為雷州司馬陳許蔡等州旱以橫海軍留後程執恭橫海軍節度使庚辰左丞同平章事鄭餘慶為太子賓客罷知政事辛卯冊太上皇后王氏為皇太后六月癸巳朔以冊太后礼畢赦天下繫囚死罪降從流流以下遞減一等文武内外官加母邑號太后諸親量與優給丙子冊德宗元容武氏為崇陵德妃大風折樹丁酉高宗文破賊萬人於鹿頭關加幽州劉濟侍中

淄清李師古檢校司徒癸卯高崇文收漢州閏六月壬子朔淄青李師古卒戊辰以祕書監董叔經為京兆尹壬午諫議大夫去左右字只置四員以前司封員外郎常況為諫議大夫甲申吐蕃論勃藏來朝首秋七月壬辰朔壬寅葬順宗于豐陵己酉太子少保致仕韓全義卒八月辛酉朔癸亥以左衛大將軍李愿檢校礼部尚書夏州刺史元夏綏銀節度使甲子郇王母王昭儀宋王母趙昭儀郟王母張昭訓衡王母閻昭訓等各以其王並為太妃以許氏為美人尹氏段氏為才人潯陽公主母崔昭訓為太妃韓全義子進女樂八人詔還之丁卯封王子平原郡王寧為鄧王同安郡王寬為澧王延安郡王宥為遂王彭城郡王察為深王高密郡王蒙為洋王文安郡王寮為絳王第十男審為建王己巳以建王審為鄆州大都督平盧淄青節度使以節度副使李師道權知鄆州事元節度畱後乙亥冊妃郭氏為貴妃靈武李柰奏黃河岸塌處得古錢三千三百其形小方孔三足壬午左降官韋執誼韓泰陳諫柳宗元劉禹錫韓曄凌準程异等八

人縱逢恩赦不在量移之限癸未京兆尹董叔經卒甲申御史臺奏
常叅官在城未上及在外未到假故等在外未到計水陸程外滿百
日並停解從之丙戌以尚書右丞李鄘爲京兆尹九月辛卯朔癸卯
詔自今後兩省官每坐日一人對丙午以太子賓客鄭餘慶爲國子
祭酒辛亥高崇文奏收成都擒劉闢以獻癸丑以山人李渤爲左拾
遺徵不至甲子易定張茂昭來朝丙寅以劔南東川節度使檢校兵
部尚書梓州刺史封渤海郡王高崇文檢校司空兼成都尹御史大
夫充劔南西川節度副大使知節度事管內度支營田觀察使處置
統押近界諸蠻及西山八國兼雲南安撫等使仍改封南平郡王食
邑三千戶戊戌以山南西道節度使嚴礪爲梓州刺史劔南東川節
度使以將作監柳晟檢校工部尚書兼興元尹充山南西道節度使
庚辰以吉州刺史袁滋爲御史大夫充義成軍節度使壬午以淄青
節度使留後李師道檢校工部尚書兼鄆州大都督府長史充平盧
淄青節度副大使知節度事丙戌以渤海國王太高璘檢校太尉戊

子斬劉闢并子超郎等九人於獨柳樹下十一月庚寅朔己巳以簡
王傅王權爲河南尹丁未以司農卿李上公爲陝州大都督府長史
充陝虢觀察使甲申以武寧軍節度張愔爲工部尚書以東都留守
王召檢校右僕射兼徐州刺史武寧軍節度使徐泗濠等州觀察等
使庚戌以吏部侍郎趙宗儒爲東都留守東畿汝防禦使以國子祭
酒鄭餘慶爲河南尹甲寅以給事中劉宗經爲華州刺史潼關防禦
鎮國軍等使丙辰以內常侍吐突承璀爲神策護軍中尉十二月丙申
朔太上奏隱太子章懷懿德節閔惠莊惠文惠靖恭昭靖以下九太
子陵代數已遠官額空存今請陵戶外並停乙亥工部尚書張愔卒
丙戌新羅渤海特柯迴紇各遣使朝貢二年春正月己丑朔上親獻
太清宮太廟辛卯祀昊天上帝于郊丘是日還宮御丹鳳樓大赦天
下先是將及大禮陰晦浹辰宰臣請改日上曰郊廟事重齋戒有日
不可遽更享獻之辰景物晴霽人情忻悅丁酉司徒杜佑辭知政事
詔令每月三度入朝便於中書商量政事庚子迴紇請于河南府太

原府置摩尼寺許之乙巳以門下侍郎同平章事南陽郡開國公杜
黃裳檢校司空同平章事兼河中尹河中晉絳等州節度使停諸
陵畱守已卯以戶部侍郎賜緋魚袋武元衡爲門下侍郎同平章
事賜紫金魚袋以中書舍人翰林李士李吉甫爲中書侍郎同平
章事丁巳停中和重陽二節賜宴其上巳宴仍舊賜之二月辛酉
詔僧尼道士全隸左右街功德使自是祠部司封不復關奏丙寅
左右羽林軍應管月番飛騎總五千六百一十三人並停已巳起
居舍人鄭隨次對面受進止令宣與省供奉官自今已後有事即
進狀次對官宜停庚午司天造新曆成詔題爲元和觀象曆壬申
夜月掩歲星丁丑寒食節宴羣臣於麟德殿賜物有差壬午以第五
國軫爲右神策軍中尉三月辛卯賜羣臣宴於曲江亭癸卯判度
支李巽爲兵部尚書依前判度支鹽鐵轉運使夏四月甲子禁鉛錫
錢以右金吾衛大將軍范希朝爲檢校司空靈州長史朔方靈鹽
節度使戊寅近置英武軍額宜停庚辰領南節度使趙昌進瓊

管僉振萬安六州六十二洞歸降圖六月丁巳朔始置百官待漏院
於建福門外故事建福望仙等門昏而閉五更而啓與諸坊門同時
至德中有吐蕃囚自金吾仗亡命因勅晚開門宰相待漏於太僕寺
車坊至是始令有司據班品置院戊午鳳翔節度使張敬則卒乙丑
五坊色役戶及中書門下兩省納課陪廚戶及捉錢人並歸府縣色
役已巳停舒廬滁和四州團練使額癸丑東都莊宅使織造戶並委
府縣收管乙亥停潤州丹陽軍額丙子左神策軍新築夾城置玄化
門晨耀樓辛巳以京兆尹李鄴爲鳳翔尹鳳翔隴右節度使蔡州水
平地深七八尺秋七月丙戌朔勅刑部侍郎許孟容等刪定開元格
後勅丁亥勅外命婦朝謁皇太后多有前却今後諸親委宗正寺百
官毋妻委臺司如有違越者天子奪一月俸頻不到有司具狀奏聞
戊子錄配享功臣之後得蘇瓌孫繫用爲京兆府司錄崔玄暉孫元
方張說孫懿並爲監察御史狄仁傑桓玄範爲右拾遺敬暉孫元亮
表恕已孫德師相次叙用癸巳太僕寺丞令狐丕進亡父岍所撰代

宗實錄四十卷詔贈岷工部尚書八月丙辰朔辛酉擢武元衡兼判
戶部事壬戌刑部奏改律卷第八爲鬪競律甲子以職方員外郎王
絮爲嶺南選補使監察御史崔元方監之甲戌中書奏先停諸道奏
祥瑞伏以所獻祥瑞皆緣臘饗告廟元會暴聞今後諸大瑞隨表聞
奏中瑞下瑞申有司其元日奏祥瑞請依令式從之辛巳封杜黃裳
爲邠國公于頔爲燕國公沒蕃僧惟良闡等四百五十人自蕃中還
九月乙酉密王綢薨十月巳酉以浙西節度使李錡爲左僕射以御
史大夫李元素爲潤州刺史鎮海軍浙西節度使庚申李錡據潤州
反殺判官王澹大將趙琦時錡詐請入朝署澹爲繼因諷兵士亂殺
澹琦遂令蘇常杭湖睦五州戍將殺刺史修石頭故城謀欲僭逆壬
戌詔李錡屬列宗枝任居方伯窮赫奕之貴飽綢繆之恩待以親賢
報之以逆節授其師旅用之以亂常累獻表章亟請朝會初則詐疾
後乃縱兵僚佐以獻規受屠王臣以傳命見脇朕切於含垢未忍發
明累降中人令遵前旨無輒車之戒路有沴氣之滔天加以日暍淫

刑月與暴賦朕爲人父母聞甚惻然顧惟紀綱焉敢廢墜李錡在身
官爵並宜削奪以淮南節度使王諤充諸道行營招討使內官薛尚
衍爲監軍率沐徐鄂淮南宣歙之師取宣州路進討丁卯以門下侍
郎平章事武元衡檢校吏部尚書兼門下侍郎平章事成都尹充劔
南西川節度使仍封臨淮郡公將行上御安福門慰勞之癸酉潤州
大將張文良李奉僊等執李錡以獻辛巳錡從父弟宋州刺史銑通
事舍人銑坐貶嶺外十一月甲申斬李錡於獨柳樹留削錡屬籍丙
戌以擒李錡潤州牙將張文良爲左金吾衛將軍封南陽郡王田少
卿李奉僊等爲羽林將軍並封公甲辰詔司徒杜佑筋力未衰起今
後每日入中書視事十二月甲寅宰相李吉甫封贊皇侯丙辰上謂
宰臣曰朕覽國書見文皇帝行事少有過差諫臣論誣往復數四况
朕之寡昧涉道未明今後事或未當卿等每事十論不可一二而止
丁巳東都國子監增置學生一百人癸亥御史臺奏文武常參官准
乾元元年三月十四日勅如有朝堂相吊慰及跪拜待漏行立失序

語笑誼譁入衙入閣執笏不端行立遲慢立班不正趨拜失儀言語
微諠穿班穿仗出入閣門無故離位廊下飲食行坐失儀誼鬧入朝
及退朝不從正衙出入非公事入中書等每犯奪一月俸班列不肅
所由指撓猶或飾非即具聞奏貶責臣等商量於舊條每罰各減一
半所貴有犯必舉從之丙寅以劔南西川節度使高崇文檢校司空
同平章事兼邠州刺史邠寧慶節度使充京西諸軍都統壬申禮部
舉人罷試口義試墨義十條五經通五明經通六即放進士舉人曾
爲官司科罰曾任州縣小吏雖有辭藝長吏不得舉送違者舉送官
停任考試官貶黜丙子令宰臣宣勅百寮遊宴過從餞別此後所由
不得奏報務從歡泰保義軍節度使劉旌卒己卯史官李吉甫撰元
和國計簿總計天下方鎮凡四十八管州府二百九十五縣一千四
百五十三戶二百四十四萬二百五十四其鳳翔鄜坊邠寧振武涇
原銀夏靈鹽河東易定魏博鎮冀范陽滄景淮西淄青十五道凡七
十一州不申戶口每歲賦入倚辦止於浙江東西宣歙淮南江西鄂

岳福建湖南等八道合四十九州一百四十四萬戶比量天寶供稅之戶則四分有一天下兵戎仰給縣官者八十三萬然人比量天寶士馬則三分加一率以兩戶資一兵其他水旱所損徭科發歛又在常役之外吉甫都纂其事成書十卷是歲吐蕃迴紇奚契丹渤海皆柯南詔並朝貢

三年春正月癸未朔癸巳群臣上尊號曰睿聖文武皇帝御宣政殿受冊禮畢移仗御丹鳳樓大赦天下庚子涇原段祐請脩臨涇城在涇州北九十里扼犬戎之衝要詔從之戊申罷左右神威軍合爲一號天威軍二月丙申宰相李吉甫進封趙國公己丑以武昌軍節度使韋臯爲潤州刺史鎮海軍節度浙江觀察使辛未贈故布衣崔善真睦州司馬忠諫而死於李錡也癸丑以鄜坊節度使裴玢爲興元戶山南西道節度使丙子以右金吾衛大將軍路恕爲鄜州刺史鄜坊節度使戊寅咸安大長公主卒於迴紇三月癸巳郇王總薨庚子以定平鎮兵馬使宋仁偁爲四鎮北庭涇原等州節度使乙巳御宣

政殿試制科舉人夏四月癸丑中使郭里旻酒醉犯夜杖殺之金吾
薛伾巡使常紳皆貶遂賜朱仁侗名曰忠亮乙丑貶翰林學士王涯
虢州司馬時涯甥皇甫湜與牛僧孺李宗閔並登賢良方正科第三
等策語大切權倖惡之故涯坐親累貶之壬申大風毀含元殿欄檻
二十七間乙亥以嶺南節度使趙昌爲江陵尹荆南節度使以戶部
侍郎楊於陵爲廣州刺史嶺南節度使丁丑以荆南節度使裴均爲
右僕射判度支勅五月一日御殿受朝賀禮宜停己卯裴均爲尚書
省都堂上僕射其送印 呈孔目唱案授案皆尚書卽爲之文武三
品已上升階列坐四品五品及郎官御史拜於廳下然後召御史中
丞左右丞侍郎升階答拜雖修故事行之議者論其太過五月壬辰
兵部請復武舉從之甲午勅東都畿汝州都防禦使及副使宜停所
營將士三千七百三十人隨畿汝界分留守及汝州防禦使分掌之
辛丑右僕射裴均請取荆南雜錢萬貫脩尚書省從之丙午正衙冊
九姓迴紇可汗爲登囉里泊密施合毗伽保義可汗六月戊辰詔以

錢少欲設蓄錢之令先告諭天下商賈蓄錢者並令逐便市易不得
蓄錢天下銀坑不得私採癸亥以邕管將黃少卿為歸順州刺史弟
少高少溫並受官西原蠻酋也貞元中屢寇邕管至是歸款乙丑罷
江淮私堰埭二十二從轉運使奏也甲戌以河南尹鄭餘慶為東都
留守丁丑沙陀突厥七百人攜其親屬歸鎮武節度使范希朝乃授
其大首領烏勒河波陰山府都督秋七月辛巳朔日有蝕之己亥復以
度支安邑解縣兩池留後為榷鹽使丁未涪州復隸黔中道八月庚
申復置東都防禦兵七百人九月己丑淮南節度使王鐸來朝庚寅
以山南東道節度使于頔守司空同平章事以右僕射裴均檢校左僕
射同平章事襄州長史充山南東道節度使加宣武韓弘同平章事
丙申以戶部侍郎裴垪為中書侍郎同平章事戊戌以中書侍郎平
章事李吉甫檢校兵部尚書兼中書侍郎平章事揚州大都督府長
史淮南節度使以淮南節度使王鐸檢校司徒河南尹河中晉絳慈
隰節度使河中節度使檢校司空同平章事邠國公杜黃裳卒是秋

京師大雨十月己酉朔癸亥以太常卿高郢為御史大夫甲子以御史中丞竇群為湖南觀察使既行改為黔中觀察使群初李吉甫擢用及持憲反傾吉甫吉甫劾其陰事故貶之丁卯度支使下判案官以四員為定十一月甲午橫海軍節度使程執恭來朝十二月庚戌以臨涇縣為行原州命鎮將郝玘為刺史自玘鎮臨涇西戎不敢犯塞甲子南詔異牟尋卒辛未以諫議大夫段平仲使南詔弔祭仍立其子驃信直蒙閣勸為南詔是歲淮南江南江西湖南山南東道旱夏四月丙子朔戊寅國子祭酒馮伉卒壬午裴均進銀器一千五百兩以違勅付左藏庫甲申令皇太子居少陽院武功人張英奴撰迴波辭惑衆杖殺之丙申撫州山人張洪騎牛冠履獻書於光順門書不足採遺之庚子制故太尉西平郡王李晟宜編附屬籍以太常卿李元素為戶部尚書判度支以商州刺史元義方為福建觀察使甲辰以兵部侍郎權德輿為太常卿仍賜金紫以御史大夫高郢為兵部尚書以刑部郎中侍御史知雜李夷簡為御史中丞五月丙午朔

辛酉刑部尚書鄭元卒丁卯監鐵使吏部尚書李巽卒六月乙亥朔
丁丑以河東節度使李鄘爲刑部尚書充諸道鹽鐵轉運使以靈鹽節
度使范希朝爲太原尹北都留守河東節度使以右衛上將軍王泌
爲靈州大都督府長史靈鹽節度使辛丑五嶺已北銀坑任人開採
禁錢不過嶺南秋七月乙巳朔御制前代君臣事迹十四篇書於六
扇屏風是月出書屏以示宰臣李藩等表謝之丁未渭南暴水壞廬
舍二百餘戶溺死六百人命府司賑給乙卯右羽林統軍高固卒壬
戌御史中丞李夷簡彈京兆尹楊憑前爲江西觀察使時賊罪貶憑
臨賀尉戊辰以尚書右丞許孟容爲京兆尹賜金紫八月甲戌朔癸
未兗州魚臺縣移置於黃臺市丙申安南都護張舟奏破環王國三
萬餘人獲戰象兵械并王子五十九人癸卯贈太師裴冕宜配享代
宗廟庭贈太師李晟贈太尉段秀實宜配享德宗廟庭九月甲辰朔
庚戌以成德軍都知兵馬使鎮府右司馬王承宗起復檢校工部尚
書充成德軍節度使以德州刺史薛昌朝檢校左常侍充保信軍節

度德棣等州觀察等使昌朝薛嵩之子婚於王氏時爲德州刺史朝廷以承宗難制乃割二州爲節度以授昌朝制纔下承宗以兵虜昌朝歸鎮州丁卯邠寧節度使檢校司空同平章事高崇文卒冬十月癸酉朔以右羽林統軍閻巨源爲邠州刺史邠寧慶節度使以少府監崔頴爲同州刺史本州防禦長春宮等使癸未詔成德軍節度使王承宗頃在苦廬潛窺戎鎮而内外以事君之禮叛而必誅分土之儀專則有辟朕念其先祖嘗有茂勳貸以私恩抑於公議使臣旁午以告諭孽童俯伏以陳誠願獻兩州期無二事朕亦收其後効用以曲全授節制於舊疆齒勲賢於列位况德棣本非成德所管昌朝又是承宗懿親俾撫近隣斯誠厚澤外雖兩鎮內是一家而承宗象恭懷姦肖貌稔惡欺裴武於得位之後囚昌朝於授命之中加以表疏之間悖慢斯甚義士之所興嘆天地之所不容恭行天誅盖示朝典承宗在身官爵並宜削奪以神策左軍中尉吐突承瓘爲鎮州行營招討處置等使以龍武將軍趙萬敵爲神策先鋒將內官宋惟澄曹

進玉馬朝江等爲行營館驛糧料等使京兆尹許孟容與諫官面論征伐大事不可以內官爲將帥補闕獨孤郁其言激切詔旨祇改處置爲宣慰尤存招計之名已且詔軍進討其王武俊士直墳墓軍士不得樵採其士平士則各守本官仍令士則各襲武俊之封庚寅冊鄧王寧爲皇太子癸巳以冊諸肆赦繫囚死罪降從流流以下遞降一等文武常參官外州府長官子爲父後者賜勲兩轉工部侍郎婦登給事中呂元膺爲皇太子諸王侍讀已亥吐突承璀軍發京師上御通化門勞遣之十一月癸卯朔浙西蘇潤常州旱儉賑米二萬石甲子河南尹杜羔卒已巳彰義軍節度使檢校司空同平章事吳少誠卒十二月壬申朔以戶部侍郎張弘靖爲陝府長史陝虢觀察陸運等使賜金紫以陝虢觀察使房式爲河南尹中丞李夷簡奏諸州府於兩稅外違格科率請諸道監鐵轉運度支巡院察訪報臺司以憑舉奏從之

五年春正月壬寅朔已巳浙西觀察使韓臯以杖決安吉令孫漣致

死有垂典法罰一月俸料二月辛未朔戊子禮院奏東宮殿閣名及
宮臣姓名與太子名同者改之其上臺官列王官爵土無例輒改從
之東臺監察御史元稹攝河南尹房式於臺擅令停務貶江陵府士
曹叅軍三月辛丑朔宰相杜佑與同列宴於樊川別墅上遣中使賜
酒饌乙巳以御史中丞李夷簡爲戶部侍郎判度支以兵部侍郎王
播爲御史中丞癸巳以太子賓客鄭絪檢校禮部尚書廣州刺史嶺
南節度使已未制以遂王宥爲彰義軍節度使以中州刺史吳少陽
爲申光蔡節度留後甲子大風折木丁卯宰相于頔請依杜佑例一
月三朝從之夏四月庚午朔癸酉戶部尚書李元素卒甲申鎮州行
營招討使吐突承璀執昭義節度使盧從史載從史送京師丁亥河
東范希朝奏破賊於木刀溝福州復置候官長樂二縣建州置將樂
縣壬申以昭義都知兵馬使潞州左司馬烏重胤爲懷州刺史河陽
三城懷州節度使以河陽節度使孟元陽爲潞州長史昭義軍節度
澤潞磁邢洺觀察使戊戌貶前昭義節度使盧從史爲驩州司馬五

月庚子朔乙巳昭義軍三千人夜潰奔魏州右神策軍使段祐卒庚申吐蕃使論思即熱朝貢并歸鄭叔矩路泌之柩六月庚午朔戊寅以太府卿李少和爲洪州刺史江西觀察使奚迴紇室韋寇振武癸巳應給食實封例節度使兼宰相每食實封百戶歲給八百端匹若是緡加給綿六百兩節度使不兼宰相每百戶給百匹軍使諸衛大將軍每百戶給三百五十端匹秋七月己亥朔庚子王承宗遣判官崔遂上表自首請輸常賦朝廷除授官吏丁未詔昭洗王承宗復其官爵待之如初諸道行營將士共賜物二十八萬四百三十端匹時招討非其人諸軍解體而藩隣觀望養寇空爲逗撓以弊國賦而李師道劉濟亟請昭雪乃歸罪盧從史而有承宗不得已而始也幽帥劉濟加中書令魏博田季安加司徒淄青李師道加僕射並以罷兵加賞也乙卯幽州節度使劉濟爲其子總鵠死庚申以虔州刺史馬總爲安南都護本管經略使八月乙巳朔乙亥上顧謂宰臣曰神仙之事信乎李藩對曰神仙之說出於道家所宗老子五千文爲本老子

指歸與經無異後代好怪之流假託老子神仙之說故秦始皇遣坊
載童女入海求仙漢武帝嫁女與方士求不死藥二主受惑卒無所
得文皇帝服胡僧長生藥遂致暴疾不救 古詩云服食求神僊多
爲藥所誤誠哉是言也君人者但務求理四海樂推社稷延永自然
長年也上深然之以浙東觀察使薛苹爲潤州刺史浙西觀察使以
常州刺史李遜爲越州刺史浙東觀察使以都官郎中韋貫之爲中
書舍人起居舍人裴度爲司封員外郎知制誥癸巳以鄧州刺史
崔詠爲邕州刺史本管經略使九月戊戌朔辛亥以吐突承璀復
爲左軍中尉諫官以承璀建謀討伐無功請行朝典上宥之降承
璀爲軍器使乃以內官程文幹爲左軍中尉壬戌以瀛州刺史劉
總起復受幽府長史充幽州盧龍軍節度使癸亥以兵部尚書高
郢爲右僕射致仕景寅制以正義大夫守太常卿上柱國襄武縣
開國侯賜紫金魚袋權德輿可守禮部尚書同中書門下平章事
丁卯翰林李士獨孤郁守本官起居以棲權德輿在中書避嫌也

冬十月戊辰朔以京兆尹許孟容爲兵部侍郎以中丞王播代孟容
又以呂元膺代播昇平大長公主薨唐丞相裴垪進所撰德宗實
錄五十卷賜垪錦綵三百足銀器等史官蔣武常處厚等頒賜有差
辛巳定州將楊伯玉誘三軍爲亂拘行軍司馬任迪簡別將張佐元
殺伯玉迪簡謀歸朝三軍懼乃殺佐元壬辰制以迪簡檢校工部尚
書定州長史元義武軍節度觀察北平軍等使甲午以前義武軍節
度檢校太尉兼太子太傅同平章事張茂昭檢校太尉兼中書令河
中尹充河中晉絳慈隰節度使十一月戊戌朔浙西奏當鎮舊有丹
陽軍今請併爲鎮海軍從之庚子右金吾衛大將軍伊慎降爲右衛
將軍以行賂三十萬與中尉第五從直求爲河東節度故也甲辰會
王纁卒庚戌以前河中節度使王鐸檢校司空兼太子太傅太原尹
北都留守河東節度使以代州刺史阿跌光進爲單于大都護振武
麟勝節度度支營田觀察押蕃落等使庚申以中書侍郎平章事裴
垪爲兵部尚書以前保信軍節度使德州刺史薛昌朝爲右武衛將

軍前爲王承宗虜之囚於鎮州至是歸朝故也丙寅吏部郎中柳公綽獻太醫箴上深喜納遣中使撫勞之十二月丁卯朔癸酉諸道鹽鐵轉運使刑部尚書李鄘檢校吏部尚書蕪楊府長史元淮南節度使以河南尹房式爲宣州刺史宣歙池觀察采石軍等使以前宣歙觀察使盧坦爲刑部侍郎元諸道鹽鐵轉運使壬午以吏部郎中柳公綽爲御史中丞以前御史中丞呂元膺爲鄂州刺史鄂黃岳沔蘄安黃等州觀察使以鄂岳觀察使郝士美爲河南尹新授諫議大夫蔣武請改名又以吏部侍郎崔郊爲太常卿

六年春正月丙申朔丙申以彰義軍留後吳少陽檢校工部尚書元彰義軍節度申光蔡等州觀察使勅諫議大夫子璠簡給事中劉伯芻工部侍郎歸登右補闕蕭俛等於豐泉寺翻譯大乘本生心地觀音經庚申以淮南節度使中書侍郎同平章事趙國公李吉甫復知政事集賢殿大學士監脩國史二月丙寅朔壬申門下侍郎同平章事李藩爲太子詹事藩與吉甫不叶吉甫旣用事故罷藩相位丙子河

中節度使檢校太尉中書令張茂昭卒以太府卿裴次元爲福建觀察使已丑忻王造亮癸巳以陝虢觀察使張弘靖檢校禮部尚書河中尹晉絳慈等州節度使以右丞衛次公爲陝府長史陝虢觀察使以中書舍人翰林學士李絳爲戶部侍郎以京畿民貧貸常平義倉粟二十四萬石諸道州府依此賑貸三月乙未朔以河南尹紆士美檢校工部尚書兼潞府長史昭義軍節度使丁未以檢校右僕射嚴綬爲江陵尹荆南節度使河東舊使錫錢民頗爲弊宜於蔚州置五廬鑄錢乙卯畿內軍鎮牧放駙馬貴族略獲並不得帶兵仗恐雜盜也夏四月乙丑朔戊辰兵部尚書裴垪爲太子賓客以諫議大夫裴堪爲同州防禦使庚午以戶部侍郎判度支李夷簡檢校禮部尚書襄州大都督府長史山南東道節度使以刑部侍郎鹽鐵轉運使盧坦爲戶部侍郎判度支京兆尹王播爲刑部侍郎充諸道鹽鐵轉運使以福建觀察使元義方爲京兆尹癸酉以張茂昭家妓四十七人歸定州已卯月近房以前荆南節度使趙宗儒刑部尚書東都留守

鄭餘慶爲兵部尚書依前晉守王播奏江淮河嶺已南充鄆等鹽院
元和五年都收賣鹽價錢六百九十八萬五千五百貫校量未改法
已前四倍攢估虛錢一千七百四十六萬三千七百貫除鹽本外付
度支收管從之辛卯戶部奏置巡官五月甲午朔取受王承宗錢物
人品官王伯恭杖死庚子以左金吾衛將軍李惟簡檢校戶部尚書
鳳翔尹隴右節度使丙午前山南東道節度使檢校左僕射平章事
裴均卒壬子以振武節度阿跌光進夙彰誠節久立茂勲宜賜姓李
氏弟洛州刺史光顏已從別勅處分六月甲子朔減教坊樂人衣糧
丁卯中書門下奏官省則事省事省則人清官煩則事煩事煩則人
濁清濁之由在官之煩省國家自天寶已後中原宿兵見在軍士可
使者八十餘萬其餘浮爲商賈度爲僧道雜入色役不歸農桑者又
十有五六則是天下常以三分勞筋苦骨之人奉七分坐衣待食
之輩今內外官給俸料者不下一萬余員其間有職出異名奉離本
局府寺曠廢簪組因循者甚衆况歛財日寡而授祿至多設官有限

而入色無數九流安得不雜萬物安得不煩漢初置郡不過六十文
景釀化百王莫先則官少不必政紊郡多不必事理今天下三百郡
一千四百縣故有一邑之地虛設群司一鄉之氓徒分縣職所費至
廣所制全輕伏請勅吏兵部侍郎郎中給事中中書舍人各一人錯
綜利病詳定廢置吏員可併省者併省之州縣可併合者併合之每
年入仕者可停減者停減之此則利廣而易求官少而易理稍減冗
食足寬疲甿又國家舊章依品制俸官一品月俸三十千其餘職田
祿米大約不過千石自一品以下多少可知艱難已來禁網漸弛於
是增置使額厚請俸錢故大曆中權臣月俸有至九十貫者列郡刺
史無大小給皆千貫常來爲相始立限約至李泌又量其閑劇隨事
增加時謂通濟理難減削然猶有名存職廢額去俸存閑劇之間厚
薄頗異將爲永式湏立常規從之乃命給事中段平仲中書舍人韋
貫之兵部侍郎許孟容戶部侍郎李絳等詳定減省甲申以御史中
丞柳公綽爲湖南觀察使丁亥太白近右執法戊子賜御史中丞竇

易直緋魚袋秋七月癸巳朔尚書右僕射致仕高郢卒庚申贈銀青
襖大夫太子賓客裴垫太子少傅八月癸亥朔戶部侍郎李絳奏諸
州闕官職田祿米及見任官抽一分職田請所在收貯以備水旱賑
貸從之乙丑以天德軍防禦使張煦爲夏州刺史夏綏銀等州節度
使丁卯荆南先制永安軍宜停辛巳以常州刺史崔茺爲洪州刺史
江西觀察使九月癸巳朔以蜀州刺史崔能爲黔中觀察使戊戌富
平縣人梁悅爲父復仇殺秦果投獄請罪特勅免死決杖一百配流
循州職方員外郎韓愈獻議執奏之減諸司流外掄一千七百六十
九人貶黔中觀察使竇群爲開州刺史以爲政煩苛辰錦二州蠻
叛故也冬十月以前夏州節度使李愿檢校兵部尚書徐州刺史充
武寧軍節度使戊辰以戶部尚書韓臯爲東都番守判東都尚書省
事以太子詹事李藩爲華州刺史潼關防禦鎮國軍使以東都番守
鄭餘慶爲吏部尚書己巳詔朕於百執事群有司方澄源流以責實
效轉運重務專委使臣每道有院分督其任今陝路漕引悉歸中都

而尹守職名尚仍舊貫又諸道都團練使足脩武備以靖一方而別置軍額因加吏祿亦既虛設頗爲浮費思去煩以循本期省事以便人其河南水陸運陝府陸運潤州鎮海軍宣州采石軍越州義成軍洪州南昌府福州靖海軍等使額並宜停所收使已下俸料一事已來委本道克代百姓闕額兩稅仍具數奏聞戊寅詔王者之牧黎元也愛之如子視之如傷苟或風雨不時稼穡不稔則必除煩就簡惜力重勞以圖便安以阜生業况邦畿之內百役所叢雖勤卹之令亟行而供億之制猶廣重以經夏炎曠自秋霖澍南畝虧播植之功西成失豐登之望內乏口食外牽王徭豈惟轉輸之虞慮有餒殍之患斯蓋理道猶鬱和氣未通永言於茲良所咎歎京兆府每年所配折糶粟二十五萬石宜放於百姓有粟情愿折納者時估外特加優饒今春所貸義倉粟方屬歲饑容至豐熟歲送納元和五年已前諸色逋租並放百官職田其數甚廣今綠水潦諸處道路不通宜令所在貯納度支貲令百官據數于太倉請受遭水旱處通計所損便與除

破不得檢覆爲理之本在乎安人咨爾尹京宰邑之臣實爲親人阜俗之寄必當詢其疾苦奉我詔條恤隱爲心無怠於事固或徇利以剥下吐剛而茹柔使閭井咸安懷契獲濟各勉忠孝宜悉朕懷丙戌以諫議大夫孔戣爲皇太子諸王侍讀十一月壬辰朔癸巳新授華州刺史李藩卒乙巳以工部尚書趙昌檢校兵部尚書燕華州刺史充潼關防禦鎮國軍等使十二月癸亥朔壬申詔委宗正卿選人門嫁十六宅諸王女仍封爲縣主甲申京兆尹元義方戶部侍郎判度支盧坦以違令立戟罰一月俸收奪所請門戟已丑制以朝義郎守尚書戶部侍郎驍騎尉賜紫金魚袋李絳爲朝議大夫守中書侍郎同中書門下平章事閏十二月辛卯朔右衛上將軍伊慎卒辛亥皇太子寧薨謚曰惠昭廢朝三日國典無太子薨禮國子司業裴蒞精禮學特勅於西內定儀

唐書本紀卷第十四

唐書本紀卷第十五

憲宗下

劉
胸
聞人詮校刻沈桐校

元和七年春正月辛酉朔己巳以刑部尚書趙宗儒檢校吏部尚書與
元尹山南西道節度使庚午以兵部尚書王召判戶部事辛未以京
兆尹元義方爲鄜州刺史鄜坊丹延觀察使以司農卿李錡爲京兆
尹是夜月掩焚惑壬申廢信州永豐縣越州山陰縣衢州盈川縣癸
酉振武河溢毀東受降城二月庚寅朔壬辰詔以去秋旱歉賑京畿
粟三十萬石其元和六年春賑貸百姓粟二十四萬石並宜放免辛
丑尚書省重定左右僕射上事儀注壬寅以兵部侍郎許孟容爲河
南尹辛亥山南西道節度使裴玢卒癸丑入蕃使不得與私覲正員
官量別支給以充私覲舊使絕域者許置正官員十餘員取貨以備
私覲雖優假遠使殊非典法故革之勅錢重物輕爲弊頗甚詳求適

變將以便人所貴緡貨通行里間寬恤宜令群臣各隨所見利害狀以聞三月己未朔辛酉以惠昭太子薨罷曲江上已宴庚午以旱勅諸司䟽決繫囚夏四月戊子朔癸巳勅天下州府民戶每田一畝種桑二樹長吏逐年檢計以聞辛亥鹽鐵使王播奏元和六年賣鹽鐵除峽內井鹽外計收六百八十五萬九千二百貫五月戊午朔庚申上謂宰相臣曰卿等累言吳越去年水旱昨有御史自江淮迴言不至爲災人非甚困李絳對曰臣得兩浙淮南州狀繼言歉旱方隅授任皆朝廷信重之臣御史非良或容希媚此正當姦佞之臣况推誠之道君人大本任大臣以事不可以小臣言問之伏望明示御史姓名正之典刑上曰卿言是也朝廷大體以恤人爲本一方不稔即宜賑救濟其饑寒况可疑之也向者不思而有此問朕言過矣絳等拜賀癸亥焚惑近太微右執法六月丁亥朔舒州桐城梅天陂內有黃白二龍自陂中乘風雷躍起高二百尺行六里入浮塘陂癸巳以金紫光祿大夫守司徒同平章事崇文館大學士太清宮使上柱國岐國公杜

佑爲光祿大夫守太保致仕宜朝朔望佑累表懇請故也已亥月近
南斗魁四星鎮州甲仗庫一十三間火兵仗都盡王承宗常畜叛
謀至是始懼天罰兇氣稍奪仍殺三庫吏百餘人乙丑以兵部員外
郎王涯知制誥乙亥制立遂王宥爲皇太子改名恒已卯以新羅大
宰相金彥昇爲開府儀同三司檢校太尉使持節大都督雞林州諸
軍事雞林州刺史兼寧海軍使上柱國封新羅國王仍冊彥昇妻貞
氏爲妃八月丁亥朔新除新羅國大宰相金崇斌等三人宜令本國
准例賜戟戊戌魏博節度使田季安卒辛丑廢蓬州宕渠縣甲辰宣
歙觀察使房式卒丙午以蘇州刺史范傳正爲宣歙觀察使戊申制
諸州府五品已上官替後委本道長官量其才行官業資歷每年冬
季一度聞薦其罷使郎官御史許朝臣每年冬季准此聞薦諸使府
叅佐檢校官從元授官月日計如是五品已上官及臺省官經三
十箇月外任餘轉改餘官經三十六箇月奏轉改如未經考便有事故
及停替官本限之外更加十箇月即任中奏辛亥以左龍武大將軍

薛平爲滑州刺史義成軍節度使冬十月乙未魏博三軍舉其衙將
田興知軍州事時田季安死子懷諫年十一爲副大使知軍府事軍
政一決於家僮將士則數易大將軍情不安因田興入衙兵環而劫
請興頓仆於地軍衆不散興曰欲聽五命勿犯副大使衆曰諾但殺將
士則等十數人而止即日移懷諫於外令朝京師甲辰以魏博都知
兵馬使兼御史中丞沂國公田興爲銀青光祿大夫檢校工部尚書
兼魏州大都督府長史充魏博節度使庚戌豐王寬改名惲深王察
改名惲洋王寰改名忻絳王寮改名悟建王密改名恪以鄭滑節度
使袁滋爲戶部尚書十一月丙辰朔乙丑詔田興以魏博請命宜令
司封郎中知制誥裴度往彼宣慰賜三軍賞錢一百五十萬貫以河
陰院諸道合進內庫物充六州百姓給復一年兼赦管內見繫囚徒
及度至魏州田興禮待甚恭仍請度至六州諸縣宣達朝旨辛未太
保致仕杜祐卒東川觀察使潘孟陽奏龍州武安縣嘉禾生有麟食之麟
之來群鹿環之光彩不可正視使畫工圖之以獻乙亥以給事中李逢

吉司勳員外郎李巨並充皇太子諸王侍讀戊寅吏部尚書鄭餘慶
請復置吏部考官三員吏部郎中楊於陵執奏以爲不便乃詔考官
常顥等三人祇考及第科目人其餘吏部侍郎自定己卯江西觀察
使崔元辛巳以前魏博節度副使田懷諫爲右監門衛將軍賜宅
一區蒨粟等甲申以同州刺史裴堪爲河西觀察使十二月丙戌朔以
吏部尚書鄭餘慶爲太子少傅丙辰左拾遺楊歸厚以自娶婦進扶
借礼會院貶國子主簿分司戊戌以京兆尹裴向爲同州防禦使己
亥魏博奏管内州縣官員二百五十三員請吏部銓注

八年春正月乙卯朔庚午冊太王義爲渤海國王授秘書監易之汧州都督
辛未制以正議大夫守礼部尚書同平章事上柱國扶風郡開國公權德
輿守礼部尚書罷知政事癸未以山南東道節度使李夷簡檢校戶部
尚書成都尹充劔南西川節度使以戶部尚書袁滋檢校兵部尚書
襄州刺史充山南東道節度使二月乙酉朔辛卯田興改名弘正宰
相李吉甫進所撰元和郡國圖三十卷又進六代畧三十卷又爲十

道州郡圖五十四卷宰相于頔男太常丞敏專殺梁正言奴棄國中
事發頔與男季友素服待罪貶頔恩王傳于敏長流雷州錮身發遣
殿中少監駙馬都尉于季友誑罔公主藏隱內人轉授兕兄移貯外舍
傷風黷禮莫大於茲宜削奪所任官令在家修省贊善大夫于正秘書
丞于方並停見任皆頔之子也捕獲授于頔賂為致出鎮人梁正言
及交構權貴僧鑒虛並付京兆府杖死甲子以劔南西川節度使銀
青光祿大夫檢校吏部尚書燕門下侍郎同平章事上柱國臨淮郡
開國公食邑二千戶武元衡復入中書知政事兼崇玄館大學士太
清宮使辛未上以久旱親於禁中求雨是夜澍雨霑足丙子大風壞
崇陵寢殿鴟尾折門戟六夏四月癸未朔乙酉以邕管經畧使房昶
為桂管觀察使以開州刺史竇群為邕管經畧使丙戌以錢重貴輕
出庫錢五十萬貫令兩常平倉收市布帛每段匹於舊估加十之一
鄜坊觀察使元義方卒辛卯以將作監薛伾為鄜坊觀察使乙未長
安西市永生三耳八足二尾僧鑒虛為高崇文納賂四萬五千貫舉

宰相杜黃裳共引致人求樂縣令吳憑付錢與黃裳男載勅吳憑配
流昭州黃裳崇文已薨歿所用錢不須勘問杜載釋放辛亥賜魏博
田弘正錢二十萬貫收市軍糧庚申河中尹張弘靖奏脩古舜城六
月辛巳朔時積雨延英不開十五日是日上謂宰臣曰今後每三日
雨亦對來乙酉工部尚書致仕裴佖卒丙戌以東都留守韓臯檢校
吏部尚書兼許州刺史充忠武軍節度使庚寅京師大風雨毀屋飄
瓦人多壓死所在川瀆暴漲行人不通辛丑出宮人二百車任從所
適以水災故也壬寅宰臣武元衡李吉甫李絳舊相鄭餘慶權德輿
各奉詔令進舊詩秋七月辛亥朔癸丑以權德輿檢校吏部尚書東
都留守丁卯以振武節度使李光進爲靈州大都督府長史靈武節
度使癸酉命中尉彭中獻脩興唐觀壯其規制北拒禁城開複道以通
行幸是夜月近五諸侯丁丑新授桂管觀察使房啓降爲太僕少卿啓
初拜桂管啓更賂吏部主者私得官告以授啓俄有詔命中使賫告牒與
啓曰受之五日矣上怒杖吏部令史罰郎官啓亦即降之以安南都

護馬總爲桂管觀察使以江州刺史張勳爲安南都護本管經畧招討使鄜坊觀察使薛伾卒八月辛巳朔癸未以蘄州刺史裴行立爲安南都護本管經畧招討使以張勳耄年也丁亥以司農卿裴武爲鄜坊觀察使庚寅詔毀家徇國故徐州刺史李洧等一十家子孫並宜甄獎甲午太白近軒轅辛丑以東川節度使潘孟陽爲戶部侍郎判度支盧坦爲梓州刺史劍南東川節度使乙巳廢天武軍併入神策軍九月庚戌朔景辰淄青李師道進鵠十二命還之戊午賜群臣宴於曲江乙丑詔比聞嶺南五管并福建黔中等道多以南口餉遺及於諸處博易骨肉離析良賤難分此後嚴加禁止如違長吏必當科罰淮西吳少陽獻馬三百匹丙寅詔減死戍邊前代美政量其遠邇亦有便宜今後兩京關內河南河東河北淮南山南東西道州府除大辟罪外輕犯不得配流天德五城戍辰以給事中竇易直爲陝虢防禦使仍賜金紫壬申以恩王傳干頤爲太子賓客以前朔方靈鹽節度使王佖爲右衛將相出入翰林草制謂之白麻至佖奏罷中書草

制因爲例也太常習樂始復用大鼓冬十月庚辰朔己丑癸惑近太
微西垣南首星庚寅以湖南觀察使柳公綽爲岳鄂沔安黃觀察使
辛卯涇原節度使朱忠亮卒壬辰汴州劉弘進所撰聖朝萬歲樂譜
共三百首己巳以宗正少卿李道古爲黔中觀察使以蘇州刺史張
正甫爲湖南觀察使丙申以大雪放朝人有凍踣者雀鼠多死戊戌
以神策晉潤鎮使蘇光榮爲涇州刺史四鎮北庭行軍涇原節度使
翰林學士司封員外郎韋弘景守本官以草光榮詔漏敘功勲故也壬
辰振武奏迴紇千騎至礪鵲泉十一月庚戌朔丙辰以福建觀察使
裴次元爲河南尹丙寅以鹽州隸夏州自夏州至豐州初置八驛丁
卯以泗州刺史薛審爲福建觀察使右龍武統軍劉昌裔卒癸酉昭義
郝士美奏諸軍就食于臨洛京畿水旱霜損田三萬八千頃十二月
庚辰朔以京兆尹李銍爲鄜坊觀察使以代裴武入爲京兆尹辛巳
勅應賜王公公主百官等莊宅碾磴店鋪車坊園林等一任貼典貨
賣其所緣稅役便令府縣收管勅張茂昭立功河朔舉族歸朝義烈

之風史冊收載如聞身歿之後家無餘財追懷舊勲特越常典宜歲賜絹二千匹春秋二時支給群臣上表請立德妃郭氏爲皇后丙戌以桂管觀察使馬總爲廣州刺史嶺南節度使以邕管經畧使崔詠爲桂管觀察使庚寅以夔州刺史馬平陽爲邕管經畧使振武軍亂逐其帥李進賢屠其家乃以夏州節度使張煦代進賢率兵二千赴鎮許便宜擊斷丙午以金吾衛將軍田進爲夏州刺史夏綏銀節度使以河溢浸滑州羊馬城之半滑州薛苹魏博田弘正徵役萬人於黎陽界開古黃河道南北長十四里東西闊六十步深一丈七尺決舊河水勢滑人遂無水患

九年春正月己酉乙卯大霧而雪李吉甫累表辭相位不許乙亥張煦入單于都護府誅作亂軍士蘇國珍等二百五十二人二月己卯朔戶部侍郎判度支兼京北五城營田使丁丑貶前鎮武節度使李進賢爲通州刺史監軍路朝見配役于定陵丁未詔以歲飢放關內元和八年已前逋租錢粟賑常平義倉粟三十萬石丙申賜振武軍

絹二萬匹丁酉月近心大星癸卯制朝議大夫守中書侍郎同平章
事上柱國高邑男李絳守禮部尚書累表辭相位故也三月己酉朔
丙辰雋州地震晝夜八十震墜死者百餘人庚申妖人梁叔高自廣
州來授書與吏部侍郎楊於陵使爲己輔於陵執之以告殺之辛酉
以太子少傅鄭餘慶檢校右僕射興元尹山南西道節度使代趙宗
儒爲御史大夫丁卯霜殺桑召大理卿裴棠棣男損前昭應令杜
式方男悰見于麟德殿前各賜緋許尚公主夏四月戊寅朔庚寅詔
賜太師咸寧王渾瑊宜配享德宗廟庭五月丁未朔以嶺南節度使
鄭絀爲工部尚書庚申移宥州於涇原軍郭下置延恩縣隸夏州觀
察使是月旱穀貴出太倉粟七十萬石開六場糶以惠飢民乙丑桂
王綸薨以旱免京畿夏稅十三萬石青苗錢五萬貫六月丙子朔戊
寅以天德軍經畧使周懷乂卒廢朝一日經畧使廢朝自懷乂始也
庚辰以義武軍節度副使渾鎬檢校工部尚書兼定州大都督府長
史充義武軍節度使易定觀察使北平軍等使丙戌以左龍武將軍

燕重旰爲豐州刺史天德軍豐州西城中城都防禦押蕃落等使乙未置禮賓院於長興里之北丙申以左丞孔幾爲華州刺史潼關防禦鎮國軍等使壬寅制河中晉絳慈隰等州節度使張弘靖守刑部尚書同中書門下平章事秋七月丙午朔乙未以御史大夫趙宗儒檢校尚書右僕射兼河中尹河中晉絳等州節度使戊辰以太子司議卽杜棕爲銀青光祿大夫殿中少監駙馬都尉尚岐陽公主閏八月乙巳朔辛酉以河陽節度使烏重胤兼汝州刺史壬戌以中書舍人王涯屯田卽中書綬爲皇太子諸王侍讀己巳加田弘正檢校右僕射賞三軍錢二十萬貫九月甲戌朔以洺州刺史李光顏爲陳州刺史忠武軍都知兵馬使丙戌以山南東道節度使袁滋檢校兵部尚書兼江陵尹荆南節度使以荆南節度使嚴綬檢校司空襄州刺史山南東道節度使乙丑月掩軒轅淮西節度使吳少陽卒其子元濟匿喪自總兵柄乃焚劫舞陽等四縣朝廷遣使弔祭拒而不納壬辰真臘國朝貢戊戌加河東節度使王鐸檢校司空同平章事以給事

中孟簡爲越州刺史浙東觀察使贈吳少陽尚書右僕射冬十月甲辰朔丙午金紫光祿大夫中書侍郎同平章事集賢大學士監脩國史上柱國趙國公李吉甫卒甲寅以刑部員外郎令狐楚爲職方員外郎知制誥壬戌以忠武軍節度使韓臯爲吏部尚書以忠武軍節度副使兼陳州刺史李光顏爲許州刺史忠武軍節度使甲子制朕嗣膺寶位于茲十年每推至誠以御方夏庶以仁化臻于太和宵衣旰食意屬於此今淮西一道未達朝經擅自繼襲肆行寇掠將士等迫於受制非是本心思去三面之羅庶遵兩階之義宜以山南東道節度使嚴綬兼充申光蔡等州招撫使仍命內常侍崔潭峻爲監軍戊辰以尚書左丞呂元膺檢校工部尚書東都留守舊例命留守賜旗甲與方鎮同及元膺受命不賜諫官援華汝壽三州例有賜居守之重不宜獨闕上曰此三處亦宜停賜十一月甲戌朔甲申以吏部尚書韓臯爲太子賓客甲午以御史中丞胡証爲單于大都護振武靈勝等軍節度使丁酉太子太傅范希朝卒戊戌以中書舍人裴度爲御史

中丞以左金吾大將軍郭釗檢校工部尚書邠州刺史充邠寧節度使以職方員外郎知制誥令狐楚爲翰林學士十二月甲辰朔丁未鎮武節度使張煦卒辛亥邠寧節度使檢校右僕射閻巨源卒癸丑兵部尚書王召卒己未右羽林統軍孟元陽卒丙寅太子少保趙昌卒戊辰制以中大夫守尚書右丞上騎都尉賜紫金魚袋韋貫之本官同中書門下平章事

十年春正月癸酉朔乙酉宣武軍節度使韓弘守司徒平章事並如故丙申嚴綬帥師次蔡州界己亥制削奪吳元濟在身官爵庚子桂管奏移富州治於故城二月癸卯朔甲辰嚴綬軍爲賊所襲敗於磁丘退守唐州田弘正子布韓弘子公武各率師隸李光顏討賊辛亥以禮部尚書李絳爲華州潼關防禦鎮軍等使壬戌河東防秋將劉輔殺豐州刺史燕重盱己巳以羽林將軍李彙爲涇原節度使三月壬申朔以右金吾將軍李奉仙爲豐州刺史天德軍西城中城都防禦使己卯以劍南西川節度行軍司馬李程爲兵部郎中知制誥乙

酉以虔州司馬韓恭爲章州刺史以求州司馬柳宗元爲柳州刺史
饒州司馬韓曄爲汀州刺史朗州司馬劉禹錫爲播州刺史台州司
馬陳諫爲封州刺史御史中丞裴度以禹錫母老請移近處乃改授
連州刺史贈故太常卿崔弘禮部尚書李光顏破賊於南頓辛亥盜
焚河陰轉運院凡燒錢帛萬貫匹米二萬四千八百石倉室五十五
間防院兵五百人營於縣南盜火發而不救呂元膺召其將殺之自
盜火發河陰人情駭擾壬戌以長安縣令徐俊爲邕管經畧使五月
辛未朔辛巳御史中丞裴度兼刑部侍郎時度自淮西行營宣慰還
所言軍機多合上旨故以兼管寵之丙申李光顏大破賊黨於洄曲
自徵兵討賊凡十餘鎮之師環於申蔡未立戰功裴度使還奏曰臣
觀諸將惟光顏見義能勇必能立功至是告捷京師相賀上尤賞度
之知人六月辛丑朔癸卯鎮州節度使王承宗遣盜夜伏於靖安坊
刺宰相武元衡死之又遣盜於通化坊刺御史中丞裴度傷首而免
是日京城大駭自京師至諸門加衛兵宰相導從加金吾騎士出入

則殺弦露升每過里門訶索甚誼公卿持事柄者以家僮兵仗自隨
武元衡死數日未獲賊兵部侍郎許孟容請見奏曰豈有國相橫屍
路隅不能擒賊因灑泣極言上爲之憤歎乃詔京城諸道能捕賊者
賞錢萬貫仍與五品官敢有蓋藏全家誅戮乃積錢三萬貫於東西
市京城大索公卿節將裨壁重轅者皆搜之庚戌神策將士王士則
王士平以盜名上言且言王承宗所使乃捕得張晏等八人誅之乙
丑制以朝議郎守御史中丞兼刑部侍郎飛騎尉賜紫金魚袋裴度
爲朝請大夫守刑部侍郎同中書門下平章事秋七月庚午朔靈武節度
使李光進卒辛未以神策軍長武城使杜叔良爲朔方靈鹽定遠城
節度觀察使甲戌詔成德軍節度使王承宗自脩瑕疵累加獎拔列
在維藩之任待以忠正之徒謂懷君父之恩克勵人臣之節而動思
棄命恣逞非心傲狠反常橫辱無畏以其先祖嘗立忠勲每念含容
庶聞悛革曾不知陰謀逆狀久則逾彰凶德禍機盈而自覆乃敢輕
肆指斥妄陳表章潛遣姦人內懷兵刃賊殺元輔毒傷憲臣縱其兇

殘無所顧望推窮事迹罪狀昭明周覽讞詞良用驚歎宜令絕其朝貢其所部博野樂壽兩縣本屬范陽宜却隸劉總駙馬都尉王承系太子贊善王承迪丹王府司馬王承榮等並宜遠郡安置先是承宗上表怨咎武元衡畱中不報又肆指斥上使持其表以示百官群臣皆請問罪丙戌涇原節度使李彙卒以將作監王潛爲荊州刺史四鎮北庭涇原節度使乙未以京兆尹裴武爲司農卿以捕賊弛慢故也八月己亥朔日有蝕之丙寅訶陵國遣使獻僧祇幢及五色鸚鵡頻伽鳥并異香名寶丁未淄青節度使李師道陰與嵩山僧圓淨謀反勇士數百人伏於東都進奏院乘洛城無兵欲竊發焚燒宮殿而肆行剽掠小將楊進李再興告變畱守呂元膺乃出兵圍之賊突圍而出入嵩岳山棚盡擒之訊其首僧圓淨主謀也僧臨刑歎曰誤我事不得使洛城流血九月癸酉以宣武軍節度使韓弘充淮西行營兵馬都統丁酉以太子賓客韓臯爲兵部尚書冬十月庚子始析山南東道爲兩節度以戶部侍郎李遜爲襄州刺史充襄復郢均房節

度使以右羽林將軍高霞寓爲唐州刺史充唐隨鄧節度使刑部尚書權德輿奏請行用新刪定勅格三十卷從之壬子以太子賓客于頔爲戶部尚書十一月戊辰詔出內庫繒絹五十五萬匹供軍乙亥以山南東道節度使嚴綬爲太子少保戊寅盜焚獻陵寢宮詔發振州兵二千會義武軍以討王承宗十二月壬寅夜太白犯鎮星甲辰李愿擊敗李師道之衆九千斬首二千級壬子東都留守呂元膺請募置三河子弟以衛宮城甲寅越州復置山陰縣庚申新造指南車記里鼓出宮人七十二人置京城寺觀有家者歸之乙丑河東節度使王鐸卒是歲渤海新羅奚契丹黑水南詔牂柯並遣使朝貢

十一年春正月丁卯朔以宿師于野不受朝賀己巳以中書侍郎平章事張弘靖檢校吏部尚書兼太原尹北都留守河東節度使戊寅詔群臣曰今用兵已久利害相半其攻守之宜罰宥之要宜各具議狀以聞庚辰翰林學士錢徽蕭俛各守本官以上疏請罷兵故也癸未削奪王承宗在身官爵所襲封邑賜武俊千金吾將軍士卒令河

東河北道諸鎮加兵進討甲申盜斷建陵門戟四十七竿甲子李光
顏奏破賊二月癸卯吐蕃贊普卒以中書舍人權知禮部貢舉賜緋
魚袋李逢吉爲門下侍郎同平章事賜紫金魚袋以內庫絹四萬疋
賞幽魏將士甲寅以華州刺史李絳爲兵部尚書丙辰月掩心戊午
南詔蠻酋晟龍盛卒三月庚午皇太后崩于興慶宮之咸寧殿是日
群臣發喪於西宮兩儀殿以宰臣裴度爲禮儀使吏部尚書韓皋爲大
明官留守設次于中書末勅諸司公事宜權取中書門下處分癸酉
分命朝臣告哀于天下甲戌見群臣于紫宸門外廡下巳卯以宰臣
李逢吉充大行皇太后山陵使出內庫繒帛五萬匹克奉山陵巳丑
月近鎮星夏四月壬寅西川節度使李夷簡遣使告哀於南詔后喪
邊鎮告四夷舊制也庚戌貶戶部侍郎判度支楊於陵爲郴州刺史
坐供軍有闕也丁巳以徐宿飢賑粟八萬石五月丁卯夜辰歲二宿
合于東井宿州軍亂逐刺史駱怡壬申李光顏破賊于凌雲柵六月
甲辰高霞寓敗于鉄城退保新興柵是日人情悚駭宰相奏對多請

罷兵上曰勝負兵家常勢不可以一將失利便沮成計今但議用兵
方畧朝廷庶務制置可否耳是夜月掩心後星庚戌田弘正軍討王
承宗次于南宮辛酉群臣上太行太皇后謚曰莊憲秋七月丁丑貶
隨唐節度使高霞寓爲歸州刺史以河南尹鄭權爲襄州刺史充山
南東道節度使以荆南節度使袁滋爲唐州刺史彰義軍節度使申光
唐蔡隨鄧州觀察使權以唐州爲理所以華州刺史裴武爲江陵尹
充荆南節度使戊寅以隨州刺史楊旻爲唐州刺史充行營都知兵
馬使以滋儒者故復以旻將其兵壬午宣武軍奏破賊八月壬寅以
宰臣韋貫之爲吏部侍郎罷知政事貫之以淮西河北兩處用兵勞
於供餉請緩承宗而專討元濟與裴度爭論上前故也戊申容州奏
颶風海水毀州城甲申附莊憲皇后於豐陵九月丁卯饒州奏浮梁
樂平二縣五月內暴雨水溢失四千七百戶溺死者一百七十人丙
子新除吏部侍郎韋貫之再貶湖南觀察使辛未貶吏部侍郎韋顓
爲陝州刺史刑部郎中李正辭爲金州刺史度支郎中薛公幹爲房

州刺史屯田郎中李宣爲忠州刺史考功郎中常處厚爲開州刺史
禮部員外郎崔韶爲果州刺史並爲補闕張宿所構言與貫之朋黨
故也乙酉蔡州軍前奏援凌雲柵冬十月丁巳以刑部尚書權德輿
檢校吏部尚書兼興元尹充山南西道節度使丙寅幽州劉總加平
章事鄆州李師道加檢校司空師道聞援凌雲柵乃懼僞貢款誠故
有是命庚午以司農卿王遂爲宣州刺史宣歙池觀察使以京兆尹
李絳爲潤州刺史浙西觀察使以遂條常歷計司能聚歛方藉供軍
故有斯授壬申勅諸道奏事官非急切不得乘驛馬丁丑出內庫錢
五十萬貫供軍戊寅夜月犯歲辛巳命內常侍梁守謙監淮西行營諸
軍仍以空名告身五百通及金帛付之戊子夜土火合于虛危十二
月丙午以易州刺史陳楚爲定州刺史義武軍節度使丁未以翰林
學士尚書工部侍郎知制誥王涯爲中書侍郎同平章事甲寅以開
廐宮苑使李愬檢校左散騎常侍兼鄧州刺史充唐隨鄧等州節度
使初置淮潁水運使運揚子院米自淮陰汧流至壽州四千里入潁

唐紀十五
口又汧流至潁州沈丘界五百里至于項城又汧流五百里入潁河
又三百里輸于鄆城得米五十萬石茭一千五百萬束省汧運七萬
六千貫已未邕管秦黃洞賊屠嚴州未央官及飛草場火京畿水害
田潤常湖衡陳許大水是歲冬雷雋杏花迴鶻韃奚契丹特犒渤
海等朝貢

十二年春正月辛酉朔以用兵不受朝賀癸未貶義武軍節度使渾
鎬爲循州刺史坐討賊失律也甲申貶唐鄧節度表滋爲撫州刺史以
上䟽請罷兵故也乙酉夜星見而雨戊子夜彗出畢南長丈餘指西
南凡三日南近參箕而沒二月壬申出內庫絹布六千九萬段匹銀
五千兩付度支供軍庾子勅京城居人五家相保以搜姦慝時王承
宗李師道欲阻用兵之勢遣人折陵廟之戟焚藹藹之積流矢飛書
恐駭京國故搜索以防姦及賊平復得淄青簿領中有賞蒲潼關吏
案乃知容姦者關吏也搜索不足以爲防庚申勅宜於許汝行營側
近置行鄆城以處賊中歸降人戶甲寅岳鄂團練使李道古師攻申

州剋羅城賊力戰道古之衆大敗三月壬戌昭義都士美兵敗於栢鄉兵士死者千人戊辰滄州程執恭改名權太常定李吉甫諡曰敬憲度支卽中張仲方非之上怒貶爲遂州司馬賜吉甫諡曰忠丁丑月犯心後星癸未賊將吳秀琳以文城柵兵三千降李愬夏四月辛卯李光顏破賊三萬於鄆城殺其卒什二三獲馬千匹器甲三萬辛丑駙馬都尉于季友居嫡母喪與進士劉師服歡宴夜飲季友削官爵笞四十忠州安置師服笞四十配流連州于頔不能訓子削階已酉出太倉粟二十五萬石糶于西京以惠飢民庚戌勅改蔡州吳房縣爲遂平縣移置於文城柵南新城內丁卯賊鄆城守將鄧懷金與縣令董昌齡以鄆城降甲戌渭南雨雹中人有死者丙子詔權罷河北行營專討淮蔡五月庚寅朔癸巳隨唐節度使李愬奏敗賊於吳房獲賊將李佑已亥以尚書左丞許孟容爲河東晉守充都畿防禦使時東畿民戶供軍尤苦車數千乘相錯于路牛皆饋軍民戶多以驢耕已酉作蓬萊池周廊四百間六月己未朔以衛尉卿程昇爲鹽

鐵使代王播時昇爲鹽鐵使副自江南收拾到供軍錢一百八十五萬以進故得代播壬戌賊吳元濟上表請束身歸朝時連破三柵賊勢迫蹙實欲歸朝而制於左右故不果行乙酉京師大雨舍元殿一柱傾市中水深三尺壞坊民二千家秋七月戊子朔壬辰詔以定州飢募人入粟受官及減選超資河北水災邢洛尤甚平地或深二丈甲辰戶部尚書于頔請致仕不允嶺南節度使崔詠卒乙酉勅今後左降官及責授正貲官等宜從到任經五考滿許量移如未滿五考遇恩赦者從節支處分如犯十惡大逆賊賄緣坐奏取進止庚戌以國子祭酒孔戣爲廣州刺史嶺南節度使丙辰制以中書侍郎平章事裴度守門下侍郎同平章事使持節蔡州諸軍事蔡州刺史充彰義軍節度使申光蔡觀察處置等使仍充淮西宣慰處置使以朝散大夫守尚書戶部侍郎上護軍賜紫金魚袋崔群爲中書侍郎同中書門下平章事以刑部侍郎馬摠兼御史大夫充淮西行營諸軍宣慰副使以太子右庶子韓愈兼御史中丞充彰義軍行軍司馬以司勳

員外郎李正封都官員外郎馮宿禮部員外郎李宗閔皆兼侍御史
爲判官書記從度出征詔以鄆城爲行蔡州治所八月戊午朔庚申
裴度發赴行營勅神策軍三百人衛從上御通化門勞遣之度望門
再拜齒涕而辭上賜之犀帶以河南尹辛秘爲潞府長史昭義軍節
度使代郝士美以士美爲工部尚書孟簡爲戶部侍郎戊辰以同州
刺史張正甫爲河南尹甲申裴度至鄆城九月丁亥朔戊子出內庫
羅綺犀玉金帶之具送度支估計供軍甲午御史臺奏同制除官承
前以名字高下爲班位先後或名在前身在外及到却在舊人之上
今請以上日爲先後勅曰名在前上日在後未逾月不在此限行立
班次即宜以勅內前後爲定戊戌劔南東川節度盧坦卒己亥貶京
兆尹竇易直爲金州刺史以鞠獄得贓不實故也辛丑以御史中丞
爲京兆尹壬寅以湖廣觀察使韋貫之爲太子詹事分司乙巳以刑
部郎中知雜崔元略爲御史中丞丁未以朝議大夫門下侍郎同平
章事李逢吉檢校兵部尚書使持節梓州諸軍事梓州刺史充劔南

東川節度副大使知節度事庚子以撫州刺史袁滋爲湖南觀察使
冬十月壬申裴度往施口觀板築五溝賊遽至注弩挺刃將及度而
李光顏田布扼其歸路大敗之是日度幾陷癸酉內出元和辯謗略
三卷付史館甲申以淮南節度使檢校左僕射李鄴爲門下侍郎同
中書門下平章事以左丞衛次公代鄴爲淮南節度使己卯隨唐節
度使李愬率師入蔡州執吳元濟以獻淮西平甲申詔淮西立功將
士委韓弘裴度條疏奏聞淮西軍人一切不問宜準元勅給復二年
十一月丙戌朔御興安門受淮西之俘以吳元濟徇兩市斬於獨柳
樹妻沈氏沒入掖庭第二人子三人配流尋誅之判官劉協等七人
處斬錄平淮西功隨唐節度使檢校左散騎常侍李愬檢校尚書左
僕射襄州刺史充山南東道節度襄鄧隨唐福郢均房等州觀察等
使加宣武軍節度使韓弘兼侍中忠武軍節度使李光顏河陽節度
使烏重胤並檢校司空以宣武軍都虞候韓公武檢校左散騎常侍
鄆州刺史鄆坊丹延節度使以魏博行營兵馬使田布爲右金吾衛

將軍皆賞破賊功也甲午恩王連薨以蔡州郾城爲潁州析上蔡西平遂平三縣隸焉戊申以淮西宣慰副使刑部侍郎馬摠爲彰義軍節度留後十二月壬戌以彰義軍節度淮西宣慰處置使門下侍郎同平章事裴度守本官賜上柱國晉國公食邑三千戶以蔡州留後馬摠檢校工部尚書蔡州刺史彰義軍節度使潁州潁陳許節度使丙子以右庶子韓愈爲刑部侍郎是歲河南河北水

十三年春正月乙酉朔御含元殿受朝賀禮畢御丹鳳樓大赦天下已丑以文宣王三十八代孫孔惟旺襲文宣公庚寅勅李師道頻獻表章披露懇誠宜令諫議大夫張宿往彼宣慰辛亥以禮部尚書王播爲成都尹劍南西川節度使二月乙亥御麟德殿宴群臣大合樂凡三日而罷頒賜有差三月庚寅以前劍南西川節度使李夷簡爲御史大夫丙申以同州刺史鄭絪爲東都留守都畿汝防禦使庚子以御史大夫李夷簡爲門下侍郎同平章事宰相李鄘守戶部尚書罷知政事丁未以太子少師鄭餘慶爲左僕射辛亥詔百司職田多

少不均爲弊日久宜令逐司各收職田草粟都數自長官以下除留守至銀臺待罪請獻德棣二州兼入管內租稅壬戌前東都留守許孟容卒庚辰詔復王承宗官爵以華州刺史鄭權爲德州刺史橫海軍節度德棣滄景等州觀察使五月乙酉鳳翔節度使李惟簡卒乙未月近心後星丙辰以忠武軍節度使李光顏爲滑州刺史義武軍節度使以彰義軍節度使馬摠爲許州刺史忠武軍節度使陳許潞蔡觀察等使戊戌以山南東道節度使李愬爲鳳翔尹鳳翔隴右節度使辛丑知渤海國務大仁秀檢校秘書監忽汗州都督冊爲渤海國王丙午以戶部侍郎孟簡檢校工部尚書襄州刺史山南東道節度使六月癸丑朔日有食之乙丑湖南觀察使袁滋卒丁丑以滄景節度使程權爲邠州刺史邠州節度使出內庫絹三十萬匹錢三十萬貫付度支供軍秋七月癸未以新除鳳翔節度使李愬爲徐州刺史武寧軍節度使甲申以田弘正校檢司空乙酉詔削奪淄青節度使李師道在身官爵仍令宣武魏博義成義寧橫海等五鎮之師分

路進討辛丑以門下侍郎同平章事李夷簡檢校左僕射同平章事揚州大都督府長史淮南節度使已酉詔諸道節度使先帶度支營田使名者並罷之庚戌以左僕射鄭餘慶爲鳳翔隴右節度使八月壬子以中書侍郎平章事王涯爲兵部侍郎罷知政事戊午以尚書右丞崔從爲興元尹山南西道節度使甲戌太白近左執法乙亥勅應同司官有大功已上親者但非連判及勾檢之官并官長則不在迴避改換之限時刑部貲外郎楊嗣復以父於陵除戶部侍郎遂以近例避嫌請出省不從因有是勅丁丑木金水三宿聚于軫戊寅前山南西道節度使權德輿卒九月甲申以左衛將軍高霞寓爲單于大都護振武陵勝節度使甲辰以戶部侍郎判度支皇甫鏘同中書門下平章事依前判度支以衛尉卿充諸道鹽鐵轉運使程異爲工部侍郎同中書門下平章事依前充使是時上切於財賦故用聚斂之臣居相位詔下群情驚駭宰臣裴度崔群極諫不納二人請退榮惑近哭星丁未出內庫絹十萬匹給東軍冬十月甲寅吐蕃寇宥州

壬戌靈武奏破吐蕃二萬於定遠城癸亥前淮南節度使衛次公卒
甲子平涼鎮遏兵馬使郝玘奏收復原州破吐蕃二萬是夜月近昂
丙子以左金吾衛大將軍薛平檢校刑部尚書滑州刺史充義成軍
節度使以義成軍節度使李光顏爲許州刺史充忠武軍節度使陳
許觀察等使十一月辛巳朔夏州破吐蕃五萬靈武奏攻破吐蕃長
樂州羅城丁亥以山人柳泌爲台州刺史爲上於天台山採仙藥故
也制下諫官論之不納壬寅以河陽節度使烏重胤爲滄州刺史橫
海軍節度滄景德棣觀察等使丁未以華州刺史令狐楚以懷州刺
史充河陽三城懷孟節度使十二月辛亥勅左右龍武軍六軍及威遠
營應納課戶共一千八百人衣糧並停仍付府縣收管戊寅軍前擒
到李師道將夏侯澄等四十七人詔並釋付魏博及義成軍收管要
還賊中者則量事優給放還上顧謂宰臣曰人臣事君但力行善事
自致公望何乃好樹朋黨朕甚惡之裴度對曰君子小人未有無徒
者君子之徒則同心同德小人之徒是爲朋黨上曰他人之言亦與

卿等相似豈易辨之哉度曰君子小人觀其所行當自區別矣上曰
凡好事口說則易躬行則難卿等既言之須行之勿空口說度等謝
曰陛下處分可謂至矣臣等敢不激勵然天下之人從陛下所行從
陛下所言臣等亦願陛下每言之則行之上頗忻納是歲廻紇南詔
蠻渤海高麗吐蕃奚契丹訶陵國並朝貢

十四年春正月庚辰朔以東師宿野不受朝賀壬午復置仗內教坊
於延政里丁亥徐州軍破賊二萬於金鄉迎鳳翔法門寺佛骨至京
師畱禁中三日乃送諸寺王公士庶奔走捨施如不及刑部侍郎韓
愈上疏極陳其弊癸巳貶愈爲潮州刺史丙申魏博軍破賊五萬於
東河辛巳斬前滄州刺史李宗奭於獨柳樹朝廷初除鄭權滄州宗
奭拒詔不受代既而爲三軍所逐乃入朝故誅之癸卯夜月近南斗
魁丙午魏博軍破賊萬人於陽穀二月己酉朔以商州刺史嚴謨爲
黔中觀察使乙卯勅淄青行營諸軍所至收下城邑不得妄行傷殺
及焚燒廬舍掠奪民財開發墳墓宜嚴加止絕以鎮冀水災賜王承

宗綾絹萬匹辛酉襄陽節度使孟簡舉鄖鄉鎮遏使趙潔爲鄖鄉令
有虧常式罰一月俸料壬戌田弘正奏今月九日淄青都知兵馬使
劉悟斬李師道并男二人首請降師道所管十二州平甲子上御宣
政殿受賀已巳上御興安門受田弘正所獻賊俘羣臣賀於樓下庚
午制以淄青兵馬使金紫光祿大夫試殿中監兼監察御史劉悟檢
校工部尚書滑州刺史充義成軍節度使封彭城郡王食邑三千戶
賜錢二萬貫莊宅各一區癸酉田弘正加檢校司徒同中書門下平
章事三月巳卯朔丁酉上以齊魯初平宴羣臣於麟德殿賜物有差
戊子以華州刺史馬總鄆濮曹等州觀察等使巳丑以義成軍節度
使薛平爲青州刺史充平盧軍節度淄青齊登萊等州觀察等使以
淄青四面行營供軍使王遂爲沂州刺史充沂海充密等州都團練
觀察等使析李師道所據十二州爲三鎮也庚寅浙西觀察使李愬
卒辛卯李師道妻魏氏并男沒入掖庭堂弟師賢師智姪弘巽配流
乙未以中書舍人衛中行爲華州刺史潼關防禦鎮國軍等使辛

丑上顧謂宰臣曰聽受之間大是難事推誠選任所謂委寄必合盡心及至所行臨事不無偏黨朕臨御已來歲月斯久雖不明不敏然漸見物情每於行爲務欲詳審比令學士集前代昧政之事爲辯謗略每欲披閱以爲鑒誡耳崔群對曰無情曲直辯之至易稍懷欺詐審之實難故孔子有衆好衆惡之論浸潤膚受之說蓋以曖昧難辯故也若擇賢而任之待之以誠紘之以法則人自歸公孰敢行僞陛下詳觀載籍以廣聰明實天下幸甚丁未以撫州司馬令狐通爲右衛將軍給事中崔植封還制書言通前刺史壽州用兵失律未宜獎用上令宰臣諭植以通父彰有功不忍遂棄其子其制方行夏四月戊申朔乙卯太白順行近東井戊午以刑部尚書李愿爲鳳翔尹充鳳翔隴右節度使丙寅詔諸道節度都團練防禦經略等使所管支郡除本軍州外別置鎮遏守捉兵馬者並合屬刺史如刺史帶本州團練防禦鎮遏等使其兵馬額便隸此使如無別使即屬軍事其有邊於谿洞連接蕃蠻之處特建城鎮不關州郡者不在此限辛未工

部侍郎同平章事諸道鹽鐵轉運等使程昇卒丙子制金紫光祿大夫門下侍郎同中書門下平章事兼弘文館大學士上柱國晉國公食邑三千戶裴度可檢校左僕射兼門下侍郎平章事太原尹北都留守充河東節度觀察處置等使五月戊寅朔以刑部侍郎柳公綽充鹽鐵轉運等使庚辰以楚州刺史李聽爲夏州刺史夏綏銀宥等州節度使丙辰以河東節度使檢校吏部尚書同平章事張弘靖爲吏部尚書以忠武軍節度使李光顏爲邠寧慶節度使仍以忠武軍六千人赴鎮庚寅以工部尚書郝士美檢校刑部尚書許州刺史充忠武軍節度使是夜月近心大星已亥置臨海監牧命淮南節度使兼之勅李師古妻裴氏女宜娘於鄧州安置李宗奭妻韋氏放出掖庭坐李師道族人籍沒上愍之宥以輕典以宣歙觀察使竇易直爲潤州刺史充浙西觀察使韓弘進助平淄青絹二十萬疋女樂十人女樂還之六月丁未朔癸丑以福建觀察使元錫爲宣州刺史宣歙池觀察使庚申以戶部侍郎歸登爲工部尚書以鄭州刺史裴乂爲

福州刺史福建觀察使立酉勅定州大都督府復上州甲子以前兵部尚書李絳檢校吏部尚書河中尹充河中晉絳磁隰觀察使癸酉詔左金吾大將軍胡証充京西北巡邊使所經鎮戍與守將審量利害具事實奏聞秋七月丁丑朔戊寅汴州韓弘來朝己卯左散騎常侍致仕薛苹卒乙酉夜月掩心大星辛巳群臣上尊號曰元和聖文神武法天應道皇帝是日御宣政殿受冊禮畢御丹鳳樓大赦天下京畿今年秋稅青苗權酒等錢每實量放四百文元和五年己酉逋租賦並放甲午韓弘進絕絹二十八萬疋銀器二百七十事丁酉以河陽三城懷州節度使朝議郎使持節懷州諸軍事守懷州刺史兼御史大夫賜紫金魚袋令狐楚可朝議大夫守中書侍郎同中書門下平章事壬寅以永州刺史韋正武爲邕管經略使癸卯以前黔中觀察使魏義通爲懷州刺史河陽三城懷孟節度使沂州軍亂殺節度使王遂甲辰以棣州刺史曹華爲沂州刺史充沂海兗密等州都團練觀察使乙巳罷晉州防禦使八月丁未朔己酉制宣武軍節度

副大使知節度事汴宋亳穎等州觀察處置等使開府儀同三司守
司徒兼侍中汴州刺史上柱國許國公食邑三千戶韓弘可守司徒
兼中書令弘堅辭戎鎮故也癸丑以吏部尚書張弘靖為檢校尚書
左僕射同平章事汴州刺史宣武軍節度使甲寅於襄州穀城縣置
臨漢監以牧馬仍令山南東道節度使兼充監牧使戊午王承宗進
位檢校左僕射己未田弘正來朝上謂宰臣曰天下事重一日不可
曠廢若遇連假不坐有事即詣延英請對崔群以殘暑方甚目同列
將退上止之曰數日一見卿等時雖暑熱朕不為勞父之方罷丁亥
宴田弘正與大將判官二百人於麟德殿賜物有差戊辰陳許節度
使檢校刑部尚書郗士美卒九月丙子朔戊寅考功郎中蕭祐進古
畫古書二十卷斬沂州亂首王弁于東市癸未以國子祭酒李遜檢
校禮部尚書許州刺史忠武軍節度陳許殷蔡等觀察使庚寅貶右
衛大將軍田縉為衡王傅縉前鎮夏州私用軍糧四萬石強取党項
羊馬致党項引吐蕃入寇故也甲午以太子少師鄭餘慶兼判國子

祭酒辛丑以田弘正兄相州刺史田融檢校刑部尚書兼太子賓客
分司東都甲辰以魏博節度使光祿大夫檢校司徒同平章事兼魏
州大都督長史上柱國沂國公食邑三千戶田弘正依前檢校司徒
兼侍中賜實封三百戶時弘正三上表乞留闕庭不許乙巳上顧謂
宰臣曰朕讀玄宗實錄見開元初銳意求理至十六年已後稍似憊
開元末又不及中年何也崔群對曰玄宗少歷民間身經艱難故即位
之初知人疾苦躬勤庶政加之姚崇宋璟蘇頲盧懷慎等守正之輔
孜孜獻納故致治平及後承平日久安於逸樂漸遠端士而近小人
宇文融以聚斂媚上心李林甫以奸邪惑上意加以國忠故及於
亂願陛下以開元初爲法以天寶末爲戒即社稷無疆之福也時皇
甫鏐以諂刻欺蔽在相位故群因奏以諷之冬十月丙午朔壬戌安
南軍亂殺都護李象古并家屬部曲千餘人皆遇害丙寅以唐州
刺史桂仲武爲安南都護潮州刺史韓愈爲袁州刺史是月吐蕃寇
鹽州十一月乙亥朔以戶部尚書李鄘爲太子賓客東都留守辛卯

靈武大將史奉敬破吐蕃於鹽州城下賜奉敬實封五十戶賞之丁酉以原王傳鄭權爲右金吾大將軍充右街使上服方士柳泌金丹藥起居舍人裴潏上表切諫以金石含酷烈之性加燒鍊則火毒難制若金丹已成且令方士自服一年觀其效用則進御可也上怒已亥貶裴潏爲江陵令十二月乙巳朔庚戌國子祭酒鄭餘慶奏見任文官一品至九品外使兼京正貲官者每月於所請料錢每貫抽十文脩國子監從之乙卯以諫議大夫守中書侍郎同中書門下平章事上柱國賜紫金魚袋崔群爲潭州刺史兼御史大夫充湖南觀察使爲皇甫鎛所譖及群被貶人皆切齒於鎛

十五年春正月甲戌朔上以餌金丹小不豫罷元會庚辰鎮冀觀察使王承宗奏鎮冀深趙等州每州請置錄事叅軍一員判司三員每縣請置令一員從之壬午以前湖南觀察使崔倭權知戶部侍郎判度支丙戌沂海四州觀察使府移置於兖州改觀察使曹華爲兖州刺史史乙未命加寧李光顏修築鹽州城此月七日已後書常陰晦

微雨雪夜則晴明凡十七日方澄霽丙申月犯心大星光彩相及廢齊
州豐齊縣入長清廢全節縣入歷城廢章丘縣入亭山縣義成軍節
度使劉悟來朝戊戌上對悟於麟德殿上自服藥不佳數不視朝人
情恟懼及悟出道上語京城稍安庚子以少府監韓瑊爲鄆州刺史
鄆坊丹延節度使是夕上崩於大明宮之中和殿享年四十三時以
暴崩皆言內官陳弘志弑逆史氏諱而不書辛丑宣遺詔壬寅移伏
西內五月丁酉群臣上謚曰聖神章武孝皇帝廟號憲宗庚申葬于
景陵

史臣蔣係曰憲宗嗣位之初讀列聖實錄見貞觀開元故事竦慕不
能釋卷顧謂丞相曰太宗之創業如此玄宗之致理如此既覽國史
乃知萬倍不如先聖當先聖之代猶須宰執臣寮同心輔助豈朕今
日獨能爲理哉自是延英議政晝漏率下五六刻方退自貞元十年
已後朝廷威福日削方鎮權重德宗不委政宰相人間細務多自臨
決姦佞之臣如裴延齡輩數人得以錢穀數術進宰相備位而已及

上自藩邸監國以至臨御訖于元和軍國樞機盡歸之於宰相由是
中外咸理紀律再張果能剪削亂階誅除群盜脅謀英斷近古罕儔
唐室中興章武而已任昇鍾之聚斂逐群度於藩方政道國經未至
衰素惜乎服食過當闔豎竊發苟天假之年庶幾于理矣
贊曰貞元失馭群盜箕踞章武赫斯削平嘯聚我有宰衡耀德觀兵
元和之政聞于頌聲

唐書本紀卷第十五

唐書本紀卷第十六

劉

昉

等修

聞人銓校刻沈桐同校

穆宗

穆宗睿聖文惠孝皇帝諱恆憲宗第三子母曰懿安皇后郭氏貞元十一年七月生於大明宮之別殿初名宥封建安郡王元和元年八月進封遂王五年三月領彰義軍節度大使七年十月冊爲皇太子改今諱十五年正月庚子憲宗崩丙午卽皇帝位於太極殿東序是日召翰林學士段文昌杜元穎沈傳師李肇侍讀薛放丁公著對於思政殿並賜金紫丁未集群臣班於月華門外貶門下侍郎同平章事皇甫鑄爲崖州司戶戊申上見宰臣於紫宸門外辛亥以朝議卽守御史中丞飛騎尉襲徐國公賜緋魚袋蕭俛爲朝散大夫守中書舍人翰林學士武騎尉賜紫金魚袋段文昌爲中書侍郎同平章事上始御延英對宰臣詔曰山人柳泌輕懷左道上惑先朝固求牧人

貴欲疑衆自知虛誕仍更遁逃僧大通醫方不精藥術皆妄旣延禍
豐俱是姦邪邦國固有常刑人神所宜共棄付京兆府決杖處死金
吾將軍李道古貶循州司馬憲宗末年銳於服餌皇甫鎛與李道古
薦術人柳泌僧大通待詔翰林泌於台州爲上鍊神丹上服之日加
躁渴遽棄萬國甲寅二王後介國公宇文仲達卒有司舉舊典焚祭
之以監察御史李德裕右拾遺李紳禮部員外郎庾敬休並守本官
充翰林學士丁巳以劔南東川節度使李逢吉爲襄州刺史充山南
東道節度使以吏部侍郎王涯檢校禮部尚書梓州刺史充劔南東
川節度使己未改恒岳爲鎮岳恒州爲鎮州定州恒陽縣爲曲陽縣
恒王房子孫改爲泚王房丙寅以右神策大將軍張維清爲單于大
都護充振武麟勝節度使丁卯上及群臣皆釋服從吉戊辰群臣始
朝於宣政衙是夜地震庚午冊大行皇帝貴妃郭氏爲皇太后貶諫
議大夫李景儉爲建州刺史二月癸酉朔丁丑御丹鳳樓大赦天下
宣制畢陳俳優百戲於丹鳳門內上以觀之丁亥幸左神策軍觀角

抵及雜戲日吳而罷癸巳罷邕管經畧使所管州縣隸邕府甲午以
桂管觀察使裴行立爲安南都護充本管經畧使乙未以太僕卿杜
式方爲桂州刺史充桂管觀察使丙申丹王逾薨丁酉勅入迴紇使
宜與私覲正員官十三員入吐蕃使與八員庚子太子賓客呂元膺
卒辛丑以戶部侍郎楊於陵爲戶部尚書壬寅勅舉賢良方正直言
極諫等科目人宜令中書門下尚書省四品已上於尚書省同試三
月癸卯朔贈皇太后父郭曖太傅母號國大長公主贈齊國大長公
主壬子召侍講學士常處厚路隨於太液亭講毛詩關雎尚書洪範
等篇旣罷並賜緋魚袋左右軍中尉馬進潭梁守謙魏弘簡等請立
門戟從之以太子詹事分司東都常賈之爲河南尹丁巳御史中丞
崔植奏元和十二年勅御史臺三院御史據除拜上日爲後未上日
不得計月數又准其年九月十七日勅踰一箇月不在此限行立班
次卽宜以勅內先後爲定臣觀此後勅未便事宜請自今後三院御
史職事行立一切依勅文先後爲定除拜上日便爲月數從之戊午

吏部尚書趙宗儒奏先奉勅先朝所放制科舉人令與中書門下四品已上官同於尚書省就試者臣伏以制科所設本在親臨南省策試亦非舊典今覃恩既畢庶政惟新况山陵日近公務繁迫待問之士就試非多臣等商量恐須停罷從之罷申州歲貢茶乙丑以皇太后兄司農卿郭釗爲刑部尚書兼司農卿右金吾衛大將軍郭鏌檢校工部尚書丁卯貶太子賓客留司東都孟簡爲吉州員外司馬戊辰夜大風雹夏四月壬申朔丁丑遣王寬薨乙酉三恪鄴國公楊造卒丁亥勅內侍省見管高品官白身都四千六百一十八人除官員一千六百九十六人外其餘單貧無屋室居止宜每人加衣糧半分五月壬寅朔癸卯詔以國用不足應天下兩稅鹽利推酒稅茶及戶部闕官除陌等錢兼諸道雜權稅等應合送上都及留州留使諸道支用諸司使職掌人課料等錢並每貫除舊墊陌外量抽五十文仍委本道本司本使據數逐季收計其諸道錢便差綱部送付度支收管待國用稍充即依舊制其京百司俸料文官已抽修國學不可重

有抽取武官所給校簿亦不在抽取之限壬子詔入景陵玄宮合供
干味食魚肉肥鮮恐致薰穢宜令尚藥局以香藥代食庚申堊憲宗
於景陵六月辛未朔丁丑以司徒兼中書令韓弘爲河中尹克河中
絳磁隰等州節度使安南都護桂仲武奏誅賊首楊清收復安南府
戊寅以金吾將軍李佑檢校左散騎常侍兼夏州刺史克夏綏銀宥節
度使代李聰以聰爲靈州大都督府長史克朔方靈鹽節度使以中書
舍人王仲舒爲洪州刺史御史中丞克江西觀察使已卯放京兆府
今年夏青苗錢八萬三千五百六十貫宜委令狐楚楚以山陵用不盡
綾絹准實估付京兆府代所放青苗錢庚辰加邠寧慶節度使李光
顏特進以城鹽州之功也以考功員外郎史館脩撰李翱爲朗州刺
史坐與李景儉相善故也癸未併克州萊蕪縣入乾封縣已丑工部
尚書歸登卒壬辰詔帝王所重者國體所切者人情苟得其體必臻
於大和如失其情是曲於小利況設官求理頒祿責功教既有常寧
宜就減近以每歲經費量入數少外官俸料據數收貫朕再三思度

終所未安今則歲屬豐登兵方便息自宜克已以足用何得剥下以爲謀臨軒載懷實所增愧其今年五月勅應給用錢每貫抽五十文都計一百五十萬貫宜併停抽仍出內庫錢三十七萬五千貫付度支給用初憲宗用兵擢皇甫鏞爲相苛歛剥下人皆咎之以至譴逐至是宰臣創抽貫之利制下人情不悅故罷之癸巳皇太后移居興慶宮皇帝與六官侍從大合宴于南內迴幸右軍頒賜中尉等有差自是凡三日一幸左右軍及御宸暉九仙等門觀角抵雜戲秋七月辛丑朔壬寅以河中晉絳觀察使李絳爲兵部尚書甲辰以大理卿孔戢爲潭州刺史湖南觀察使乙巳詔皇太后就安長樂朝夕承顏慈訓所加慶感兼極今月六日是朕載誕之辰奉迎皇太后於宮中上壽朕旣深歡慰欲與臣下同之其日百寮命婦宜於光順門進名叅賀朕於光順門內殿與百寮相見未爲常式非典也郵曹濮等州節度賜號天平軍從馬總奏也丙午勅乙巳詔書載誕受賀儀宜停先是左丞韋綬奏行之宰臣以古無降誕受賀之禮奏罷之丁未苑內

假山毀壓死役者七人自五月不雨崕月壬子始雨甲寅御新成永
安殿觀百戲極歡而罷乙卯勅自今後新除節度觀察使到任日具
見在錢帛斛斗器械數目分析以聞安南都護裴行立卒是日上幸
安國寺觀孟蘭盆筵管經畧使楊旻卒平盧軍新加押新羅渤海兩
蕃使賜印一面許諸巡官一人新作寶慶殿庚申夜熒惑入羽林壬
戌盛飾安國慈恩千福開業章敬等寺縱吐蕃使者觀之丙寅以新
成永安殿與中宮貴主密宴以樂之嬪妃皆預丁卯以門下侍郎平
章事令狐楚爲宣州刺史兼御史大夫充宣歙池觀察使楚爲山陵
使縱吏于翬刻下不給工徒價錢積留錢十五萬貫爲羨餘以獻故
及于貶八月庚午朔辛未兵部尚書楊於陵總百寮錢貨輕重之議
取天下兩稅榷酒鹽利等悉以布帛任土所產物充稅並不徵見錢
則物漸重錢漸輕農人見免賤賣匹段請中書門下御史臺諸司官
長重議施行從之癸酉太子少傅致仕李鄴卒甲戌安南都護桂仲
武斬叛將楊清首以獻收復安南府乙亥賜教坊錢五千貫充息利

本錢御勤政樓問人疾苦前江西觀察使裴次元卒已卯月掩牽牛同
州雨雪害秋稼京兆府戶曹叅軍韋正牧專知景陵工作刻削厨料
充私用計賊八千七百貫文石作專知官奉仙縣令于翬刻削計賊
一萬三千貫並宜決重杖處死壬辰幸魚藻池發神策軍二千人浚
魚藻池戊戌以朝議郎守御史中丞武騎尉賜紫金魚袋崔植爲朝
散大夫守中書侍郎同中書門下平章事己亥宣歙觀察使令狐楚再貶
衡州刺史九月庚子朔改河北稅鹽使爲權鹽使辛丑大合樂於魚藻宮
觀競渡又召李愬李光顏入朝欲於重陽日宴群臣拾遺李珣等上
疏諫云元朔未改園陵尚新雖易月之期俯從人欲而三年之制猶
服心喪夫過密弛禁蓋爲齊人合樂內庭事將未可不聽乙巳以駕
部郎中知制誥李宗閔爲中書舍人宋州大水損田六千頃戊申以
重陽節曲宴郭釗兄弟貴戚主婿等於宣和殿己酉大雨三日至是
雨雪樹木無風而摧仆者十五六以吏部侍郎崔群爲御史大夫滄
景水損田戊午加河東節度使金紫光祿大夫檢校尚書右僕射兼

門下侍郎同平章事太原尹北都留守上柱國晉國公食邑三千戶
裴度守司空門下侍郎同平章事以邠寧節度使檢校司空邠州刺
史上柱國武威郡開國公食邑二千戶李光顏並同中書門下平章
事又以武寧軍節度徐泗濠等州觀察等使檢校尚書左僕射徐州
刺史上柱國涼國公食邑三千戶李愬爲同中書門下平章事潞州
大都督府長史充昭義軍節度澤潞磁邢洺觀察處置等使夏州奏
移宥州于長澤縣置辛酉宴李光顏李愬於麟德殿頒賜優厚以袁州
刺史韓愈爲朝散大夫守國子祭酒復賜金紫丙寅以御史大夫崔
群檢校兵部尚書徐州刺史充武寧軍節度徐泗宿濠觀察等使以
將作監崔能爲廣州刺史充嶺南節度使丁卯以兵部尚書李絳爲
御史大夫戊辰以前嶺南節度使孔戣爲吏部侍郎冬十月庚午朔
閏婆國遣使朝貢庚辰宰相與吐蕃使於中書議事京百司共賜錢
一萬貫仰御史臺據司額大小公事閑劇均之成德軍節度使王承
宗卒其弟承元上表請朝廷命帥遣起居舍人栢耆宣慰之辛巳金

公亮修成指南車記里鼓車壬午吐蕃寇涇州命中尉梁守謙將神策軍四千人及八鎮兵赴援乙酉以魏博等州節度觀察等使光祿大夫檢校司徒兼侍中魏博大都督府長史上柱國沂國公食邑三千戶實封三百戶田弘正可檢校司徒兼中書令鎮州大都督府長史成德軍節度鎮冀深趙等州觀察處置等使以鎮冀深趙等觀察度支使朝議郎試金吾左衛曹叅軍兼監察御史王承元可銀青光祿大夫檢校工部尚書使持節滑州諸軍事守滑州刺史御史大夫克義成軍節度鄭滑等州觀察等使以昭義節度使檢校尚書左僕射同中書門下平章事李愬可本官爲魏州大都督府長史克魏博等州節度觀察等使以義成軍節度使劉悟依前檢校右僕射兼潞州大都督府長史克昭義節度澤潞邢洺磁等州觀察等使以左金吾將軍田布爲檢校左散騎常侍兼懷州刺史御史大夫克河陽三城懷孟節度使乙酉涇州奏吐蕃退去時夏州節度使田緡貪穢侵刻党項羗羗引西蕃入寇賴郝玘李光顏奮命拒之方退丁亥西川奏吐

蕃侵雅州令發兵鎮守東川節度使王涯陳破吐蕃策言以厚賂北蕃俾入西蕃據地得人多少賞之十一月乙亥朔癸卯制朕聞帝王不宅四海子育群生如天無不覆如日無不燭乃睠輿方初喪戎帥念乎三軍之事泊于四州之人或懷忠積誠而思用莫展或災荒兵役而望恤何階今則昌運一開誠節咸著王承元首陳章䟽願赴闕庭未念父兄之忠克固君臣之義已加殊獎別委重蕃又念成德軍將士等叶謀向義丹款載申咸欲効其器能各宜列之爵秩大將史重歸牛元翼已超授寵榮今更都加厚賜宜令諫議大夫鄭覃往鎮州宣慰賜錢百萬貫王澤所洽天網方恢宥過釋寃與人休泰其管内見禁囚徒罪無輕重並宜釋放朕以武俊之勲勞光于彛鼎士真之恭恪繼被節旄承宗感恩亦克立効未言十代之宥俾賜一門之榮承宗兄弟已授官爵其承宗葬事亦差官監視務令周厚丁未封王承宗祖母李氏爲晉國太夫人辛亥田弘正奏王承元以今月九日領兵二千人赴鎮滑州成德軍徵賞錢頗急乃命栢耆先往諭之以華州刺

史衛中行爲陝州長史充陝觀察使以宗正卿李翱爲華州刺史潼關防禦鎮國軍使乙卯上幸金吾將軍郭縱城南莊縱以莊爲獻戊午詔曰朕來日暫往華清宮至暮却還御史大夫李絳常侍崔元畧已下伏延英門切諫上曰朕以成行不煩章疏諫官再三論列是日田弘正奏今日十六日入鎮州訖已未上由複道出城幸華清宮左右中尉擗伏六軍諸使諸王駙馬千餘人從至晚還宮癸亥檢校司徒燕太子少師鄭餘慶卒以渭州刺史涇原行營兵馬使保定郡王郝玘爲慶州刺史玘勇將深入吐蕃接戰朝廷恐失勇將故移之內地十二月己巳朔戊寅召故女學士宋若華妹若昭入宮掌文奏壬午幸右軍擊鞠遂畋於城西丙戌前昭義軍節度使辛祕卒己丑以庫部郎中知制誥牛僧孺爲御史中丞嶺南奏崖州司戶叅軍皇甫鏘卒丙申以司門員外郎白居易爲主客郎中知制誥是歲計戶帳戶總二百三十七萬五千四百口總一千五百七十六萬定鹽夏劍南東西川嶺南黔中邕管容管安南合九十七州不申戶帳長慶元年正

月己亥朔上親薦獻太清宮太廟是日法駕赴南郊日抱珥宰臣賀
於前辛丑祀昊天上帝於圓丘即日還宮御丹鳳閣大赦天下改元
長慶内外文武及致仕官三品已上賜爵一級四品已下加一階陪
位白身人賜勳兩轉應緣大禮移仗宿衛御樓兵仗將士普恩之外
賜勳爵有差仍准舊例賜錢物二十萬四千九百六十端匹禮畢群
臣於樓前稱賀仗退上朝太后於興慶宮壬寅夏州節度使奏浙東
湖南等道防秋兵不習邊事請畱其兵甲歸其人靈武節度使李聽
奏請於淮南忠武武寧等道防秋兵中取三千人衣賜月糧賜當道
自召募一千五百人馬驍勇者以備邊仍令五十人爲一社每一馬
死社人共補之馬永無闕從之癸卯以河陽懷節度使田布爲涇州
刺史充四鎮北庭行營涇原節度使以刑部尚書兼司農卿郭釗檢
校戶部尚書懷州刺史充河陽三城懷節度使以涇原節度使王潛
檢校兵部尚書江陵尹充荆南節度使乙巳鄜坊節度使韓瑊改名
充己酉以前檢校大理少卿駙馬都尉劉士涇爲太僕卿給事中肅

弘景薛存慶封還詔書上諭之曰士逕父昌有邊功父爲少列十餘年又以尚雲安公主朕欲加恩制官勅下制命始行翰林學士司勳員外郎李德裕上疏曰臣見國朝故事駙馬國之親密不合與朝廷要官往來開元中禁止尤切近日駙馬多至宰相及要官宅此輩無他才可以延接唯是漏洩禁密交通中外伏望宣示駙馬等今後有事任至中書見宰臣此外不得至宰臣及臺省官私第從之戊午夜星孛于翼壬戌制朝議大夫守門下侍郎同中書門下平章事徐國公蕭俛爲尚書右僕射累表乞罷政事故也癸亥以左散騎常侍崔元畧爲黔州刺史充黔中觀察使丁卯星孛於辰近太微西垣南第一星二月戊辰朔癸酉以尚書右僕射蕭俛爲吏部尚書甲戌以檢校右僕射兼吏部尚書韓臯守右僕射乙亥夜太白犯昴丙子上觀雜伎樂於麟德殿歡甚顧謂給事中丁公著曰比聞外間公卿士庶時爲歡宴蓋時和民安甚慰予心公著對曰誠有此事然臣之愚見風俗如此亦不足嘉百司庶務漸恐勞煩聖慮上曰何至於是對

曰夫賓宴之禮務達誠敬不繼以淫故詩人美樂且有儀憐異屢舞前代名士良辰宴聚或清談賦詩投壺雅歌以杯酌獻酬不至於亂國家自天寶已後風俗奢靡宴席以諠譁沉湎爲樂而居重位秉大權者優雜倨肆於公吏之間曾無愧耻公私相效漸以成俗由是物務多廢獨聖心求理安得不勞宸慮乎陛下宜頒訓令禁其過差則天下幸甚時上荒于酒樂公著因對諷之頗深嘉納已卯幽州節度使劉總奏請去位落髮爲僧又請分割幽州所管郡縣爲三道請支三軍賞設錢一百萬貫壬申以中書侍郎平章事段文昌檢校刑部尚書同平章事成都尹充劍南西川節度等使以朝散大夫尚書戶部侍郎知制誥翰林學士上柱國建安縣開國男杜元穎守本官同中書門下平章事以劍南西川節度使王播爲刑部尚書充鹽鐵轉運使乙酉天平軍節度使馬摠奏當道見管軍士三萬三千五百人從去年正月已後情願居農者放逃亡者不捕先是平定河南及王承元去鎮州宰臣蕭俛等不顧遠圖乃獻銷兵之議請密詔天下

軍鎮每年限百人內破八人逃死故摠有是秦丁亥夜月犯歲星在尾
十三度辛卯寒食節宴群臣於麟德殿頒賜有差壬辰刑部侍郎李
建卒癸巳九姓迴紇毗伽保義可汗卒三月丁酉朔浙東奏移明州
於鄞縣置劉摠進馬一萬五千匹甲辰鄭滑節度使王承元祖母晉
國太夫人李氏來朝既見上令朝太后於南內丁未宗正寺奏准貞
元二十一年勅宗子陪位放五百七十人出身准今年勅放三百人
伏緣人數至多不需恩澤乞降特恩更放二百人出身從之平盧薛
平奏海賊掠賣新羅人口於緣海郡縣請嚴加禁絕俾異俗懷恩從
之戊申罷京西京北和糴使擾人故也罷河北推鹽法許約計課利都
數付推鹽院庚戌以左丞常綬爲禮部尚書是夜太白近五車辛亥
命給事中常弘慶充幽州宣慰使左拾遺狄兼謨副之鹽鐵使王播
奏江淮鹽估每斛加五十文兼舊三百文癸丑以幽州盧龍軍節度
副大使知節度事押奚契丹兩蕃經畧等使檢校司空同中書門下
平章事楚國公劉總可檢校司徒兼侍中天平軍節度鄆曹濮等州

觀察等使以宣武軍節度使檢校右僕射同平章事張弘靖爲檢校
司空同平章事兼幽州大都督府長史充幽州盧龍軍節度使從劉
總所奏故也以鳳翔節度使李愿檢校司空汴州刺史充宣武軍節度使
以邠寧節度使李光顏爲鳳翔尹依前檢校司空平章事充鳳翔隴
右節度使以右衛大將軍高霞寓檢校工部尚書邠州刺史充邠寧
節度使諫官上疏論霞寓敗軍左謫未宜拜方鎮不從乙卯以權知
京兆尹盧士玫爲瀛州刺史充瀛莫等州都團練觀察使從劉總奏
析置也丁巳制劉綏已極上台仍移重鎮兄弟子姪各授官榮大將
賓寮亦宜超擢幽州百姓給復一年賜三軍當設錢一百萬貫令宣
慰使薛存慶與弘靖計會支給戊午封皇弟憬爲鄜王悅爲瓊王惇
爲沔王懌爲婺王惜爲茂王怡爲光王協爲淄王憺爲衢王悅爲澶
王皇子湛爲景王渙爲江王湊爲漳王溶爲安王瀍爲潁王以兵部
侍郎柳公綽爲京兆尹兼御史大夫已未以屯田員外郎李德裕爲
考功郎中左補闕李紳爲司勳員外郎並依前知制誥翰林學士勅

今年錢徽下進士及第鄭朗等一十四人宜令中書舍人王超主客郎中知制誥白居易等重試以聞甲子劉綏請以私第爲佛寺乃遣中使賜寺額曰報恩幽州奏劉綏堅請爲僧又賜以僧衣賜號大覺綏是夜遁去幽州人不知所之乙丑以漳州刺史韓泰爲郴州刺史汀州刺史韓曄爲永州刺史循州刺史陳諫爲道州刺史量移也夏四月丙寅朔授劉綏弟約及綏男等一十一人官內五人爲刺史餘朝班環衛庚午易定奏劉綏已爲僧三月二十七日卒于當道界贈太尉甲戌秘書監蔣乂卒丙子以前天平軍節度使馬摠復爲天下節度使丁丑詔國家設文學之科本求才實苟容僥倖則異至公訪聞近日浮薄之徒扇爲朋黨謂之閑館干擾主司每歲策名無不先定求言敗俗深用興懷鄭朗等昨令重試意在精覈藝能不於異常之中固求深僻題目貴令所試成就以觀學藝淺深孤竹管是祭天之樂出於周禮正經閱其呈試之文都不知其本事辭律鄙淺蕪累何多亦令宣示錢徽庶其深自懷愧誠宜盡棄以警將來但以四海無虞

人心方泰用弘寬假式示殊恩孔溫業趙存約竇洵直所試粗通與及第盧公亮等十一人可落下自今後禮部舉人宜准開元二十五年勅及第人所試雜文并策送中書門下詳覆敕禮部侍郎錢徽爲江州刺史中書舍人李宗閔爲劍州刺史右補闕楊汝士爲開州開江令戊寅宰臣崔植杜元穎奏請坐日所有君臣獻替事關禮體便隨日撰錄號爲聖政紀歲終付史館從之事亦不行丙戌正衙命使冊九姓迴紇爲登羅羽錄沒密施拘錄毘伽可汗辛卯以衡州刺史令狐楚爲郢州刺史吉州司馬孟簡爲睦州刺史壬辰詔百辟卿士宜各徇公勿爲朋黨甲午以張弘靖入幽州受朝賀中書門下奏燕薊八州平准禮宜告陵廟從之五月丙申朔戊戌以刑獄淹滯立程凡大事大理寺三十五日詳斷訖申刑部三十日聞奏中事大理寺三十日刑部二十五日小事大理寺二十五日刑部二十日所斷罪二十件已上爲大十件已上爲中十件已下爲小刑部四覆官大理六丞每月常湏二十日入省寺其厨料令戶部加給從中丞牛僧孺

奏也已亥貶考功員外郎李渤爲虔州刺史以前書宰相考辭太過
宰相杜元穎等奏貶之癸卯幽州大將李恭已下十八人並爲刺史
及諸衛將軍已酉右散騎常侍致仕柳登卒辛亥造百尺樓於宮中
壬子加茶摧舊額百文更加五十文從王播奏拾遺李珣上疏論其
不可疏奏不報丙辰建王審薨丁巳滄州先置景州於弓高縣置歸
化縣於福壽草市並宜停廢壬戌幽州宣慰使給事中薛存慶卒於
鎮州癸亥勅先置潞州於鄆城宜廢其鄆城上蔡西平遂平兩縣復
隸蔡州皇妹太和公主出降迴紇登羅骨沒施合昆伽可汗甲子命
金吾大將軍胡証充送公主入迴紇使燕冊可汗又以太府卿李銳
爲入迴紇婚禮使六月乙丑朔辛未吐蕃犯青塞堡甲申賜御史中
丞牛僧孺金紫秋七月乙未朔壬寅月掩房次廂壬子群臣上尊號
曰文武孝德皇帝是日上受冊於宣政殿禮畢御丹鳳樓大赦天下
甲寅幽州監軍使奏今月十日軍亂囚節度使張弘靖別館害判官
常雍張宗元崔仲卿鄭墳軍人取朱滔子洄爲留後丁巳貶張弘靖

爲太子賓客分司己未再貶弘靖爲吉州刺史朱洄自以年老令軍人立其子克融爲留後初劉總歸朝籍其軍中素難制者送歸闕庭克融在籍中宰相崔植杜元穎素不知兵心無遠慮謂兩河無虞不復禍亂矣遂奏劉總所籍大將並勒還幽州故克融爲亂復失河北矣庚申以昭義軍節度使劉悟檢校司空兼幽州大都督府長史充幽州盧龍軍節度副大使知節度事以國子祭酒韓愈爲兵部侍郎辛酉太和長公主發赴迴紇上以半仗御通化門臨送群臣班於章敬寺前八月甲子朔己巳鎮州監軍宋惟澄奏七月二十八日夜軍亂節度使田弘正并家屬將佐三百餘口並遇害軍人推衙將王廷湊爲留後辛未以左金吾將軍楊元卿爲涇州刺史充四鎮北庭行軍涇原節度使勅公卿大臣至中書議幽鎮討伐之謀癸酉王廷湊遣盜殺異州刺史王進岌據其郡乙亥以前涇原節度使田布起復檢校工部尚書兼魏州大都督府長史充魏博節度使己卯以深州刺史本州團練使牛元翼充深冀節度使辛巳夜太白近軒轅左角

冀州刺史吳曉潛爲幽州兵所逐瀛州兵亂囚觀察使盧士玫瀛州尋爲幽州兵所據乙丑以河東節度裴度充幽鎮兩道招撫使庚寅以建州刺史李景儉爲諫議大夫壬辰夜太白近太微西垣癸巳鎮州出兵圍深州九月甲午朔丁酉廢興州鳴水縣戍夜太白近太微右執法壬寅大雨震靈乙巳相州兵亂殺刺史邢楚丙午令內常侍段文政監領鄭滑河東許三道兵救援深州吐蕃請盟許之辛亥夜月近天關壬子幽州賊掠易州涑水遂城滿城癸丑以前魏博節度使李愬爲太子少保癸酉魏博節度使田布奏出師五千赴貝州行營冬十月甲子朔丙寅太中大夫守刑部尚書騎都尉王播可中書侍郎同中書門下平章事依前充鹽鐵轉運使以河東節度使裴度充鎮州四面行營都招討使以左領軍衛大將軍杜叔良充深冀諸道行營節度使戊辰以深冀節度使牛元翼爲鎮州大都督府長史充成德軍節度鎮冀深趙等州節度使辛未以中書舍人知貢舉王起爲禮部侍郎兵部郎中楊嗣復爲庫部郎中知制誥壬申以東都

留守鄭綱爲吏部尚書以吏部尚書李絳檢校右僕射判東都尚書
省事東都留守都畿防禦使以工部尚書丁公著檢校左散騎常侍
兼越州刺史御史中丞充浙東觀察使乙亥沂州刺史王智興爲武寧軍
節度副使丁丑裴度奏自將兵取故開路進討朱克融兵寇蔚州戊
寅王廷湊兵寇貝州易州刺史柳公濟奏於白石嶺破燕軍三千滄
州烏重胤奏於饒陽破賊工部尚書韋貫之卒壬午以尚書主客郎
中知制誥白居易爲中書舍人河東節度使裴度三上章論翰林學士
元稹與中官知樞密魏弘簡交通傾亂朝政以稹爲工部侍郎罷學
士弘簡爲弓箭庫使甲申以京兆尹御史大夫柳公綽爲吏部侍郎
丙戌以深異行營節度使杜叔良爲滄州刺史橫海軍節度使以代
烏重胤授重胤檢校司徒興元尹充山南西道節度使時上急於誅
賊杜叔良出征日面辭奏云臣必旦夕破賊重胤善將知兵以賊勢
未可卒平用兵稍緩故有是拜丁亥前浙東觀察使薛戎卒戊子魏
博田布奏自率全師進討太子少保李愬卒己丑以戶部侍郎判度

支崔俊爲工部尚書判度支以山南西道節度使崔從爲尚書左丞以祕書監許季同爲華州刺史充潼關防禦鎮國軍使辛卯昭義劉悟奏自將兵次臨城十一月甲午朔裴度奏破賊於會星鎮朱克融兵大寇定州節度使陳楚出師拒戰破賊二萬乙巳徐州崔群奏遣節度使王智興率師赴行營戊申以司農卿裴武爲鎮州行營供軍使戊午上御宣政殿試制科舉人辛酉淄青牙將馬延峯謀逆節度使薛平覺其謀而誅之詔中書舍人白居易繕部郎中陳祐考功員外郎賈餗同考制策十二月甲子朔丙寅以前容州經略使留後嚴公素爲容州刺史容管經略使丁卯貶諫議大夫李景儉爲楚州刺史庚午杜叔良之軍與賊戰於博野爲賊所敗七千人陷賊叔良僅免乙亥勅諸道除上供外晉州晉使錢內每貫割二百文以助軍用賊平後仍舊定州陳楚破朱克融賊二萬於望都戊寅以鳳翔節度使李光顏爲忠武軍節度使代李遜仍兼深冀行營節度以李遜爲鳳翔節度使貶員外郎獨孤朗韶州刺史起居舍人溫造朗州刺史司

勳貢外郎李肇澧州刺史刑部貢外郎王鑑郢州刺史坐與李景儉
於史館同飲景儉乘醉見宰相謾罵故也兵部郎中知制誥馮宿庫
部郎中知制誥楊嗣復各罰一季俸料亦坐與景儉同飲然先起不
貶官辛巳李光顏赴鎮百寮餞於章敬寺上御通化門臨送賜玉帶
名馬仍勅神策副使楊承和充深冀行營都監押壬午出內庫錢五
萬貫以助軍乙酉以幽州都知兵馬使朱克融檢校右散騎常侍充
幽州盧龍軍節度使其拘囚張弘靖殺害府寮之罪一切釋放時朝
議以克融能保全弘靖王廷湊殺害弘正可赦燕而誅趙故有是詔
是歲天下戶計二百三十七萬五千八百五十口一千五百七十六萬
二千四百三十二元不進戶軍州不在此內二年春正月癸巳朔以
用兵罷元會乙未以夔州刺史王承弁爲安南都護本管經略招討
使丁酉朱克融陷滄州弓高縣賊攻下博兼邀餉道車六百乘而去
庚子魏博兵自潰於南宮縣戊申魏牙將史憲誠奪師田布伏劍而
卒巳酉以魏博中軍先鋒兵馬使憲誠檢校工部尚書兼魏州大都

督府長史充魏博節度使是日大風霾庚戌以德州刺史王日簡爲
滄州刺史充橫海軍節度滄德棣觀察等使以代叔良壬子貶叔良
爲歸州刺史以獻計誅幽鎮無功而兵敗喪所持旌節也甲寅以工
部尚書度支崔俊檢校禮部尚書兼鳳翔尹充鳳翔隴節度使以鴻
臚卿兼御史大夫判度支復以弓高縣爲景州青州奏海凍二百里
乙卯以前鳳翔節度使李遜爲刑部尚書己未刑部尚書李遜卒庚
子以充沂密觀察使曹華爲節度使以天德軍防禦使李進誠兼靈
州刺史充朔方靈鹽定遠城等州節度使以晉州刺史李岵爲豐州
刺史充天德軍豐州東西受降城都防禦使內出繒帛八萬匹以助
軍權停嶺南黔中今年選補二月癸亥朔甲子詔雪王廷湊仍授
鎮州大都督府長史御史大夫充成德軍節度鎮冀深趙等州觀察
等使三軍將士待之如初仍令兵部侍郎韓愈往彼宣諭以前吉州
刺史張弘靖爲撫州刺史弘靖初貶官尚在幽州拘留半歲克融授
節始得還故有是命丙寅以前成德軍節度使牛元翼檢校工部尚

書襄州刺史充山南東道節度觀察臨漢監牧等使丁卯以考功郎中知制誥李德裕爲中書舍人依前翰林學士癸酉以鄜坊丹節度使韓充爲義成軍節度使以代王承元爲鄜坊節度使甲戌夜火木星相近滄州以成元節度使王日簡賜姓名全略辛巳以正議大夫守中書侍郎同中書門下平章事武騎尉賜紫金魚袋崔植爲刑部尚書罷知政事以工部侍郎元稹守本官同平章事以翰林學士中書舍人李德裕爲御史中丞司勳員外郎知制誥李紳爲中書舍人依前翰林學士右庶子王仲周以奉使緩命貶台州刺史癸未以深冀行營諸軍節度忠武軍節度使李光顏爲滄州刺史橫海軍節度使兼忠武軍節度深冀行營並如故以橫海軍節度使李全略爲德州刺史德棣等州節度丙戌以兵部郎中知制誥馮宿檢校左庶子充山南東道節度副使權知襄州軍府事以牛元翼在深州重圍故也丁亥以河東節度使司空兼門下侍郎平章事裴度守司徒平章事充東都留守判東都尚書省事都畿汝防禦使太微宮等使以前

靈武節度使李聽爲太原尹北都畱守河東節度使三月壬辰朔詔曰武班之中淹滯頗久又諸薦送大將或隨節度使歸朝自今已後宜令神策六軍軍使及南衙常叅武官各具歷任送中書門下素立大功及有才器者量加獎擢常叅官依月限改轉諸道軍府帶監察已上官者限三周年即與改轉軍士死王事者三周年內不得停衣糧先於畱州畱使錢內每貫割二百文助軍今後不用抽取上於馭軍之道未得其要常云宜姑息戎臣故即位之初傾府庫頒賞之長行所護人至鉅萬非時賜與不可勝紀故軍旅益驕法令益弛戰則不剋國祚日危洎頒此詔方鎮多以大將文符鬻之富賈曲爲論奏以取朝秩者疊委於中書矣名臣扼腕無如之何癸巳以兵部尚書蕭俛爲太子少保以前山南東道節度使李逢吉爲兵部尚書壬寅左驍衛上將軍張奉國卒以鴻臚卿判度支張平叔爲戶部侍郎充職平叔以曲承恩顧上䟽請官自賣鹽可以富國強兵陳利害十八條詔下其䟽令公卿詳議中書舍人韋處厚隨條詰難固言不可事遂不

行朱克融王廷湊合兵攻深州不解裴度與書諭之克融還鎮廷湊
攻城亦緩乃並加檢校工部尚書戊申裴度來朝對於麟德殿伏奏
龍墀因叙河北用兵嗚咽流涕上改容慰勞之壬子以新授東都留
守裴度為楊州大都督府長史充淮南節度使癸丑徐州節度使崔
群為其副使王智興所逐智興自專軍務甲寅以右僕射韓皋為左
僕射以前淮南節度使李夷簡為右僕射前東都留守李絳復拜舊
官丙辰守司徒裴度正衙受冊訖謁太廟赴尚書省上宰臣百寮皆
送丁巳以左丞崔從檢校禮部尚書鄆州刺史鄆坊節度使以代王
承元以承元為鳳翔隴節度使戊午司徒裴度復入中書知政事以
中書侍郎平章事王播檢校右僕射兼揚州大都督府長史充淮南
節度使依前兼諸道鹽鐵轉運使以鳳翔節度使崔倭為河南尹牛
元翼率十餘騎突圍出深州來朝深州大將臧平等一百八十人皆
為王廷湊所殺己未以武寧軍節度使王智興檢校工部尚書兼徐
州刺史克武寧軍節度使以德棣節度使李全略復為滄州節度使

仍合滄景德棣為一鎮李光顏還鎮許州夏四月辛酉朔日有饑乏
甲子左僕射韓臯赴直上中使賜酒饌宰臣百寮送一如近式雲陽縣
角抵力人張莅負羽林官騎康憲錢憲徃徵之莅乘醉打憲將殞憲
男買德年十四持木鍾擊莅首破三日而卒刑部奏覆勅曰買德尚
在童年能知子道雖殺人當死為父可哀若從沉命之科恐失原情
之意可減死罪一等忻州刺史李寰守博野王廷湊攻之不下其李
寰所領兵宜割屬右神策以寰為軍使仍以忻州軍為名庚辰桂州
觀察使杜式方卒癸未以武寧軍節度使崔群為祕書監分司東都
翰林侍講學士肅處厚路隨進所撰六經法言二十卷賜錦綵二百
疋銀器二百事處厚改中書舍人隨改諫議大夫並賜金紫丁亥以
祕書監嚴巖為桂管觀察使是夜東北有流星光彩燭地殷殷有聲
出天市垣至即位滅五月辛卯朔以德州刺史李景儉為諫議大夫
癸丑太子少傅嚴綬卒戊午幽州朱克融上表進馬萬匹羊十萬口
先請其價賞軍隴山有異獸如猴腰尾皆長色青赤而猛鷲見蕃人

則躍而食之遇漢人則否六月甲戌朔甲子司徒平章事裴度守尚書右僕射工部侍郎平章事元稹爲同州刺史以正議大夫守兵部尚書輕車都尉李逢吉爲門下侍郎同中書門下平章事乙丑大風震電墜太廟鴟吻霹御史臺樹丁卯以易州刺史柳公濟爲定州刺史義武軍節度使王申諫官論責裴度太重元稹太輕乃追稹制書削長春宮使戊寅以前右僕射李夷簡爲太子少保分司東都戊子復置邕管以安南副使崔結爲邕管經畧使秋七月己丑朔丙申宋王結薨廢朝戊戌汴州軍亂逐節度使李愿立牙將李克爲畱後好時縣山水漂溺居人三百家陳許蔡等州水壬寅出中書舍人白居易爲杭州刺史乙巳詔南北省五品已上官議討李亦丙午貶李愿爲隨州刺史以鄭滑節度使韓充爲汴州刺史宣武軍節度使宋亳穎觀察等使鄭滑如故以宣武軍節度押衙李亦爲右金吾衛將軍丁未內出綾絹五十萬匹付度支以供軍用陳許水災賑粟五萬石己酉中使楊再昌使鎮州王廷湊奏奉詔取牛元翼家族請至秋

未發遣其田弘正骸骨尋訪不知所在辛亥以贈司徒忠烈公李愬
子源為諫議大夫賜緋魚袋乙卯勅員外郎知制誥二年後轉郎中
又二年後轉前行郎中又一年即正除諫議大夫知同前郎中給事
中并翰林學士別宣知者不在此限以前義武軍節度使陳楚為東
都畱守判尚書省事東畿汝防禦使本朝故事東都畱守罕用武臣
今用楚以李宥擾汴宋故也八月己未朔以絳州刺史崔弘禮為河
南尹兼東畿防禦副使給事中韋穎以弘禮望輕封還詔書上遣中
使諭之乃下詔陳許李光顏將兵收汴州戊辰以左僕射韓皋為東
都畱守判尚書省事東畿汝防禦使以東都畱守陳楚為河陽懷節
度使癸酉韓克奏今月六日發軍入汴州界營于千塔丙子汴州監
軍姚文壽與兵馬使李質同謀斬李宥及其黨薛志忠秦隣等丁丑
韓克入汴州以前東都畱守李絳為華州刺史充潼關防禦鎮國軍
等使浙東處州大水弱居民以充海沂密節度使曹華為華州刺史
充義成軍節度鄭滑潁等州觀察等使以宋州刺史高承簡為兖州

刺史充海沂密等州節度使以汴州防城兵馬使李質爲右金吾衛將軍
潁州棣鄭滑觀察使鹽鐵轉運使王播進開潁口圖九月戊子朔浙
西大將王國清謀叛觀察使竇易直討平之同惡二百餘人並誅之
韓充送李宥男道源道樞道淪等三人斬於西市宥妻馬氏小男道
本女沐娘配於掖庭壬子太子少師李夷簡卒贈太子太保癸卯以
前河陽節度使郭釗爲河中尹兼河中絳隰等州節度使御史中丞
李德裕爲潤州刺史兼御史大夫浙江西道都團練觀察處置等使
以代竇易直以易直爲吏部侍郎加晉州刺史李襄爲晉磁等州都
團練觀察使乙巳勅團練防禦州置判官一員其副使推巡並停辛
亥以吏部侍郎柳公綽爲御史大夫先有詔廣芙蓉苑南面居人廬
舍墳墓並移之群情駭擾癸丑降勅罷之德州軍亂害刺史王稷盡
剽其家財奴僕丁亥以萬州刺史李元喜爲安南都護陰山府沙陀
突厥兵馬使朱耶執宜來朝貢賜官誥錦綵銀器冬十月戊午朔壬
戌前河中晉絳慈隰等州節度使開府儀同三司守司徒中書令河

中尹上柱國許國公韓弘可守司徒兼中書甲子夜月掩牽牛中星
戊辰興元節度使烏重胤來朝移授天平軍節度使已卯以工部
侍郎鄭權爲工部尚書以前華州刺史許季同爲工部侍郎是日上
由複道幸咸陽止於善因佛寺施僧錢百萬咸陽令絹百疋閏十月
戊子朔入迴紇使金吾大將軍胡証副使光祿卿李憲婚禮使衛尉
卿李銳副使宗正少卿李子鴻等送太和公主自蕃中迴庚寅以吏
部尚書鄭絪爲太子少傅以太常卿趙宗儒爲吏部尚書韋綬爲興
元尹克山南西道節度使壬辰右驍衛大將軍韓公武卒廢朝以戶
部尚書楊於陵爲太常卿丙申迴紇可汗遣使獻國信四牀女口六
人葛祿口四人己亥勅翰林侍講學士諫議大夫路隨中書舍人韋
處厚兼充史館修撰憲宗實錄仍更日入史館實錄未成且許不入
內署仍放朝參甲寅詔江淮諸州旱損頗多所在米價不免踊貴眷
言疲困須議優矜宜委淮南浙西東宣歙江西福建等道觀察使各
於當道有水旱處取常平義倉斛斗據時估減半價出糶以惠貧民

丙辰以太子賓客令狐楚爲陝虢觀察使十一月丁巳朔丁卯尚書
左丞庾承宣爲陝虢觀察使令狐楚復爲太子賓客分司東都楚已
至陝州視事一日追改之庚午命景王率禁軍五百騎侍從皇太后
幸華清宮又幸石龕寺辛未以前安南都護桂仲武爲邕管經畧使
癸酉上幸華清宮迎太后巡狩于驪山下即日馳還太后翌日方還
丙子集王紉薨庚辰上與內官擊鞠禁中有內官欬然墜馬如物所
擊上恐罷鞠升殿遽足不能履地風眩就牀自是外不聞上起居者
三日是夜月近房十二月丁亥朔詔五坊鷹隼並解放獵具皆毀之
庚寅宰臣李逢吉率百寮至延英門請見上不許中外與度等三上
疏請立皇太子是夜司徒中書令韓弘卒辛卯上於紫殿御大繩牀
見百官李逢吉奏景王成長請立爲皇太子左僕射裴度又極言之
癸巳詔景王爲皇太子淮南奏和州劬烏江百姓殺縣令以取官米
甲午內出絹二百疋賑兩市癘殘窮者已未兩軍容內司公主戚屬
之家並以上疾痊平諸寺爲僧齋仍勅在京諸司疏放繫囚丙午上

御宣政殿冊皇太子受冊畢百寮謁太子於東宮太子舉簾執笏答拜宮寮拜則受之丁未判度支戶部侍郎張平叔貶通州刺史是夜月掩左角巳酉以前天平軍節度使馬拯檢校左僕射守戶部尚書庚戌以吏部侍郎竇易直為戶部侍郎判度支癸丑以太子冊礼畢宣制赦囚徒以前黔中觀察使崔元略為鄂岳蘄黃安等州觀察使太子賓客孟簡卒乙卯以前陝魏觀察使衛中行為尚書右丞是冬十月頻雪其後恒燠水不冰凍草木萌發如正二月之後三年正月丁巳朔上以疾不受朝賀是日大風昏翳竟日嗣郢王佐宜於崖州安置坐妄傳禁中語也勅不得買新羅人為奴婢已在中國者即放歸其國禮部侍郎王起奏當司所試貢舉人試訖申送中書候覆訖下當司然後大字放榜從之二月天平軍監軍奏節度使烏重胤病牙將王贇割股肉以療河陽節度使陳楚奏移使府於三城未有門戟欲移懷州門戟於河陽從之諫議大夫殷侑奏礼部貢舉請置三傳三史科從之戶部尚書崔倭卒三月丁巳宰臣百寮賜宴於曲江

亭勅應御服及器用在淮南兩浙宣歙等道合供進者并端午誕節
常例進獻者一切權停其鷹犬之類除備蒐狩外並令解放以牛僧
孺同中書門下平章事日晡晚後有賊入通化門闕死者一人傷者
六人賜宣徽院供奉官錢自一百二十貫文已下有差五月山南西
道奏移成州於實井堡山南東道節度使牛元翼卒秘書少監李隨
奏請造當司圖書印一面從之十月宰相監修國史杜元穎奏史官
沈傳師除鎮湖南其本分修史便令將赴本任修撰從之勅京兆尹
御史大夫韓愈宜放臺叅後不得爲例七月國子祭酒韋乾慶卒八
月鄭滑節度使曹華卒檢校尚書右僕射戶部尚書馬摠卒興元節
度使韋綬卒上由複道幸興慶宮至通化門賜持孟僧絹二百匹因
幸五方賜從官金銀鋌有差九月澤潞節度使劉悟進位平章事賜
宰相百寮重九宴于曲江亭南詔王丘佺進金碧文綵十有六品十
月以京兆尹韓愈爲兵部侍郎以御史中丞李紳爲江西觀察使宰
相李逢吉與李紳不協紳有時望恐用爲相及紳爲中丞乃除韓愈

爲京兆尹兼御史大夫仍放臺叅紳性峭直屢上疏論其事遂與愈
辭理往復逢吉乃兩罷之然紳出而愈留宰相杜元穎罷知政事除
成都尹劔南西川節度使龍武統軍陳楚卒以兵部侍郎韓愈爲吏
部侍郎新除江西觀察使李紳爲戶部侍郎紳既罷除江西上令中
使就第賜玉帶紳因除叙泣而請留中使具奏故與愈俱改官召翰
林學士龐嚴對因賜金紫內蘭使公廨本錢一萬貫軍器使三千貫
杜元穎赴鎮蜀上御安福門餞因賜皇城留守及金吾衛率等帛
有差十一月上御通化門觀作毗沙門神因賜綰五百匹浙東貢
甜菜海蚶十二月浙西觀察使李德裕奏去管内淫祠一千一十五
所四年正月辛亥朔上御殿受朝如常儀上餌金石之藥處士張
臯上䟽切諫上悅召之求臯不獲澤潞判官賈直言新授諫議大夫
劉悟上表乞畱從之禮部尚書致仕孔戣卒辛未上大漸詔皇太子
監國壬申上崩於寢殿時年三十群臣上謚曰睿聖文惠孝皇帝廟
號穆宗十一月庚申葬于光陵

史臣曰臣觀五運之推遷百王之隆替亦無常治亦無常亂在人而已匪降自天當軒黃御宇之秋則百年無事及商辛握圖之日則四海橫流昔章武皇帝痛國命之不行惜朝綱之將墜乃求賢俊摠攬英雄果能扼大盜之喉制姦臣之命五十載已終之士復入提封百萬戶受弊之吐重蘇縣花元和之政幾致昇平鴟梟方革於好音龍鼎戢傷於短祚苟或時有平勃之佐繼以文景之才則廷湊克融自縮螳螂之臂智興李宥敢萌狗鼠之謀強盜窺孟賁之金餓隸不拾嬰兒之餌觀夫羣主可謂痛心不知創業之艱難不恤黎元之疾苦謂威權在手可以力制萬方謂旒冕在躬可以坐馳九有曾不知聚則萬乘散則獨夫朝作股肱暮爲讎敵仲長子所謂至於運徙勢去獨不覺悟者豈非富貴生不仁沉溺致愚疾存亡以之迭代治亂從此周復誠哉是言也

贊曰惠王不令敗度亂政驕倖偶全實賴遺慶皇皇帝爲民立正此何人哉遽干鼎命

唐書本紀卷第十六